

26
62140/13

MEDICAL SOCIETY
OF LONDON



ACCESSION NUMBER

PRESS MARK

BERTRANDI, G.A.M.

AMEROSIA
BERTRANDI
DISSERTATIONES
KANTONIC

Digitized by the Internet Archive
in 2019 with funding from
Wellcome Library

<https://archive.org/details/b30525317>

T8

AMBROSII
BERTRANDI
DISSERTATIONES
ANATOMICÆ.

DE HEPATE, ET OCULO.



OF LONDON. MEDICAL
SOCIETY

AUGUSTÆ TAURINORUM MDCCXLVIII.

Ex Typographia Philippi Antonii Campanæ.

Superiorum permissu.

AMBRONI
BERTRANDI
DISSERTATIONES
ANATOMICAE
DE HEPATE ET OCULO.



ALFREDUS TALENTIUS MEDICUS

ALFREDUS TALENTIUS MEDICUS
ALFREDUS TALENTIUS MEDICUS

EMINENTISSIMO, ET REVERENDISSIMO

S. R. E. PRINCIPI

VICTORIO AMEDEO

CARDINALI DELLE LANZE

Nicosiæ Archiepiscopo, Magno S. R. M. Eleemosynario &c.

OPUSCULUM HOC HUMILLIME
D.D. AUCTOR.



Uum Divinarum rerum studia, in quibus maxime excellis, omnibus bonis artibus, atque ea potissimum Facultate, qua traditur, unde omnes Natura creet res, auctet, alatque, EMINENTISSIME, & REVERENDISSIME PRINCEPS, cumulaſti; tum nemini mirum videbitur, si ex quibus rebus ad eam pertinentibus, præpotentis Opificis vis, ac Divinæ Sapientia maxime patet, eas tibi duxerim nuncupandas.

pandas. Non enim a tanto Viro cuius omnis ætas in Cœlestium rerum contemplatione versatur, ea abor-
 rere dicenda sunt, quibus, quasi gradibus licet in
 Cœlum ascendere, & ad ipsum rerum Molitorem,
 & Effectorem Deum, per ea quæ facta sunt, &
 cadunt sub sensibus propius accedere, inter quæ
 primum certe locum obtinent ea, in quibus dispi-
 ciendis Anatomica Disciplina versatur. Huc acce-
 dit, quod excitaverit animum singularis Benignitas
 tua, quæ quum mihi satis probata sit, atque per-
 spectâ, tum in hac re non defuturam speravi. At
 qua facilitate hoc opusculum recepturus es, & ea-
 dem me in amplissimam tuam tutelam excipias pre-
 cor. Ad te omnes scientiarum Studiosi confugiunt,
 veluti ad eum, quem Divina Providentia ad ex-
 cellam dignitatem evexit, ut eorum Mæcenâs gra-
 tiosissimus quoque evaderet, quapropter gratiam tuam
 arte sollicitandam non existimo, at solum humillime
 invocandam; hinc etiam tuas virtutes perpetuo om-
 nium sermone celebratas silentio prætereo; præsertim
 cum, numquam ita magnifice quidquam non di-
 cam, quod virtus non superet tua.



CUM primum animum ad scribendum appu-
 li, id mihi negotii credidi solum dari, Lecto-
 ribus, ut placerent, quas fecissem Dissertationes, ne-
 que eleganti Præfatione Lectorum animum mihi
 conciliare unquam meditatus sum, persuasum enim
 habeo, non aliam fortunam a quocumque Aucto-
 re expectandam esse, ac eam, quam Poetis Boi-
 leaux jamdudum ominabatur, scilicet.

Exiit ut primum, prælo sudante Poeta
 In lucem, Emptoris merita fit sorte repente
 Mancipium; imperio vulgi se subdit ahenò
 Sola vices implere viri, præstare Poetam
 Una queunt, debentq; opera. Hoc lex optima sanxit;
 Supplice proloquio necquiquam, nec poplite flexo
 Lectorem obtundens, catus eblanditur amorem.
 Huic nova gignit adhuc fastidia, Judicis iram,
 Nil flectit, voces nullas tractabilis audit,
 Arbiter indomitus fati, nec parcere suetus. (*)

Atque difficile credo me, hanc personam in ali-
 quem Auctorem aliquando non egisse cur ergo non
 alii contra me? Tu vero, amice Lector, Dulcis,
 Comes, & Blandus judicium tuum mihi in au-
 rem, antequam hæ Dissertationes evulgarentur sub-
 missa

(*) *Satyra IX. ex Versione Godeau.*

missa voce insufflare voluisses, si tibi prius, quam Typographo manuscriptas dedissem; gratias tibi ago quam maximas, at poteram ne? Non nullis quidem optimi judicii Viris examinandas dedi, iique, (forte indulgenti animo) me excitarunt, ut easdem evulgarem. Nihilominus tamen, tuum adhuc judicium expecto, ut ex eo de aliis meis Dissertationibus decernam, dummodo

Loripedem Rectus derideat, Ætyopem Albus.



HEPATIS

HEPATIS DESCRIPTIO.

(§. I.)

Viscus, quod mole maximum, mox sub diaphragmatis fornice pendulum, dextrum abdominis hypocondrium occupat, ultra cartilaginem ensiformem, per Epigastrium, in levum fere Hypocondrium quoque productum, Hepar, aut Jecur vocant; In Homine colorem rubrum, plus, aut minus obscurum habet (a); Exterius magna ex parte convexum, interius aliquomodo concavum, variisque crenis, & foveis, tum etiam extantiis exasperatum, & inæquale observatur (b) Cl. Glissonius (c) totam hujus visceris figuram, haud inepte comparari posse existimat segmento obliquo albuminis ovi indurati, quod nempe fit per ellipsem excisum. Non semper tamen ad eundem modum adumbratum factum esse videtur; Exterius enim eam partem, qua dextrum Hypocondrium adimplet, seu majorem, ut vocant lobum, in cuiusdam quasi hemispherii modum plurimum elatum habet, ac pro-

(a) Verum præterquam reliqua viscera, variat hujusce color in brutis; non nullis enim est nigricans, aliis viridescens, flavum, cinnabarinum &c. Vid. Blas. Ant. Animal. Perrault. Dis. Anatomiq. de plusieurs Animaux, ex Tom. primis Acad. Parisien. Valent. Amphit. Zootom.

(b) Extantiarum, atque crenarum numerus, præsertim in brutis animalibus multiplex magis, quam in Homine occurrit. Continuum porro, & sine extantiis observabatur in *Alce*, in *Rangifero* ex Vol. I. Act. Med, & Phil. Hafniens. in *Bubalo* Parisiens. Perrault. op. cit. Elegantissima autem est Hepatis in *spyras* convoluti figura in *Cochlea operculari*, seu *vinearum*, hor-

tenfi, atque agresti, seu *Viar.* vid. *Svva-*
merdamini Bibl. Nat. Tom. II. Tab. IV. fig. VI., & VII. Tab. VIII. fig. V. Tab. IX. fig. II. Longas appendices habet in *Salamandra* apud *Vurfbainii* *Salamandrologiam*, item *Bianchi* *Præceptoris* mei æstimatissimi fig. IV. Tab. VII. Hist. Hepat. . At de reliquis jecoris differentiis inter *Hominem*, & *Bruta* vid. eruditissimi *Fantoni* elegantissimam Dissert. VI. ultim. edit. in hoc enim postremo opere *Anatomico*, *Zootomiam* diligentissime pertraxit, quapropter in hisce rebus, nos multum in posterum non immorabimur, nisi *Zootomica* observatio nostris argumentis confirmationem addat.

(c) Anat. Hepat. cap. 10.

protuberantem, ejusque superficies, quando ad suspendens ligamentum (§. 36.), seu ad anticam partem pervenerit, in longe humiliorem, atque planiorem alterius partis, seu lobi minoris superficiem subsidet, atque deprimitur, ita ut major lobus, natiformem protuberantiam, costarum cameræ accomodatam referat, alter vero vix extuberans planitiem fere habeat. Quod ad ejus ambitum, seu peripheriam, si a sinistro hypocondrio, seu ab epigastrio, quando non omnino, illuc protracta sit læva hujus visceris pars incipiamus, lingula, seu tamquam elatiori isthmo, oesophago, ut plurimum adfuso, vel etiam cum superiore, anteriorique Lienis ora, aliquando connexo, diaphragmati propius protendi, non raro observatur, illiusque isthmi interius latus, eo modo incurvum evadit, ut quæ sequitur fere media hujus superioris limbi pars, sensim minus elata, fere inde protensa, sed tamen glabra, & convexa videatur; hinc factus in hypocondrio dextro natiformis major lobus, verticem pene elatiorem habet, propioremque diaphragmati: ab eo vero loco ad spurias costas, plus, minus inferius, puta ut plurimum ad eam partem, quæ umbilico respondeat, dextra jecoris pars producta, limbum arcuatum habet, quem ex parabola factum diceres, ad memoratum isthmum, ex nostra circumscriptione inde terminatum, ita ut si ab extrema ora natiformis lobi, linea ducatur recta ad umbilicalem regionem, angulum magis, vel minus acutum cum hoc anteriori arcu, qui ut plurimum cartilagine spuriarum costarum excedit, præstet. Postremus hic limbus, præterquamquod, ut plurimum ex omni parte, non æque in sua convexitate ordinatus sit, duplici per sæpe in loco, plus, aut minus incisus, atque deficiens notatur, altero nempe, seu magis anteriori, ob umbilicalem venam, cavam jecoris partem penetrantem, alterove ob felleam vesiculam, suo, ut ajunt fundo, visceris oram excedentem; quæ ab umbilicali vena incisura fit, minor est, & magis longa, utraque porro aliquando abest.

(§. II.)

Interiorem, seu finam jecoris faciem multiformem dicam; Lobus enim dexter interius quoque plenus, atque pene extans est, in inferiore autem parte, magis magisque gracilescens, duas foveas habet, quarum, quæ magis posterior, renis dextri superiorem, exteriorumque arcum adcumbentem habet, alteraque magis anterior, a cysti fellea occupatur, ibi quoque aliqua intestini coli, ab ileo exfurgentis parte innixa. Sinister porro lobus, qua parte proximius ventriculi partem cooperit, aliquomodo quoque excavatur, ut commodam ei amptet sedem; Hos autem inter lobos, interius alter protuberat, maxime minor, Spigelianus, a Spigelio perperam dictus, nam præterquamquod in Eustachii Tab. X. Fig. IV. sistat, Vesalium quoque, Vidio Vidium, Sylvium, & Riolanum ita non latuit, ut scriptis, aut iconis non indicaverint. Hic figuram, ut plurimum habet, prope quadrangularem, trigonam, aut aliam quamcumque multi lateram, alteroque extremo, seu anteriori, quum trigonus est, bifidus non raro observatur, & in diversam longitudinem protractus; huic ex altero latere, alia per sæpe adjacet extuberans hepatica apophysis, quæ triangularem fere semper figuram habet. Ruffus Ephesus (a) ab Haruspibus, quatuor interioribus Hepatis extantiis, *Gladii*, aut *Cultri*, *Aurigæ*, *Foci*, *Mensæ*, vel *Unguis* nomina data fuisse scribit, verum quemadmodum Haruspices, brutorum jecinoribus, quæ ut plurimum multos in lobos discreta sunt uterentur, si quis ex Gente Medica, ut Theophilus (b) scribit, hæc nomina humani hepatis extantiis adtribuisset, *nugas*, *figmenta*que, dedisse, cum Vesalio (c) diceremus, idque eo magis, quo ob peculiare, sed commentitios, quos præstare usus credebant, hæc nomina imposuisse constat.

B

(§. III.)

(a) De Corpor. Human. part. ap. l. 1. c. 28.

(b) De corpor. human. fabric. lib. 2. cap. 21.

(c) De corpor. hum. fabr. c. 7. lib.

§. , alteram nempe hujus visceris extantiam liquores exscindere, alteram devehere, coquere, adparare scribebant.

(§. III.)

In dimidia sinistraque parte, lobus hepatis dexter, fossa transversali dividitur, quæ in alterius lobi dextram partem continuatur, eamque loborum convexi parietes, ita circummeminent, ut convallem, ultra quatuor transversos digitos persæpe amplam claudere videantur, in eam porro foveam ex sinistro latere, ad angulum pene rectum fissura pervenit, quam ab transeunte umbilicali vena imprimi dicebamus, eaque modo ab hepatis particula, tamquam ponte, magis, aut minus cooperitur, alias vero fulci adinstar aperta est, tum recta continuata videtur ad exterius minimilobi, vulgo Spigeliani latus, usque ad summam oram Hepatis, in eaque ductus venosus in Foetu jacet.

(§. IV.)

Hosce sinus cum maxima transversa fovea, quæ ut plurimum vario modo per latera, & fines dehiscit, *hepatis portas* dictos fuisse a Veteribus, non uno de nomine suspicamur. Græci enim Πύλας, *Urbis, aut Domus aditum, Atrium, vel Convallium Fauces, Regionem, Coronam, Insulam, & Sinum* identidem nominabant. Henricus autem Stephanus (a) Πύλας ἡπ' αὐτοῦ (ex Gorr. sententia, imo ex Tullio lib. de Nat. Deor.) universam sinam hepatis partem, significare interpretatur, nos vero exemplo Geographorum, qui portas vocant, *vias angustas, quas alti circumstant colles*, ut sunt *Portæ Caspiæ, Syriæ, Ciliciæ, Caucasæ*, aliæque plures, a nostra superius allata sententia de hepatis portis non recedimus. In dextro vero superiorique hepatis recessu, in sinua facie, magnum inter lobum, & Spigelianum, fovea quoque apparet, quæ fere recta linea paululum tamen dextrorsum descendit, eique cavæ venæ pars, diaphragma mox subeuntis adcumbit, modo per majorem, modo per minorem longitudinem, ut modo vix duos transversos digitos æquet, modo usque quatuor, & inter-

(a) Thesaur. lingu. Græcæ tom. 3.
pag. in. 611.

terdum etiam adeo levis est, ut potius quam fovea, jam deficientis foveæ vestigium videatur; neque prætereunda quoque est transversa fovea, in superiori parte inter utrosque lobos incisa, qua hepar vertebra, & oesophago subjectis accommodatur.

(§ V.)

Restat nunc demum, ut de jecoris figura, illud ex parte fateamur, quod generatim Riolanus scripsit (a) Hepatis nempe figuram plurimum variare, quemadmodum os, vultus, nasus variant, ut allatam etiam descriptionem pro Polycleti regula non traddamus; De cætero non etiam tacere possumus, quod præter memoratas foveas, & sinus, aliæ pæsepe occurrant, quæ aliquando satis profundæ, & ubi oræ diducantur, extremi pollicis fere capaces sunt, inter quos totus condi minimus Digitus possit, easque foveas, & sinus, etsi quoad situm vagas, Malpighius tamen *Naturæ filias*, fortasse *perpetuas* vocat (b), eisque in dilatationibus, compressionibusque, Hepar aliquomodo juvari non nulli existimant; revera quot non habet Lien, viscus dilatationibus adeo obnoxium (c)? Genuinum Hepatis situm, aliisque cum partibus habitudinem, modo non memoramus, namque de his aptius alibi, ubi de ejus tunica, & ligamentis. Methodo ergo synthetica hujusce visceris descriptionem prosequuturi transimus ad ea, quibus Hepar componitur vasa, & merito primum de *vena portarum*.

(§ VI.)

Summo studio, & improbo pene labore in acuratissimam hujus vasis descriptionem defudarunt egregii Viri, & in arte periti, Franciscus Glissonius (d) Marcellus Malpighius (e)

B 2

&

(a) Animadvers. in Laurentium, c. 19. lib. 6.

(b) Exercit. de hepat. cap. 2.

(c) Riolan. Encherid. Anat. lib. 2. cap. 26. Lieutaud. Ess. Anatomiq; pag. 312. du Vernoy Acad. Petrop. tom. 4. cl. Phys. ex quorum observationi-

bus opinionem suam de Lienis usu firmabat cl. Francisc. Caramelli amicus, heu quondam meus carissimus; vid. ejus dissertat. an. 1746. evulg.

(d) Oper. cit.

(e) Ibid.

& Kerkringius (a) nec omnia potuerunt omnes. Fregit hanc itaque glaciem Doctissimus Bianchi, cujus de hac re, plus quam Lynceis oculis institutæ observationes; Ait admiratione percitus Cl. Albertus Nicolai, Anatomicus Francofurti ad Moenum (b) sedulam merentur attentionem. Statim nempe in oculos cadit, vel superficie tenus tantum intuenti, egregia hujus Viri Icon (11. Tab. viii. Hist Hepat. 2. edit.) quæ prototypo adamussim respondet [c] quæque inter omnes, quas hætenus videre licuit, accuratissima mihi videtur; nec quidem adhuc tantam elegantiam in Cheseldenniana, quæ laudatur hujus vasis icon, adnotare potuimus, ut Bianchianæ, quod præfiscine dictum accipias, ullo pacto comparandam esse judicemus, tum præcipue cum Hepaticas solum ramificationes designet. Nos vero hanc venam descripturi cum præstantissimo VVinslovio (d) in ventralem, & revera Hepaticam dividimus.

(§ VII.)

Ventralis majores ramos nanciscitur a Splene, Ventriculo, Omento, Pancreate, Intestinis omnibus &c. A Splenis nempe sulco rami venosi prodeunt, qui postquam a proxima parte ventriculi, ramusculos, vasa brevia dictos exceperint, in unicum truncum evadunt (e) Splenicam venam dictum, atque

MOX

(a) Spicileg. Anat. obser. 96. tab. 29.

(b) Diatrib. Mechan. Anatom. de direct. vasor. pag. mih. 92.

[c] Exceptis his, quæ Auctor. in explicatione ipse monet, & melioris solummodo distinctionis gratia ita sistuntur. Id. ibid. vid. Hist. hep. tom. 2. pag. 1061. verum si laudandæ quoque sunt Eustachii figuræ de vena portarum ventrali, quas habemus in tab. 27. fig. 2., & 4., ubi præcipue elegantissima sunt utriusque mesenterii vasa, non ita quidem esse judicamus de vena portarum hepaticæ iconem, quæ est fig. 1. ejusd. tab. De parte ventrali, non est etiam contemnenda Vesal. icon. ad cap. 5. lib. 3. oper. cit., & elegans præcipue est quod ad vasa superiora.

(d) Expos. Anatom. trait. des ve nes §. 229., & alibi.

[e] Rarissime ipsi trunco splenico majori vasa brevia adjunguntur, quemadmodum non satis bene designant plures Anatomicorum icones, numero autem sunt minus constanti, modo enim 2., aut 3. interdum plures observantur, & cum jam a ventriculo irreperint, ramusculis inter mediis, anastomoses invicem per sæpe ineunt, ubi varices non raro vidimus in Lienosis, tum ipsis aliquando, etiam nonnulli rami adjunguntur a succenturiatis, exiguis globulis, colore, atque structura parvos emulantibus Lienes, qui in interiori lienis facie circum ejusdem sulcum per sæpe occurrunt.

mox in serpentis modum, aliquomodo inflexus, per inferiorem, posterioremque pancreatis limbum transcurrit, usque ad posteriorem Duodeni partem (a) ubi in maximum venæ portarum ramum evadit, atque cum vena mesenterica superiore conjungitur: per hoc iter, venofos pancreatis furculos excipit; atque a sinistro, majorique ventriculi arcu Gastrica, vel Gastro-epiploica sinistra; nam hæc ab Omento, quod a Ventriculo pendet, ramulos quoque excipit, descendens, inita cum Gastrica dextra luculenta anastomosi, in splenicam non valde longe a duodeno aperitur, & quoque ex eadem ferme parte, sed sinisterius, venam ab Omento ascendentem recipit, *Epiploicam* sinistram dictam,

(§. VIII.)

A superiore autem ventriculi orificio (*cardia*) vena sat insignis per minorem, anterioremque ventriculi arcum transcurrit, usque ad pylorum, minoris omenti venulas per iter excipiens, acceptaque illic majori vena, desuper extremam ventriculi partem convolvitur, aperiturque etiam in splenicam venam, alias in *mesentericam*, aut truncum ipsum venæ portarum; atque præterea ab intestino *colo*, transverse per ejus mesenterii aream *colicæ* venæ dictæ confluunt, quarum aliquæ cum alterutra, aut etiam utraque gastrica vena, inita anastomosi, *Gastro colicæ* vocantur; Quo tandem loco summum pancreatis caput duodeno adnectitur, cum splenica angulum magis, aut minus acutum facit adjecta major mesenterica vena, in quam mox confluit, a media intestini duodeni parte vena *duodenalis* dicta, & mox alia ab adcumbente illic intestini coli segmento, ideo *colica*, cui ex latere sinistro alia subsequitur, in duos ramos divisa, quorum superior a ventriculo, & proximior omenti parte ramos excipit, & *Gastrica*, vel

Ga-

(a) Non raro in pancreatis substantiam per aliquod spatium hanc venam traductam observavimus, eaque non prodibat, prius quam ad ejus summum caput pervenisset; semper vero sulcus in eo pancreatis limbo observatur, per quem hæc vena

transcurrit. Hinc in cadavere cui splenica vena in scirroso pancreate erat intercepta, splen in mire ingentem molem excreverat, nec tamen scirrosam: vid. a Mekren, Tulpii observationes &c.

Gastro-Epiploica dextra vocatur, quæ memorata anastomosi Gastricæ finistræ adnectitur, & cum Epiploica ejusdem lateris, pluribus quoque anastomosibus adjuncta, desuper omentum elegantissimos meandros, & plexus, aut polygonas areas comparat, & hæc aliquando etiam in maximum venæ portarum truncum implantatur; ex dextro adhuc latere venam aliam *colicam* habet, tum a ventriculo, atque omento ramusculos excipientem, quos ideo *Gastro-Epiplo-colicos* nominant, quibus etiam ab intestino *cæco*, *cæcalis* ramusculus adjungitur, atque tandem a mesereo alii, atque alii prodeunt rami, qui ex ordine in *mesentericam*, ex dextro latere jam incurvatam terminantur. Eorumque implexus semicirculares desuper mesenterium videri possunt apud Eustachium (a), & Bianchum (b), & desuper intestina divisiones summæ, & minimæ apud Ruyschium (c), & Albinum (d).

(§. IX.)

A sinistra tandem, & ima intestini recti parte, *Meseraica* alia parva, quam *Hemorroidalem* internam vocant exsurgit, quæ primum, circum internam podicis partem, ramusculos advolvitur, cum *Hemorroidali* externa per *anastomosis* adjunctos (e), atque illic, non solum vario modo implexi sunt hi rami, verum etiam in folliculos inæquales, hic, illic, per sæpe elevati, inde vero hæc vena sinistro intestini recti lateri adcumbens, a quo in *rhombos* vasa implexa recipit, ad hypocondrium sinistrum pervenit, ubi per sinistram *mesocoli* alam, rami ab intestino *colo* obtinet, atque tandem per dextram

ejus-

(a) Figg. Tab. cit.

(b) Fig. Tab. cit.

(c) Thesaur. Anat. 10. Tab. 3.

(d) Opuscul. de vas. Intestinor., & Icon.

(e) Vid. Saltzman. Dissert. de vena portarum, §. 26., ejusque Cognatus Albertus Nicolai op. cit. l. c. Nos vero & adjunctam vidimus peculiaribus ramusculis, per latus, infernamq; partem vesicæ *urinariae* repentibus, cum vena a *Pene* ad *Prestatam* glandulam

per superiorem arcum musculorum obturantium femoris producta. Imo quum aliquando in sinus Santorini, qui circum prostatam glandulam describuntur inquireremus, inextricabilem quoque venæ Hemorroidalis utriusq; cum iisdem sinibus plexum observabamus. A vesiculis quoque *seminali- bus* in Hemorroidalem internam venam ramusculi venosi, breves, at sat ampli accedunt.

ejusdem intestini partem, unico trunco in *mesentericam*, aliquando in *splenicam*, alias in angulum, quem ex venæ se se adjungendo præstant, aperitur, accepta etiam illic vena *duodenali* inferiore; quod vero præcipuum, cum vena, quam *colicam* nominabamus, cum *Gastro-Epiploica* sinistra, & proximior *Epiploica* anastomoses quoque init, atque magis inferne, cum *spermatica* quoque ejusdem lateris vena, ramulos adjunxisse, aliquando vidimus, qui præcipue in Homine nephritide denato elegantissime apparebant (a). Sthalius (b) quoque ab utero in Mulieribus, in *hemorroidalem* internam venam, propterea in portarum venam, non paucos furculos deferri scripsit, quos tamen nondum videre potuimus, atque ita sæpe est, quando Theoretici Scriptores, ad suæ Theoriæ ideam, Humani corporis fabricam sine anatome accommodant.

(S. X.)

Sub *pancreatis* capite ab adjunctis utrisque venis mesentericis, & splenica vena (c) unicum vas conficitur, quod non nihil oblique adscendendo, in memoratam Hepatis foveam (§. III.) adpellit; hoc itinere quatuor transversos digitos, ut plurimum æquans; Quam proxime autem ad finem Hepatis ab latere externo, & inferiore, venas, quæ a *cystide fellea* exlurgunt, excipit, cum jam in unicum truncum coalverint, etfi

(a) Non semel in Hominibus *Cecalem* quamdam venam inferiorem, quæ subter laterali ejusdem lateris intestinorum ligamento, quod a peritonæo est, in Hypochondrium repebat, ramusculis retro flexis, aut etiam versus lombarem regionem descendentibus, cum adscendente vena *spermatica* anastomosim iniisse elegantissimam observavi.

[b] Differt. de vena Portarum majorum Porta, ubi quidem nullam observationem anatomicam adtulit.

[c] De amplitudine venæ *mesentericæ* majoris, & *splenicæ* disputant inter se Anatomici. Cl. Bianchi fig. cit. Tab. cit. *Splenicam* minorem fecit. Lau-

datus autem Nicolai l. c. *Splenicam* ordinario ampliore deprehendisse, ac *mesentericam*, imo triplo, est ne nimium! eandem capaciorem existere scripsit, & consentientem pene habet Eustachium fig. cit. Nos vero ad unam, alteramve observationem rite habitis mensuris ex metodo Nichols, & Keil, *mesentericam* majorem reperiebamus; aliquando :: 327 : 316., alias solummodo :: 327 : 309. Interdum *mesentericam* etiam insigniter minorem observabamus, sed quid mirum, quod modo una, modo altera major sit, si modo in unam, modo in alteram plures adfluent rami. Vid. superior. §os.

etsi aliquando, & ad portas gemellæ perveniant; ab intestino etiam duodeno, vena alia, *duodenalis* ideo dicta ascendit ad maximum venæ portarum truncum, cui & alia adjungitur a *pancreatis* summa parte, eaque, quam parvum *pancreas* dicunt, per exteriorem ejusdem superficiem exorta. Quas autem interdum excipiat, ex tribus posterioribus paragraphis videre est (a) quando vero ad majorem Hepatis foveam pervenerit, ad angulum maxime obtusum, aut pene rectum, in transversum truncum aptatur, seu finditur in duos magnos ramos (b) trunco tamen minores, quorum sinister, minori ideo lobo propior, longior fere semper est, in alterius lobi substantiam, altero mox penetrante; Sinum quam plures Anatomici ad hanc divisionem effinxerunt, qui tamen nullus est, namque nullo pacto illic hæc vena alveum majorem habet.

(§. XI.)

Quilibet horumce ramorum, cum sibi proprium visceris, lobum penetraverit, in alios minores, quatuor, quinque, primum dividitur, atque hinc in alios, atque alios adhuc minores, & minimos, per omnem visceris differentiam pro-

(a) Aliquando reperiuntur rami venarum a portæ trunco per Hepar disseminati, qui ab extremo apice sinistrae fibræ (lobi) ex hoc viscere egrediuntur, & per ligamentum, quo in illo latere Hepar aliquando septo transverso jungitur repentes, atque ipsi septo communicati descendunt per posteriora ad dorsum usque, ibique junguntur sub pancreo, cum quibusdam aliis venis ab eodem portarum trunco extra Hepar obortis adde, quod aliquando ab eadem fibræ extrema sinistri lateris egressi per ligamentum quoddam intermedium in lienem declinant, atque per ejus substantiam disseminantur, veluti faciunt illi, qui a vena caudicis per mesenterium ducti in eundem lienem inferuntur. Gabriel. Fallopius obser. Anat. ad Petr. Mannam contra Vesal. ex edit. Boerh., & Alb. Harum autem

ductos, observat. primam aliquando contingere, experientia edocti sumus, imo aliquando, cum hujusmodi, Fallopii venam primam ad dorsum inquireremus, illic per laterales quosdam ramusculos una cum vena azygos desuper emulgentes venas exoriente, anastomosi adjungi, satis bene observabamus. Not. porro, quod sub peritonæo repit. Alteram Fallopii observationem tum summa diligentia ex cadaveribus Humanis nunquam confirmare potuimus. Semel autem in Fele quidpiam hujusmodi videbatur.

(b) Id perpetuum observavimus; quam ideo male Eustachius cit. Tab. figg. 1. 2., & 4. hanc venam in tres ramos per iecoris substantiam dispersos, aut disperdendos delineat divisam? Non semel longiorem ramum, altero minorem observavimus.

ductos, adeoque multiplices, ut ex optima hujusce visceris fusi glutinis injectione, particula nulla sit grano sabuli major, quæ microscopio lustrata, innumerabilibus vasculis obfita, non appareat, quemadmodum ex Ruyschianis præparationibus vidisse asseverat Boerhavius Testis ingenuus, & fide dignissimus, sed de his plura ad finem dissertationis.

(§. XII.)

In Foetu ab *umbilico* vena *umbilicalis* dicta, quæ a *Placenta* in utero exoritur, retrorsum ascendit, & propriam hepatis fissuram (§. I., & III.) subiens, in parte sinistra sinus *venæ portarum* inde aperitur, cum eo sinu aliquo modo inflexa, & angulum antrorsum fere obversum præstans. Cl. Heisterus, *umbilicalem* venam, quæ quidem simplex, & uniformis ab *umbilico* ad Hepar fertur, in propria quoque Hepatis fissura ramos jecori dare nullos contendit, & Verhejennum secus opinantem acriter redarguit, aliique eos, qui ramos *venæ umbilicali*, ex ea etiam parte adscribunt, errasse quam maxime asseverant (a); Verum præter quam quod non contemnenda sint de hisce *venæ umbilicalis* ramusculis Spigelii (b) Cæsserii (c) Riolani (d) Arantii (e) Kobokeni (f) ex Veteribus testimonia, tum ex Recentibus, quæ habemus a Har- dero (g) Cheseldenno (h) Lemery Filio (i) Monroo (l), & Hallero (*) eos quisque apud nos videre potest. Quid! Cl. Trevv, qui eos ante *venam portarum* negaverat, citra ipsam negare non audet; at quis etiam non videt, illos potius, quam istos in ejusdem iconibus repræsentari? (m) Reticenda quoque non est Cl. Ruyschii observatio de vena *umbilicali* in

C

vitulo

(a) Ephem. Nat. curios. cent. v., & VI.

(b) Corp. human. Fabr. pag. 11.

(c) Fig. 1. Tab. ad lib. VIII. Spigelii.

[d] De Foetu p. 377.

[e] De Foetu pag. 40.

(f) Secund. Vitul. Fig. 27. adde Eustachium Fig. 11. Tab. 10. & Fig. 1. Tab. 17.

(g) In Apiar. num. 8.

(h) Anat. Corpor. Humani Tab. 24.

(i) Acad. Parisiens. an. 1739.

(l) Societ. Edimburg. Tom. 4. pag. 82. ad explic. icon. de Intestin. duoden.

(*) Descript. Foet. Bicipit. p. 8. ad Eustach. Tab. 10. Fig. 11. Edit. Rom.

(m) De Differentiis inter Hominem natum, & non natum. Fig. 22. 23. 29.

vitulo duplici, quarum altera multo tenuior portæ propago non erat, seu in venæ portarum, ut ajant sinum ex directo non mittebatur, ast in dextra Hepatis parte ramulos plurimos ubique distribuerat, qui cum cæteris portæ extremitatibus uniebantur per anastomoses. (a) Cæterum umbilicalis vena in Foetu, sat insignis est, ut cavæ venæ quasi comparari possit, dum ab utrifque

§5. §6. 74., &c. Blasius in Anatom. Animal. pag. 112, ex Drelincurtio venam *umbilicalem* describit in simia, fœmina, furculos in peritonæum recto musculo substratum immittentem. Ego porro in *Rana*, venam vidi a *pelvis* cavitate duplici ramusculo prodeuntem, quæ inde simplex sub peritonæo per abdominis altitudinem progrediretur, donec per ligamentum Hepatis *falciforme* ad Hepatis portas per lorum fissuras pertingeret, illicque non solum in sinum jecoris faciem ramusculos exporrigebat, verum etiam ad proximum ventriculum, omentum, intestinum, &c.

Mense Augusti an. 1748. Quum in Theatro Anatomico Taurinensi, Monstri Bicipitis, cui simplex, & communis erat infimus venter, publica Anatomes institueretur, Hepar, quemadmodum, & reliquæ partes per spectatorum turbam circumferebatur; Illud autem erat sat ingens, sexque habebat lobos, atque vena *umbilicalis*, ab umbilico simplex, priusquam in intimam visceris substantiam penetraret, in duos primum ramos dividebatur, hinc in plures alios minores, neque ex directo in *portarum* venam aperiiebatur, sed in visceris substantiam, nullo tunc spectabili fine, omnino ramosa terminabat. Duas venas *umbilicales*, forte quemadmodum ex Ruyschiani vituli invenit Riolanus de monstr. nat. Lutet. Ex Foetu deformi Cl. Petit, Acad. Scient. an. 1726. venam *umbilicalem* observavit, desuper convexam Hepatis faciem, in venam *cavam* dum *diaphragma* jam esset penetratura aper-

tam, & pene idem describit ex avibus Gualter Needham. Dis. Anat. de Foet. format. cap. de vas. umbil. simplex erat vena *umbilicalis* in Foetu Bicornio Mazuchelli ad Valisner. Epist. an. 1719. eaque ex media, interiorique Hepatis regione, unico, & recto trunco in venam *cavam* continuabatur, per hanc semitam *respondentis venæ portarum ramos duplicans*. In quodam monstroso Foetu vena *umbilicalis* ex inguine sinistro in abdominis cavum ingrediebatur, hinc per latus ejusdem cavitatis dextrum desuper musculus *Psoas* progrediens, ad ultimam dorli *vertebram*, per *diaphragma* in pectoris cavitatem progressa, in *cavam* descendentem venam aperiiebatur (Littre Acad. Royal. 1709.) Per hunc ascensum *umbilicalis* vena *Iliacas*, *Lumbares*, *Emulgentes*, *Renunculi*, *Diaphragmatis* venas excipiebat.

Ex septem vitulis, quos uno, eodemque die aperiiebamus, in tribus vasa nonnulla *omphalo-mesenterica* tenuissima, in venam *umbilicalem* retro umbilicum implantari observabamus. Cæterum, adnotandum proponimus, proprios venæ *umbilicalis* ramusculos per Hepatis substantiam ita terminari, ut in *acinosam* penitus intromitti non videantur, repunt veluti inter ejusdem substantiæ loculamenta, ejusque superficiem exornant, non admodum implexi, plane directi, non multum ramosi. Perpetuo autem visum maximum truncum hujusce venæ, in *portarum* venam continuari, in quo erant plures Anatomici.

(a) observat. 7. Cap. 4.

que multum decedit *venæ portarum* Hepar ingredientis amplitudo. Non nulli *venæ portarum*, & *umbilicalis* amplitudinum rationes faciunt :: 400: 729; modo etiam quemadmodum :: 400: 900 (a), & quidem laudatus Trevv utrisque eas adsignavit diametros, quæ memoratis rationibus respondeant (b) præter hanc amplitudinem, qua insignis est *umbilicalis* vena, tunicarum quoque crassitie, præ reliquis Humani corporis venis insignitam in Foetu reperimus.

(§. XIII.)

Citra finem *venæ portarum*, fere ex eadem *venæ*, *umbilicalis* linea, aliquando extra eandem, in sulco jecoris proprio (§. 111.) propius internum minimi lobi latus per extimam Hepatis carnem ductus in Foetu conspicuus est, quem *canalem venosum* vocant; ut plurimum non nihil oblique jacet, non nihil incurvus aliquando est, aperiturque in venam *cavam*, posteriori jecoris parti adnexam, quam proxime *diaphragmati*, ubi hujus rami ex jecore accedunt (c), hic tubus in maxima ratione minor est vena *umbilicali*; ad eam enim se habet :: 196, vel 121: 900, vel 729. Ad finem vero *venæ portarum* ratio persæpe est :: 121: 400, atque Ridleyus (d) quartæ parti illius sinus æqualem facit.

(§. XIV.)

Non nulli ad ostium *venæ umbilicalis*, ubi committitur cum *finu*, ut ajunt *venæ portarum*, & ad initium, finemque ductus *venosi*, valvulam adjectam esse scribunt (defunt enim per reliquas horumce ductuum partes, dum de vena *umbilicali* eam solum partem consideramus, quæ ab umbilico desumitur). Vidimus quidem ex utroque ductu commissorum vasorum oras aliquomodo protrahi, valvulam vero non di-

C 2

ce-

(a) Consul. Præstantissimi Anatomici Alberti Haller not. ad fin. Tract. de concep. Tom. 4. Inst. Boeth. Edit. Taur.

[b] Passim in fig. 1. 2. 4., & 5. Tabb. op. cit.

(c) Canalem *venosum* proximioribus Hepaticis Apophysibus furculos impertiri non semel observavimus. Duplicem invenerant. Kulmus, & Salzmännus.

[d] Observ. Anat. Pract. pag. 200.

ceremus, vix rugam, & iis parum tribuit Trevv (a) Nato inde Foetu modo citius, modo magis fero utraque nunc descripta vasa occluduntur, & ferme exarescunt; Cl. autem Haller, in adulto ductum *venosum* semel apertum vidit (b), quod omnino rarissimum, non ita porro de vena.

(§. XV.)

Cum ramusculis quantumvis minimis venæ portarum, ramusculi alii, quantumvis etiam minimi, & pene dicam numero infiniti copulantur, & adcumbunt, quos *Biliarios* vocant, propterea quod bilem devehant, qua propter interius lutei coloris sint; Hi ab Hepate egredientes, magis, magisque crassi, & ampliores evadunt, & numero minores, ita ut quando Hepatis portis proximi fuerint, pene totidem evadant, ac venæ *portarum* Hepaticæ adjuncti rami, quibus perpetuo adjacent, & illic magnitudine, calamo columbino, plus, minus æquantur; indeque extra Hepatis *portas*, primum in duos majores ramos, quorum dexter alius, alius sinisterior, latus semper legunt venæ, portarum, tandemque in unicum truncum majorem evadunt, qui Hepaticus *porus*, seu ductus dicitur (c). In eo postremorum horumce ductuum confluxu, plures Anatomici transversam quamdam amplitudinem, quam *sinum* nominarunt, descripserunt, quæ tamen tam raro reperitur, ut ab ortu factam non esse cum Cl. Morgagnio existimaverim. Horumce ductuum interior facies villosa est, & fere reticularis, magis vero in majoribus ductibus, ut inferius describemus, primum enim, ut vesicula fellea describatur operæ, pretium esse videtur.

(§. XVI.)

In propria itaque Hepatis fovea lobi dextri (§. I.) Sacculus membranaceus, figura pyriformis residet, quem *Vesiculam*;

(a) L. c., & in Commer. Norimberg.

(b) Omnium primus clauditur canalis *venosus*, imo dicam disparet omnino, ut neque vestigium in adultis videatur. Garengcotos vero tom. 1. Splanchn. Tab 9. venæ *umbilicali* om-

nino æqualem facit vix minorem Heister l. cit., alique Anatomici, tum in adultis, quod omnino falsum.

(c) Consul. Hist. Hep. Tab. 2. 4. 5., & 8.

culam; *Folliculum*, aut *Cystin Felleam* nominant; fundo suo non nihil angustiore, Hepatis oram, quæ & illic lunatam aliquando incisionem habet; per sæpe excedit; hinc in ampliore ventrem evadit, qui sensim, sine sensu imminuitur, ut pyri conum, seu vesiculæ cervicem comparet, illicque in gracilem meatum contrahitur, quem *cysticum* ductum nominant; quum vero Hepatis crassities ab extrema ora, versus *portas* major sit, hinc est, quod vesiculæ fundus, in erecto Homine anterior sit, & leviter inferior, cervix vero posterior, & paullulum superior, seu ascendenti plano inclinato adjecta. Illic, ubi cervix in ductum evadit, in posteriore parte, seu ea, quæ ab Hepate libera est, sinulum habet, quem Jassolinus (a), & Bauhinus (b) ante Ruyschium (c), & Heisterum (d), verbis, & iconibus exhibuerunt, qui vero etsi sæpe adsit, perpetuus tamen non est.

(§. XVII.)

Membranam exterioriorem habet vesicula Fellea ab Hepatis tunica, quæ porro deficit, ubi Hepati ipsa adjacet; ejusque interior cellulosa structura, pinguedine per sæpe farcta est, ad fundum præcipue, & collum; Inter mediam autem tunicam habet texturæ sat firmæ, quam nerveam dicunt, cui exterius a cervice radiosi carnei penicilli per longitudinem adponuntur, quorum vix ulli in obliquum producuntur, transversi vero nulli sunt, nulli circulares. Interior inde vesiculæ facies villosa est, atque reticulata, eamque nonnulli crustam villosam cum Piccolhomineo (e) appellant. Ruyschius ita inæqualem, & reticulatam vesiculæ faciem, non inepte comparari posse, ait, cum superficie mellonis reticulati (f); dicerem potius cum quibusdam holosericis pannis ex altera parte villosis, & adin-

(a) De Poris Cholidocis Cap. 5.

(b) Theat. Anat. lib. 1. Cap. 45., & Tab. 38.

(c) Epist. Problem. Anatomica 5. Tab. 5.

(d) E. N. C. Cent. 6. observat 28., atque etiam in compendio Anatomico,

(e) Prelect. Anat. p. 130.

(f) L. c. fig. 3., hunc reticulum etiam exhibent Bianchianæ figg. Tab. 5, fig. 1., & 2., & quidem per belle reticuli areas, quemadmodum villosa laudata Ruyschii figura.

adinſtar telæ Damascenæ ad angulares quæcumque areas im-
preſſis; ſecundis porro curis, ſuperſtratum tenuvium filorum
reticulum eſſe ſentiebam, utpote calami apice facile ſepara-
retur, tenuvium inde filorum humillimo muſco areolas occu-
pante.

(§. XVIII.)

Ductus a cyſtide productus, exigui calami anſerini am-
plitudinem, magis, vel minus æquat, & cum ſuperius me-
morato ductu Hepatico coit, qui mox a veſicula exſurgens,
imo jam ipſe folliculi collus, tamquam in plicam, aliquan-
do re vera duplicem adigitur, aut inflectitur eo modo, ut
collo anſerino inflexo a nonnullis comparetur (*a*); Quum pri-
mum ita inflexus fuerit cyſticus ductus, hinc ad latus du-
ctus Hepatici continuatur, eique ad parallelam ita ex latere
adcumbit, ut cum ipſo angulum ullum, tum in eo loco, in
quo adjunguntur, præſtare non videantur (*b*). Quando hic
ductus; deſuper maximum venæ, portarum truncum deſcen-
dendo, trium tranſverſorum digitorum ſpatium compleverit,
cum Hepatico ductu tandem coit, ſeu potius in alterum
ductum majorem Choledocum dictum continuatur, uſque ad
intestinum duodenum, per ſemitam ductum Hepaticum re-
cipiens, tamquam fiſtulæ ex uno latere, in obliquum ex-
ciſæ, adjectam alteram fiſtulæ oram; Cyſticus ductus Hepa-
tico paullo minor eſt, & rite obſervatus anguſtior quoque
videtur, quo fini propior. Ab his continuatus choledocus
ductus, pone primum duodeni arcum deſcendit, ſubitque
pancreatis poſterioreſſimam partem illi intestino adnexam, infe-
riturque poſteriori faciei mediæ, ſecundæ partis duodeni,
&

(*a*) Cyſtis felleæ cervix prope por-
tas quaſi duplicata reflectitur. Fallop.
l. c. vid. Maur. a Reverhoſium Tab.
ad Diſſert. de circulo Bilis, itemque
Garengeot Tab. 10. Splanchnologiæ.

[*b*] Vvinslovv. Trait du Bas ventre
§. 103. Acutiſſimum hujusmodi concur-

ſus angulum, jam obſervaverant Bau-
hinus op. cit. Vidiuſ Vidiuſ, Fallo-
pium undique reſcribens Tab. 64. Vid.
Bianchi Progymnaſma de jecoris,
ejuſque ligamentorum fabrica, uſibuſ-
que §. 6., & 7.

& obliquo ductu ejus tunicas penetrando, in ejusdem cavum aperitur (a).

(§. XIX.)

Villosæ, aut reticulatæ cystidis felleæ tunicæ, itemque duodenum Hepaticorum majorum, cystici ductus, & cholidoci, glandulæ, subrotundæ, miliares substernuntur, quas in *vesicula suilla*, & *ovilla post diutinos labores* detexit Malpighius (b) in Homine inde Ruyschius [c], at admodum exiguas (d).
Sparsæ

(a) Osculo oblungo, superius arcuato, inferius acuto, adinstar Dentiscalpri Vvinslovv p. 533. Edit. Paris. in IV., quam ut plurimum adinstar fessuræ oblongæ ani corrugatam observavimus, circumductis Peyerii villis, qui porro ad aliquam distantiam rugosi producantur, & sensim inde evanescent, eosque frenula, aut ligamenta appellavit Santorinus observat. Anat. cap. 9. Sat bene expressam carunculam non vidimus, quam *papillarem eminentiam* vocat Blancardus cap. 23. part. 2. Anat. Reformat., aut *laxam quamdam membranofam eminentiam* Munikf. Anat. Nov. p. 44., vel *duas membranulas, utrinque ad orificii latus laxè propendentes*, quas describit Vesalius l. 5. c. 8. Nonnulli vero scribunt, illic *intimas intestini tunicas corrugari, implicarique in modum valvulæ deorsum pendentes, & clitoridis præputium quodam modo referentis*. Memoratas autem rugas adeo satis laxas, ut hanc comparisonem admitterent, vix in uno homine dissenteria denato vidimus. Joannes Murlatus Epist. 5. ad Peyerum, circum hoc orificium in Bove, *plexus duos glandulosos* notavit, *longitudine pollicem æquantes*, qui quidem minores in Homine occurrunt. Cum Choledoco ductu, aliquando etiam *pancreaticus* aperitur, unius vero osculum ab alterius osculo per dimidiam unciam distitum vidit Brunnerus Exper. Nov. Pancreat. ad minorem distantiam, alii semper vero aliquam

idem Brunnerus, quod omnino falsum in Homine. Ductum *cholidocum* duplicem in intestinum *duodenum* describit Fallopius l. c., eorum alterum in ventriculum Vesalius ex Pontificis triumvirum Remige lib. 5. cap. 8. pag. 436. Edit. Boerh., & Albin.

Abraham Vaterus Dissert. de *Diverticulo bilis*, amplitudinem quamdam eo in loco, ubi hæc vasa in intestinum *duodenum* aperiuntur describit, Vid. Kulm. Tab. Anat., nec quidem aliud esse videtur *sinus novus* in hac parte a Bartholino descriptus pag. 79. Anat. Reformat. perpetuus Brunnero l. c., non perpetuus ipsi Vatero l. c., & solum in Ascite visus a Peyero Parerg. 5., atque numquam a nobis bene perspectus; Vidimus quidem aliquando Choledocum ductum versus inferiorem *duodeni* partem flexuosum, & per intestini tunicas ad aliquam longitudinem serpentem; Interdum vero hujusmodi ductum, quo propius ad intestinum accederet amplificari, & aliquomodo pelviformem evadere observabamus, in eamque pelviformem *cholidoci* ductus amplitudinem, *pancreaticum* aperiri constabat, in ipso autem intestino nihil hujusmodi.

(b) De lien. cap. 6. Barthol. de Diaphragm. cap. 11.

(c) Epist. cit. Tab. cit.

(d) In nimium turgente, & obstructa *vesica lenticulares* vidit Santorinus l. c.

Sparſæ hic, illic ſunt, & ſolitariæ (a) itemque per ſæpe duriuſculæ (b), atque non ſemel harumce glandularum oſcula nudo vidimus oculo, detinendo in limpida aqua veſiculas, prius bene expurgatas a bilis fūco.

(§. XX.)

In extrema parte cervicis veſiculæ ſpecialem annulum membranæ, interius inſtar pylori circumquaque eminentem; tamquam ſphincterem deſcribit Gliffonius, at quidem immerito muſculoſum, nam in plicam planam, & tenuiſſimam evadit in exſiccatis veſiculis, ſine ullis bene conſpicuis muſculoſis fibris, imo ille annulus ita humilis per ſæpe eſt, ut pene nullus videatur, aut vix ruga ſuſum verſa. Præter reticulum, veſiculæ reticulo pene ſimilem, aut craſſiorem, inſignes quoque rugæ, ſeu valvulæ, vario modo productæ, & implexæ occurrunt in Hepatico ductu majori, itemque per aliquod ſpatium in choledoco, ſed præcipue in cyſtico ductu. Hæ factæ ſunt ab contracta, corrugataque mirabilem in modum interiore tunica, ex iſſque plicis aliæ, plus minus obliquæ ſunt, tranſverſæ nonnullæ, tum etiam alternis angulis ita invicem ſecantur in cyſtico præcipue ductu, ut in cochleæ modum implexæ aliquo modo appareant numero, & perſpicuitatis gradu, ut plurimum variæ (c) Cl. Segerus

(a) Majores ut plurimum obſervavimus ad cyſtidis cervicem; tum recordamur aliquando earum racemulos illic vidiffe poſt longam macerationem. Fatemur tamen aliquando omnino deſiderari, eſſi ſumma diligentia in bene præparata veſica tum microſcopii ope perquirantur, aut etiam diu in aqua contineatur veſica.

[b] Aliquando etiam molles, & preſſioni cedentes occurrunt, & forte huiusmodi vidit Vvinslov, qui lacunas potius, quam glandulas vocat. Trait. du bas ventre §. 296. Vid. Bianch. Tab. 5., & 7. SKirroſas vidimus in aliquibus Bobus, quos per proximè clapſam peſtem aperiebamus, imo earum racemum durum, & obſtructio-

ne turgidum in quadam vaſca invenimus, ob quem certe ita obſtrueretur cyſtidis collus, ut in cyſticum ductum bilis deſluere non poſſet, hinc cyſtis, bile maxime turgebat, iſtiusque focus ad proximiores partes ultra naturæ ordinem intenus, atque perſuſus videbatur.

(c) Vid. Ruysch l. c. Heiſt. l. c. Bianch. ll. cc. Malpighius vero eaſdem quoque recensuerat cap. de Hepate, itemque Caldeſius ad cochleæ modum (*accartociate*) delineaverat fig. 10. Tab. 2. offervaz. Anatomiche intorno alle Tartarughe pag. 40., quæ quidem ad naturæ normam mihi elegantiffimæ videbatur.

eas rugas in cystico ductu a ligamento proprio fieri describit (a), quod ex fibris, an carneis? Vesiculæ collectum producat per meatum *cysticum*, & eum ea ratione contrahat, uti *colon* intestinum stringunt, tria ejusdem longitudinalia ligamenta, & idem pene etiam descripserat Riolanus (b). Noverant enim has valvulas ex aliis Veteribus, præcipue Spigelius (c), & Bauhinus (d). Per ductum tandem *cysticum*, itemque per *Hepaticum*, tum non nihil etiam in *choledoco* foraminula plurima observantur, quibus nullæ certe respondent glandulæ, atque omnino in fundo cæcæ videntur. Id quidem præmonstrante Caldesio l. c.

(§. XXI.)

Ab interioribus, aut majori proximis ductibus *Hepaticis*, vel etiam ab ipso ductu *Hepatico*, mox ab Hepate egrediente, canaliculi admodum tenues prodeunt, qui per Hepatis substantiam ad vesiculam properant, in eamque aperiuntur, eum ad modum, quo inferius dicemus. Hos ex Anatomiae Proceribus Cl. Cl. Viri Vesalius (e), Jafolinus (f), Bauhinus (g), Spigelius (h), Bartholinus Thomas (i), aliique affabre descripserunt, aut etiam iconibus illustrarunt. Hinc nescio, quo fato, neglecti jacuere, donec Amstelodamense Medicorum Collegium (l) Blasius (m), & Eruditorum Lipsiæ

D

Ano-

[a] Dissert. de motu bilis cysticæ pag. 10.

[b] Antropograph. pag. mihi 132. Collum habet iste folliculus, in quo dominantur fila longitudinalia propter attractionem fortem Anat. vivor. libr., qui Galeno tribuitur.

De cætero flexiones ductus cystici, quas superius memorabamus [§. 17.] tamquam nervosis, fibrosis, aut membranaceis quibuscumque aliis retinaculis præstari constat, utpote iisdem dissectis, eas flexiones omnino aboleri videamus Tum etiam iis dissectis nonnulla adhuc frenula observantur, quæ ductui cystico adnexa eundem con-

rugant, quemadmodum a propriis implexis frenulis ductus *sperma deferens*.

(c) Human. corpor. Fabric. p. 278.

[d] L. c.

[e] Icon. ad lib. cit., & cap. citat. 13.

(f) In figur. ad opuscul. cit.

(g) Ibidem.

(h) Cap. 13. lib. 8. op. cit. Nihil porro habent hujusmodi Casserii Icones, quæ tamen Spigelianas demonstrationes insequuntur.

(i) Cap. 15. lib. 1. Anat. Reformat.

[l] Vid. Manget. Bib. Anat. T. 1.

(m) In Anat. Veslingii.

Anonymus (a) eos exprimentis, & observationibus vindicarunt, & extra dubium posuere; Hinc Glissonius (b), Blanchardus (c), Bohnius (d), Molinetus (e), Muniks (f), Dionisius (g), Caldesius (h), Verheyennus (i), Cheseldennus (l), Palfynus (m), Bidloo (n), Noguez (o), Theychmeyerus (p), Senacius (q), aliique plures, quos figillatim recensere nimis longum esset, eisdem suis in scriptis non prætermiserunt; Cl. inde Bianchi in Hist. Hepat. 2. edit. eisdem peculiari diligentia pertractasse videtur: Videamus jam ergo an re vera demonstrari possint.

(§. XXII.)

Riolanus hoc habet experimentum. *Intrusa fistula, sunt ejus ipsissima verba, in canalem biliarium Hepaticum juxta Hepar, ab insuflato spiritu, potius intestinum, quam vesicula distenditur, vicissimque cum per alterum hujus canalis extremum, prope intestinum idem præstatur, pars opposita, & vesicula intumescit, compressaque vesicula, spiritus portio, in Hepar confluit gargalismum excitans; hinc exiles fibrillas esse dixerat, per quas vesica suam traheret bilem (r).* Cl. Segerus impulsam in vesiculam flatum, & per duodenum, & per ductus Hepaticos effluxisse narrat, alii vero addunt aquam quoque, vel urinam, idemque Verheyennus evenire adfirmat, tum *ligato for-*

[a] Vid. ejusd. Acad. an. 1682. pag. 20.

[b] Op. cit.

[c] Oper. cit. pag. 52. part. 2.

[d] Circul. Anat. Progym. 13.

[e] Lib. 6. cap. 5. Dissert. Anat. Patolog.

[f] Op. cit. pag. 52.

[g] Demonstr. Anat. 3. pag. mih. 192.

[h] Osserv. Anat. intorno le Tartarughe.

[i] Tractat. 2. cap. 17.

[l] Anatom. Tab. 18.

[m] Anat. Tom. 1. cap. de Hepate.

[n] Tab. 3 S. Covvperus vero ad eandem Tab. hos ductus negat; In-

Agnino autem jacinore ductus biliosos ab Hepaticis in cysticum ductum productos observavit.

(o) Abreg. d' Anat. p. 163.

(p) In Antropograph.

[q] Essais Physiq. sur l' Anat. D. Heister. Adverte porro ab hisce Auctoribus ex brutis animantibus præcipue hosce ductus describi, etsi in Homini- bus adesse non negent.

(r) Antropograph. lib. 2. pag. 126., & pag. 127. Plura hujusmodi experimenta vid. apud Caldesium oper. cit. pag. 38., &c., quorum testem, ut plurimum habet Celeber. Franciscum Redi.

fortiter meatu cystico. Hæc autem qua ratione contingerent, nisi illis partibus patula interponerentur vasa; atque unde cystica bilis in brutis animantibus, quorum cystis, neque cum Hepatico ductu, neque cum choledoco coit? Ita porro est in Corvo, Gallo, Anate, Tarda, nec quidem quemadmodum Vipera a ductu Hepatico perpendiculariter descendentem cystim felleam habent. Quid autem? Eos vidit in Tigride Blasius (a) in Catopardo Du Vernoy (b) in simia Parisini (c) in urso Trevv (d) in Bove porro plures (e); Cl. autem Malpighius (f) *viam regiam* vocaverat, qua bilis ab Hepate in felleam vesiculam per eos certe ductus devehe-

D 2

retur,

(a) Anat. Animal. Tab. 19. passim. in aliis animalibus Valent. Amphit. Zootmic.

(b) Act. Acad. Petrop. Tom. 1.

(c) Observ. des Animaux dis.

(d) Commerc. Liter. Norimberg. an. 1734.

[e] Vid. Fol. inscriptum *la Mengbina Gobba*. Celebr. Fantonus, cujus auctoritatem plurimum valere credimus eos admittit in HOMINE Diss. 6., ed ult. pag. 249. Ductum cysticum nulla communicatione cum Hepatico per peculiarem aperturam in duodenum insertum viderunt ex Testudine Parisienses. Monlinus in Hist. Anat. Elephantum an. 1681. „ In fine primi in- „ testini ... investigavit ductum com- „ munem, ad jecur, ad videndam ve- „ siculam felleam. Sed illam defuisse „ scribit: ejus loco invenit, porum bi- „ liarium exire a jecore veluti ductum „ Hepaticum; notavit etiam, quod „ bilis illic reperta differret colore, & „ consistentia ab ea, quam invenerat „ in ductu Hepatico.

Hanc Moulini observationem in gratiam ductuum Hepati cysticorum, nonnulli accommodandam offerunt, at Georgius, Christophorus Petrus ab Hartenfelk in Elephantographia curiosa vesiculam felleam non omnino de- siderari in hujusmodi animantibus as-

severat; An Moulinus non satis dili- gens, & industrius fuit, ut exiguum pro tanto animante vesiculam, atque etiam in Hepate immersam, ab eo ductu, forsan cystico, ulterius prosequeretur, id quidem indicat ab eo re- pertæ bilis discrimen. Galenus felleam vesiculam in Elephanto a se Romæ, dissecto observavit.

Inter lobos in aliquibus animantibus vesicula fellea reconditur; omnino autem deesse in Alce scribunt Parisienses, & Londinenses, quod confirmatur a Joanne Friderico, Leopoldo Lubecensi in Descript. Anat. Alcis Basil. an. 1700., in Cerva Volckamerus, A. N. C. An. 6. Parisiens. in Cervo Canadensi, & Cerva è Sardinia. In Tajacu, seu Apro Mexicano Moschifero Eduard. Tyson. Transact. Philosoph. num. 153., neque in Struthione Parisiens. At in horum animantium aliquo proximius ad Hepatis portas majores Hepaticos ductus maxime distentos, inquam *varicosos* invenerunt, bile illic restitante, atque turgente, quod quidem, uti vesiculæ felleæ necessitatem demonstrare videtur, ita & ductuum Hepati-cysticorum; at in ratiocinationibus, atque commentis immorari nolumus.

(f) De Hepat. Structura Cap. 7.

retur, ejusque verba hic describam. *Pennatorum vesiculâ fellea*, altero capite exortum trahit a *Caro Hepatis*, a quo *bilem* recipit, altera autem extremitate oblongum collum promit, quod in *duodenum* inseritur, atque in iisdem *pennatis*, *Biliarius* porrus ab *Hepate* exortus, nullo habito immediato cum *cysti fellea* commercio, ad *intestina* excurrit, ut plurimum supra *colli cystis* insertionem. Adfunt itaque in *Brutis*, & eundem usum in *Homine* præstante *vesica* aberunt? Profecto credat *Judeus Apella*, non ego.

(§. XXIII.)

Quos ipse vidi hujusmodi ductus, non semel autem vidi, simplices ab alterutris *Hepaticis* ductibus prodibant, quemadmodum superius dicebamus; hinc in aliquos minores ramusculos, quorum constans non est numerus, sæpius duos, aut tres divisi, & versus *vesiculam* oblique incedentes, qua parte hæc *jecori* adjecta est, in eam obliquo quoque tramite aperiebantur (a); quam proxime ad ejus *cervicem*, *setamque*, aut *tenue æneum* filum vix admittebant, eorumque osculis, neque extantem *membraneum* circulum, neque *valvulam* vidisse dicam, in partibus enim adeo exiguis perlustrandis non satis *Lynceus* fui. Addam vero *peculiarem* observationem, quæ an ad horumce ductuum negotium facere possit, vobis *dijudicandum* relinquam. In *Nosocomio Divi Joannis* Puella ob *diutinam* *dissenteriam* moriebatur, atque in ejus *cadavere*, invenimus *Hepar* per grande, & ultra *naturæ ordinem* in plures lobos divisum, eorum autem *simæ facies* plurimis obsidebantur *vesiculis acinosis*, & *lutea materia*, inquam bile *farctis*, quarum quæque duos habebat ductus, ingerentem unum, & ab *Hepatis* penitiore *substantia* productum, externum alterum, & egerentem; iique postremi, etsi pro *vesicularum* numero plures essent, ad *senarium* inde numerum, hincque ad unicum ductum, *calami* amplitudinem ex-

ce.

(a) *Amstelodamenses* in *Bove* ad modum *uretherum* hujusmodi ductus aperiri scribunt.

cedentem redacti fuerant, hicque cum Hepatico ductu, qui ex naturæ ordine erat, non uniebatur, prius quam ab intestino duodeno vix per decem lineas distaret (*a*). Desiderabatur porro vesicula fellea. Vestrum modo ferte iudicium: Zambeccarii observatio de perfusa bile desuper intestinum canis, cui coaluerat Hepar, a quo folliculus felleus fuerat dilaceratus, profecto nullius est momenti, si exprimentis constat per Hepatis ligamenta, sub proxima diaphragmatis parte, circum venam cavam jecori proximam, & vesicam felleam biliosos ductus produci, atque serpere, quemadmodum contendit Cl. Ferren (*b*).

(§. XXIV.)

Cl. Gufmannus Galeatus (*c*) cysti-Hepaticos ductus observavisse narrat, qui a glandulis cysticis (§. 18.) enati in Hepar bilem devehunt; Verum etsi a glandulis meatus auditorii liquor habeatur ad bilis naturam accedens, a glandulis tamen cystis felleæ, mucum ex albo subfuscum, nullo pacto biliosum secerni certo certius scimus. Cæterum nostros superius descriptos ductus ab Hepate in vesiculam ingredientes esse iudicamus, ideoque Hepati-cysticos vocandos.

(§. XXV.)

Postremis hisce annis Cl. Lieutaud (*d*) hos ductus refellere nitebatur, propterea quod observaverat inanem vesicam felleam in quodam cadavere, cui in vesiculæ cervice calculus inerat, verum præter quam quod calculus in eo loco confitus esset, in quo ductus Hepati-cystici ex nostris observationibus aperiuntur, unde eorum oscula obstruerentur, præter id, inquam, quot vesiculæ sine hoc impedimento prorsus inanes in cadaveribus quandoque occurrunt? Atque, quo maiore jure pro nostra sententia observationem Blasii de
fol-

(*a*) Pene eandem observationem habet Senac. loc. cit. Sed quælibet vesicula proprio canaliculo in intestinum aperiatur.

(*b*) Acad. Royal. des Scienc. anno 1733.

[*c*] Acad. Bonon. Tom. 2. part. altera pag. 336.

(*d*) Essais Anatomiq. cap. de Hepat.

folliculo felleo, copiosissima bile ita distento, ut per tunicas exsudaret, cum tamen cysticus ductus coaluerat (a) infumere liceret? Atque si admitti potest observatio Cl. Tacconi [b] ab unico parvæ olivæ nucleo tota facile occupari poterat, & erat calculis obstructa vesicula fellea, Hepati-cysticis ductibus sat conspicuis nihilominus pertusa.

(§. XXVI.)

Tandem ne plures de hac re adeo certa paginas impleamus Cl. Verheyennus (c) illum, & naturæ, & veritatis derisorem existimat, qui de viis (seu ductibus), per quas bilis ad vesiculam est translata adhuc disputat, dubitatque; Quatuor enim hujusmodi ductus, occasione lectionum publicarum, Auditoribus, Spectatoribusque demonstrasse addit, distinctis orificiis in vesiculam hiantes, atque per illos ligato meatu cystico flatum immisit in eandem vesiculam. Nos vero tanto convicio, non est cur eos, qui hos ductus negant, si quippiam tamen adhuc sunt irrideamus, nam postquam Garengéotio teste (d) Verdierum hos ductus cera repletos Parisiis demonstrasse scimus; accedente Vvinslovvii auctoritate, quod in Homine re vera præsto sint, quempiam amplius futurum non esse credimus, qui de hac re tantis testimoniis fidem denegare velit; Alioquin si quisque experiens Anatomicus ad observationes diligentissimas accedat, æqua ratio erit, ut suis met sensibus credat.

Qui nisi sint veri ratio quoque falsa sit omnis.

§.

(a) Miscel. Anat. pag. 397. at fucus folliculi bilis, quo proxima coli intestini pars tingitur perpetuus est. Vid. Stuart. in Transact. Philosoph. num. 414.

(b) Vid. ejusdem Epistol. ad Cl. Bianchum script. an. 1720. Histor. Hepat. Tom. 2. pag. 962., itemque ejus observationes de raris quibusdam Hepatis, aliorumque viscerum affectibus pag. 21. 22. Accerrimæ Jani Planci censuræ parum tribuo.

[c] L. c.

(d) Splanc. Tom. 1: p. 296. „at-
„ tamen Verdierus ipse in Epitome
„ Anatomica iterum a se edita mini-
„ me declaravit ejusmodi tubulos per
„ inectionem, aut alio quolibet arti-
„ ficio a se detectos, & publice de-
„ monstratos fuisse (Adnotat Perspi-
„ cacissimus Fantonus p. 251. op. cit. Ac
præter Garengéotium alii prostant Te-
stes oculati.

(§. XXVII.)

A dextro latere arteriæ *Celiacæ*, arteria prodit, calami Scriptorii amplitudinem non omnino æquans, quæ ad Hepar inde progrediens, *Hepatica* vocatur. Hæc non valde longe ab exortus loco, retro ventriculum, arteriolas per sæpe duas emittit, quarum prima, quæ major, dextræ ventriculi parti adtenfa, *Gastrica* vocatur dextra, altera vero minor, & non nihil inferior *pylorica*, propterea quod *pylorum*, & ventriculi partem pyloro proximam ambiat, ex eaque ramus aliquando producit ad intestinum *Duodenum*, quem ideo *Duodenalem* nominant; Truncus inde *Celiacæ Hepaticus*, hisce propaginibus emissis, magis, magisque ad Hepatis portas progrediens, venæ *portarum* maximo ramo adfociatur, eique ante finistram partem adcumbit, in duos, ut plurimum, illic ramos partita, qui sæpe sæpius crassitie dispares sunt, majorque majori Hepatis lobo, retro biliaria vasa prospicit, minori alter minor. Uterque vero priusquam Hepatis substantiam, per maximam ejus foveam penetret, in alios ramos, puta tres, quatuor, & ultra dividitur, qui invicem intersecantur vario, & inconstanti modo, & ab ipsorum alterutro, dum extra Hepar adhuc sunt, ramus emittitur, qui mox bifidus, gemella arteria cystica vocatur, propterea quod duabus arteriolis, utrumque latus vesiculæ, qua parte Hepati adfigitur, percurrat; hæque tantos vesiculæ ramusculos largiuntur, ut aciculæ cuspis extra ipsos applicari non possit, tum etiam penicillos aliquos proximæ Hepatis parti, quæ quidem pene totidem vesiculæ restituit, contribuunt, ut videre est apud Ruyschium [a]. Has arteriolas anatomicorum nonnulli, duplici quidem principio progigni scripserant, quod tamen adeo rarum est, quam quod rarissimum.

(§. XXVIII.)

Memorati arteriæ *Hepaticæ* rami, quando Hepar penetraverint, mirum est, in quot ramos, atque ramusculos, in-

(a) Loc. cit. Fig. 4. , & 5.

indefinite multos, & minimos dividantur, qui singulas, & omnes venæ *portarum* divisiones ad quælibet visceris puncta insequuntur. Ruyschius in Thesauro Anatomico maximo, eum habet hujus arteriæ archetypum, ceracea injectione paratum, ut ex hac solum arteria, Hepar effectum videatur (a) arteriolarum harumce quam plures furculi ab ipsa jecinoris substantia emergunt, qui inde subter ejus tunicam, perque ejus etiam ligamenta pulposas suas extremitates protrahunt, imo etiam subter tunicam eosdem ramusculos continuatos observavit Cl. Loquet (b); Itemque ab exterioribus ramis hujusce arteriæ ramusculi prodeunt, qui nullo pacto penetrata Hepatis substantia ad ejus tunicam protenduntur, in fima jecoris facie, ad glandulas illic adfitas, tum etiam ad lateralia ligamenta, & usque per totam umbilicalis venæ longitudinem, latumque ligamentum (c).

(§. XXIX.)

Ab arteriis quoque Diaphragmaticis, ramusculos describit Ruyschius ad Hepar productos, quos aliqui per latum etiam ligamentum, usque ad umbilicum repentes vidisse asseverant, imo, & subclaviarum soboles nonnulli viderunt, quæ per latus pectoris dextrum ad diaphragma protractæ, per ejus inde foramen, in convexam Hepatis regionem expanderentur. Viderunt alii etiam a vasis Renis succenturiati dextri ramusculos ad Hepar pervenisse, imo etiam a mesenterica superiore ramum sat insignem, qui retro duodenum intestinum ad portarum Hepaticam venam primum, hinc in Hepatis substantiam progredieretur. Nos vero ex pluribus cadaveribus aliquando vidimus arteriam *Celiacam* in *Gastricas*, & *Splenicam* omnino insumptam, exiguo solum, vel etiam nullo ramo ad Hepar emisso, proveniente inde alio, sat insigni ramo ad Hepar ab ipsamet aorta inter *celiacam*, & *mesen-*

(a) Ultimos ramos, in *pulposas maculas*, in *stellæ modum ramulos spargentes* habet idem Ruysch., Th. 9. 59. T. 4. Fig. 1., &c.

(b) Disput. de arteria Hepatica, Ruysch. fig. 5 Tab. 3. Thesaur. 10. Tab. 6. Epist. Problem. 5.

(c) Vid. Bianch. Tab. 2., & 2.

mesentericam arteriam superiorem. An hujusmodi erat duplex Hepatica arteria a Cl. Fantono sæpius reperta? (a)

(§. XXX.)

Vena Cava, quæ primum per lumborum vertebrae, recta adscendit, ab eo fere loco, ubi venas a renibus excipit, *emulgentes* dictas, in dextrum latus deflectere incipit, *in idque magis, magisque donec Hepar per propriam foveam, quæ in ejus superiore, & posteriore parte est insculpta* (§. IV.) attingat, eique adfigatur inclinare, sic, ut non minus priorem suam directionem, quam magnæ arteriæ, primum quam proximæ deserat, mox inde per dextram partem tendinei centri diaphragmatis in pectoris cavitatem penetratura (b) pene ad libellam summæ, mediæque partis jecoris. Ex ea autem parte, qua vena cava memoratæ foveæ adjacet, alios, atque alios ramos, sat insignes ab Hepate recipit, quos venas Hepaticas egredientes vocant. Ab omni nempe jecoris puncto, ad quod venæ portarum, & arteriæ Hepaticæ (c) quilibet rami pertingunt, ramusculi exoriuntur venosi, qui sensim per adfluentes alios ramusculos majores facti, numero majori, vel minori, puta tres, quatuor, quinque &c. in illam Cavæ Venæ partem alii post alios tandem aperiuntur, ideoque magis, minusve adscendentes, superioribus pene ad eam illius venæ partem, quæ in pectoris cavitatem jam jam penetrat adfitis, imo interdum etiam observatum fuit, horum aliquos in Cavam non aperiri, priusquam, & ipsi quoque nerveum Diaphragmatis centrum perforaverint.

(§. XXXI.)

Ab utraque vero Hepatis facie, aliæ præterea Hepatis venæ per sæpe occurrunt, quarum aliæ venæ *azygos*, Dia-

E

phragma-

(a) In Dissert. 2. editionis.

(b) Vid. Eustach. Tab. 25. Caffer. Tab. 3. ad lib. 5. Spigel.

[c] Segerus arteriæ Hepaticæ aliquos ramusculos in portarum venam absumi scribit op. cit. Ravius inferiores egredientium Hepaticarum vena-

rum ramos arteriæ Hepaticæ adtribuit, superiores vero venæ portarum, hujusmodi autem discrimina nondum videre potuimus. Vid. Ravii Splanchnologiam, quæ prostat tanquam appendix ad Tom. 2. Amphitheatri Zootomici Valentini.

phragmaticarum aliæ soboles sunt, at quemadmodum primum memoratæ venæ ab interiore Hepatis substantia prodeunt, has solummodo Hepatis tunicæ subrepentes vidimus. Caldefius (*Op. cit. pag. 35.*) omnes Hepaticas egredientes venas per extimam jecoris superficiem, in *Testudine*, serpere scribit, atque alibi (*pag. 64.*), venæ cavæ ramum describit in eodem animali, qui ex jecore surgens ad dextrum pulmonis lobum, itemque ad renes properat, duobus, ut plurimum ramusculis. Ad oscula venarum Hepaticarum egredientium, qua parte in cavam aperiuntur, Fabricius ab Aqua pendente (*a*) aliique valvulas descripserunt, quæ tamen nullæ sunt, nisi valvulam nominare velimus alterutrum magis productum venæ, oblique per sæpe terminantis parietem, extantem arcum pene effingentem. (*b*)

(*a*) De Valvul. venar. Tab. 3. Sylvius *Isagog. Anat. lib. 1.*

(*b*) Doctiss. Boerhav. *Instit. vol. 2. Edit. Taur. pag. 241.* Pelliculam peculiaris ingenii vere valvulam, sive libellum membraneum versatile describit, quod sub Diaphragmate, ita contra Hepaticas egredientes venas adsitum sit, ut ab adscendente per cavam venam sanguine ad earum oscula applicetur, ne in Hepar hic irruat. Quis autem hanc valvulam vidit? non quidem Vvinslovvius ab ipso perperam citatus, quemadmodum bene animadvertit eruditissimus Haller *ibid. not. c.* at error profecto est ab Eustachii valvula usque illuc aliquando pendente, nec quidem valvulæ Eustachianæ adeo productæ libelli membranei nomen facile concederemus, nam hæc valvula, ex paucis etiam Cadaveribus, amplitudine varia, aut etiam nulla (*vid. Cl. Morgagni Epist. 15. ad scripta Valsalvæ*) tunc solum satis producit in cavam adscendentem venam quando libero suo anteriori limbo, vel in universum reticulata occurrit, neque tunc etiam usque ad Hepaticas egredientes venas, nisi hæc supra diaphragma in cavam aperiuntur quod semel vidimus in Homine qui-

(§. XXXI.)

dem octuagenario, si porro plena sit, utroque cornu suo ex lateribus auriculæ cordis dextræ, & venæ cavæ adfirmata, nulla vi usque illuc adigi potest. Hepatis autem œconomia hujusmodi valvulam inservire scribunt Parisienses ex *Castore*; Sub vena inquam, coronaria valvulam mirabilem dictam invenerunt, quæ integrum venæ cavæ truncum occupabat, & sic disposita erat ut sanguis facile ab Hepate in cor per venam cavam transire, at nequaquam a corde in Hepar per eandem venam obstante hac valvula reflueret potest. Ex iisdem Valent. amphitheatr. *Zootom. part. 1. pag. 172.* nihil porro hujusmodi asserit qui de castore scribit *tom. 3. part. 1. Mem. de l'Acad. Royal. des scienc. ab an. 1666. ad 1699.*, & Cl. Sarazin an. 1704. ejusdem Acad. *pag. 59. Memoir.*, Valvulæ Eustachianæ sacculum in eo venæ loco cum tribus Zigmoideis valvulis substituit, quem sacculum cum simplici, carneaque valvula fere omnibus avibus alii attribuunt, *vid. ex ea quæ Ottis dicitur p. 109. Tom. 3. part. 2. ex Gallo Indico p. 231. Tom. 3. part. 1. ex Parasita Numidiæ pag. 13. Tom. 3. ejusdem Acad. ab an. 1666. ad 1699.*

(§. XXXI.)

Ab ea parte sinistri nervi vagi, quæ mox sub *diaphragmate*, Oesophago anterior est per minus *omentum* in superiore parte, qua id jecoris sinistræ faciei adnectitur, ramuli nervei sat multi ad Hepar protenduntur, quorum magna pars per fossam ductus *venosi*, versus *portas* progrediens, in visceris substantiam penitus continuatur (a). Sparsis vero etiam ex superiore Hepatis parte non nullis ramulis non multis divisionibus convexam ejus faciem perreptantibus, quibus non semel additos observavimus præcipue ex dextera parte aliquos proximorum intercostalium nervorum ramusculos, qui diaphragmatis carnem, & aponeurosim jecori superiorem alicubi perforaverant; Ex dextro autem, seu posteriori nervo vago, nervei ramusculi ad Hepar provenientes, cum arteria *Hepatica*, Sinum *portarum*, & dextram Hepatis sedem adeunt pluribus in implexum Hepaticum insumptis ramis, cæterisque in Hepatis carnem penetrantibus.

(§. XXXII.)

Ille vero nervus, ab intercostali in dextro latere exortus quem *Vvillifius* (b) *Mesentericum* nominat, quum alios, post alios, inde etiam ab eodem intercostali ramusculos per descensum acceperit, ob quos cum *ventriculo*, *pancreate*, *liene*, & intestino *duodeno*, commercium aliquod Hepar obtinet, in *plexum* evadit, quem *Ganglioformem* describit *Vieussennus* (c), ad quem a memoratis visceribus, variisque eorum *plexibus*, & *gangliis* alii accedunt, quum superius memorati ad eadem accesserint. Ex eo, inquam maximo plexu *ganglioformi Hepatico*, fibræ primum nonnullæ nerveæ ad *vesiculam felleam* producuntur, aliæque per Hepatis extantias demittuntur, reliquis inde circum vasa ab Hepate egredientia,

E 2

(a) Hos nervos aliquando oriri vidimus ex peculiari ganglio illic adfuto, ubi a celiaca arteria priores rami ad ventriculum abscedunt, pene ad latus illius arteriolæ, quam describit *Cl.*

Haller in *Descrip. Diaphragm.* I. Edit.

(b) *Cerebr. Anat., & Nervor. Descript.* cap. 25.

(c) *Passim in Tab. Neurograph.*

dientia, vel in idem viscus ingrediantia, *inextricabili*, arctissimoque *implexu* adjectis, quæ inde profundius in Hepatis portis, cum antea expositis nervorum conjugationibus conjunctæ, fasciculos adaugent, iterum vasa Hepatica *Biliaria*, & sanguinea, per finum ipsum Hepatis robustæ circumdantes, & scandentes, eaque lufibus variis, atque reticulis in modum hederarum amplectentes, ubique inde, & in ipsam visceris penitiorē substantiam, ita ut etiam a convexa facie sub tunica nonnulli prodeant, educuntur, reticulo pene dicam *alveolari* vasa visceris fulcimente, & ordine quodam intertexente (a).

(§. XXXIII.)

Circum, & per Hepatis portas, glandulæ ovatæ, colore rubro, subobscurō, aut etiam livido, tum ob perfusam bilem aliquando pene luteo adsident, quas conglobatas describunt, magnitudine variæ ad fabæ crassitiem aliquando sine morbo accedunt, imo etiam superant, numero sunt vario, & inconstanti, textura peculiari, & aliarum conglobatarum glandularum non omnino simili, *lanuginosas*, aut *mucosas* diceres, si abscissas, aut parumper aqua solutas consideres; has non raro omnino abesse jam dudum notavimus, hinc non mirum si pauci Scriptores easdem memorent.

(§. XXXIV.)

Per utramque jecoris faciem, sub ejusdem tunica, vasa quoque Lymphatica reptant, hic pauciora, vix ramosa, pene solitaria, illic plura, varioque modo implexa, & distributa. Quum elapsa æstate in Regio Provinciarum Collegio canes pene quotidie inciderem, Lymphatica vasa præcipue in loborum fissuris, & quibuscumque exterioribus caveis perreptantia vidi, quorum pars circum venam *portarum* jam jam *Hepaticam*, implicabatur, alia vero plura per superiores, finæ visceris faciei fulcos, venæ Cavæ adscendenti advolvebantur,

(a) Nervuli quoque interdum a visceris substantia exsurgunt, & per ligamenta inde prorrahantur, usque etiam ad umbilicum per ejusdem ligamentum falciforme.

bantur, pene in fasciculos illie collecta (a) ascendunt quoque per Hepatis ligamenta, contra vesiculæ felleæ latera. ec. Lymphaticorum cum lymphaticis a nonnullis celebratas anastomoses non vidimus, vidimus quidem horum aliqua a proximioribus abdominis partibus accedere, alia ab intima visceris substantia exfurgere, quove principio adhuc ignoramus, Cl. Vieussennus (b) ab extremis arteriæ Hepaticæ radicibus hujusmodi vasa exfurgere scribit, alii ab acinis jecoris glandulosis (c) neutrum vero constat; constat quidem horum aliqua in chyli cisternam terminari, aliorum finibus non bene perspectis, longioresque vias ipsis adtribuunt Rudbeckius, Svamerdamius, Nuckius, alique, hanc vero materiam ultra Hepatis fines nobis pertractandam non infumimus.

(§. XXXV.)

Ex eorum omnium vasorum, nervorumque implexu jecur compositum, in peculiari membranacea capsula continetur, cujus longius protensæ partes ligamenta vulgo vocantur. Albida est hæc capsula, pellucida, satis pro sua tenuitate valida, cellulosaque substantiam ex interiore parte insignem habet, quæ per universam Hepatis massam, longe, lateque diffunditur. Cl. Douglassius (d) viscera pene omnia abdominis in peculiaribus peritonæi capsulis, quæ eorundem

figuris

(a) Erant variæ magnitudinis, variæque pelluciditatis; Cl. Bianchi in Prodomo Tabul. 54., Tab. 21. *Figuris duabus novum inventum perhibet vasorum ventriculi lacteorum, quæ per omentum utrumque in cavas venas ab Hepate egredientes traducuntur.* Vid. Pauli Hieronymi Biumi Opusculum. *Esamina d'alcuni canaletti chiliferi, che dal fondo del ventricolo per le tonache dell' omento sembrano penetrare nel fegato.* Milano 1728.

[b] Vasorum Nov. sistemat. pag. mih. 180., erat autem Hypothesibus nimium facilis, neque opus hoc probaverant Academici Parisienses.

(c) Videantur Courtial. observat. Anat. oper. Cl. Petit de morb. oss. adjunct. ex 1. edit. Arterias Hepaticas, aut ductus biliarios inflando, plerumque lymphæ ductus vento distendi observabat Covvper Tab. Bidl. 38. fig. 2.

(d) Descript. Peritonæi.

figuris respondeant, contineri describit (a). Facite itaque in earum una Hepar contineri, cujus tamen capsulae superior pars ad Hepatis fornicem elliptica, longeque producta ora protensa sit; hinc facite etiam anteriorem capsulae partem inter utrosque lobos in plicam falciformem elevatam, & tunc cum visceris capsula duo lateralia ligamenta, & suspendens, aut latum dictum habebitis. Sed majori perspicuitate rem pandam peculiari Encheiresi.

(§. XXXVI.)

Plica ea anterior, & maxima, a suo principio, quod anteriùs ad venae cavae ab Hepate exsurgentis locum infimus, plus minus in trianguli formam eidem venae adscita videtur (b) hinc invicem accedentibus lamellis, neque tamen deficiente sinu, sed in sulcum longe minorem, at etiam triangularem evadente (c), primum minus alto arcu, hinc sub magis concavo diaphragmate, longe majori, tandemque per interiorē abdominis faciem, extremam ultra Hepatis oram vix arcuata pene acuta appendice *umbilico* terminatur, ex quo venam recipit umbilicalem (§. XII) adusque Hepatis portas, in inferiore hujus plicae parte conclusam; hanc ipsam plicam, si per longitudinem usque ad Hepatis superficiem dividamus, videbimus, & cum ipsa continuari Hepatis tunicam, quae a subiecto viscere quoque facile dividitur, sursumque producta divisione, in duas laterales, membranaceas appendices, tamquam elliptici oris ansulas continuari perspiciemus, eaque una cum altera posterius adtenso peritonaei, seu Hepatici marsupii appendice, ligamenta lateralia comparant, quorum dextrum, in Hypochondrio sat profundum, magis amplum, in eodem Hypochondrio dextro, peri-

(a) Sunt enim extra peritonaei cor-
tinam Renunculi, Renes, vasa plura
Lymphatica, vena cava, aorta, vasa
spermatica, intestinorum pars aliqua,
vasa alia, muscoli, quemadmodum
perbelle demonstravit Douglassius. op.
cit.

(b) Vinculum hoc suspendens *indu-*
mentum dat venae cavae Oribasius Anat.
ex Gal. p. 119.

(c) Suspendens ligamentum cavum
describitur in Mele, seu Taxo, ut &
Criceto, è Miscel. S. R. I. Acad. Nat.
Dec. II. an. 5. p. 55., & 376.

peritonæo costas viciniores obvestienti continuatur (a); Sinistrum longius, & trianguli formam magis referens ex angulo superioris appendicis sinistri lobi (§. I.) trans œsophagum, non raro ante caput Lienis elungatum; peritonæo diaphragma convestienti in ala sinistra adjungitur; Capsulæ autem velum posterius *diaphragmati* verticaliter adtenfum, quum utpote continuum cum anfularum partibus, quæ quidem summæ jecoris parti tamquam verticale considerari etiam possunt, eandem partem circumclaudant, id, quod coronarium vocant ligamentum, cum iisdem anfulis præstare videtur. Univerfa porro jecoris pars, quæ hisce marsupii productionibus interceptitur, tamquam ad aperti marsupii oram, sub diaphragmatis fornice, nuda, & sine tunica est, cellulosa solum, aut etiam pinguedinea substantia perfusa, quæ quidem per ligamenti lati laminas continuatur (b).

(§. XXXVII.)

In sima autem jecoris facie, capsula hæc vario modo plicatur; plicam primum habet a sulco ductus venosi verticaliter continuatam in peritonæum, dextrum diaphragmatis crus investiens; pone ligamentum laterale sinistrum, cum omento minori continuatur, inferiusque a transversa Hepatis fovea, cum tunica exteriori intestini duodeni producta, integumentum dat ascendenti venæ portarum, ductui Hepatico, cholidoco,

(a) Homini robusto ob capitis vulnus cum cranii *Diacope*, & late sparsa fissura, post factam cranii *trapanationem* febris adaugebatur, sitis, calor; Ictericus devenerat, cum dolore, & æstu quam maximo ad Hypochondrium dextrum, ibique oborto tumore, post irritam resolutionis, & *Discussionis* curam, ab expertissimis Chirurgis Andrea, & Joanne Baptista Verna, ut tumor aperiretur consultum fuerat, eoque duas desuper Hypochondrii costas inciso, quin cultrum in abdominis cavum penetrasset, multa puris copia quotidie per dies 6 ab ipso abdominis cavo prodibat, quum inde æger con-

vulsionibus ob capitis vulnus enecaretur, cadaver ego incidendum insumpsi, atque observatum fuit, puris materiam qua vertex dextri Hepatis lobi exesus fuerat, in ansulæ sinu contentam fuisse, quin in abdominis amplam cavitationem penetrasset, qua parte verò hæc ansula proximis costis adnectebatur, dehiscere ab adhæSIONIS punctis incipiebat.

(b) Hunc tunicæ Hepatis defectum ad ligamentorum præcipue lateralium loca, Eustachii diligentiam non effugisse videtur ex Tab. II. fig. 4. num. 32. 54. edit. Rom.

doco, cystico, arteriæ, & nervis *Hepaticis*, quæ quidem omnia in unum fasciculum colliguntur, nullo inde pacto in Hepatis intimam substantiam continuata, sed per eam partem, solum cellulosa tunica in viscus adeunte.

(§. XXXVIII.)

Unde ergo Glissonii capsula, de cujus inventore acerrime tum hoc sæculo, hisce postremis annis disputarunt, Anatomici primi quoque subseclii? (a) Listerus (b) hanc tamquam validum musculum peritonæo Hepar penetranti adnexum describebat, qui certe potis esset tantam venæ portarum pulsationem conciliare, ut aortæ pulsationem emularet, minorem alii fecere, & minorem adhuc alii capsulam vero *Glissonianam* omnino negare vix ullus ausus est, unde porro ejus longitudinales plicæ prima jecoris vasa undique dirimentes? non videmus, vidimus quidem fibrillas nerveas descripto exteriori venæ portarum indumento (§. præced.) inextricabili implexu circumductas, & implicatas, una cum strictioris compagis rubellis vasculis, præcipue ab arteria Hepatica præstitis, nihil vero ultra.

(§. XXXIX.)

Reliqua capsulæ pars, reliquam jecoris partem interiore cum folliculo felleo obvelat, vix altera interdum plica producta supra ejus lateris renem ad costas. Hisce vinculis contra diaphragmatis fornicem Hepar retinetur, ad id etiam opem aliquam conferente subjectorum intestinorum cumulo, ut demonstravit Cl. Vvinslovv (c); & Cl. Arent Cant (d) maximam ex detra parte jecoris in diaphragma pressionem constituit, ut hoc in sinistram pectoris caveam plurimum elatum, velit, etsi quidem minorem esse in vivis præcipue erectis

[a] Hæc capsula sic describitur ait Covvper Fig. 11. Tab. 37. Bidloo, ut quibusdam conjecturis potius de venæ portæ in Hepate officio faveatur, quam quod re vera sic appareat. Videtur autem musculosam solummodo ei denegare fabricam, nam communem mem-

braneam vaginam adtribuit ductibus Hepatis sanguineis, & biliosis Ibid.

(b) Vid. ejus Tract. de Humoribus cap. 7.

(c) L. cit.

(d) Tab. 4. Impet. Prim. Anat.

rectis certe videatur, quam in cadaveribus dorso resupinatis (a) alias nunc non memoro capsulæ plicas, puta a ligamento lato, aut etiam a radice sinistri ligamenti lateralis ad Xiphoideam cartilaginem, tum ab extrema parte, quæ umbilicali venæ propior ad proximam coli partem utpote non perpetuas (b).

(§. XL.)

Venam portarum, & arteriam Hepaticam, in pene infinitos, & sensim maxime minimos ramusculos elongari, sanguinemque in Hepar infundere, certo scimus, quemadmodum certo scimus bilem a ductibus Hepaticis, ab initio quoque minimis, & pene infinitis retrahi, & infusum primum in Hepar sanguinem, ab egredientibus *Hepaticis* venis ad *cavam* venam hinc traduci. Id omne, imo quidquid usque nunc descripsimus, hujus visceris structuræ umbram vix præferebat, & quod maxime dolendum, quid præterea addamus, vix scimus, adeo effecti sunt Hominum oculi, tum in iis rebus, quas tamen Divina Munificentia, nobis quocumque excogitabili modo pertractandas obtulit, adeo deficit, tum in minimis Naturæ operibus ars hominum, ah semper, semper in tentaminibus suis illusa!

(§. XLI.)

Videt oculus majorem portionem in efficienda Hepatis massæ, *venæ portarum* esse, quam *cavæ*, illiusque majores ramos, quam citissime in longe minores redigi; Ceram, aut vini spiritum a *portarum Hepatica* vena, per aliquam visceris partem in *Hepaticum* ductum traduci, itemque ex illa in *ca-*

F

vam

(a) Riolanus nullam diaphragmatis concavitatem, aut saltem non majorem ex ea parte esse contendit in vivis propter pondus viscerum dependentium. Animad. in Theat. Anat. Bauh. pag. 707., itemque in Animad. in Anat. Laurent. p. 649., & subtiliori theoria Glissonius op. cit. cap. 11.

(b) Cl. Bianchi durioris, densiorisque corpulentiae membraneas productiones Tab. 1. litt. M. M. M., & N, per latum ligamentum delineatas habebant, erant

ne ex morbo inductæ, utpote icon ex Hydropico desumpta fuerit? Cl. Santorinus l. c. haud absimiles compactas, & teretes in peritoneo elegantes productiones vidit, in Puerperis, quas albos lacertulos vocat, interiores transverse collocatos, & exteriores in longitudinem productos. Et aliquid etiam hujusmodi ex peritonæi laceratione Fallopium indicare voluisse videtur in opere cit. observ. Anat.

nam (a). Videmus exciso in frustula *Hepate* ingredientibus venas præ egredientibus in axim replicari, & flacescere (b); Venæ portarum *Hepaticæ* ramos, ita bene ductus *Hepatici* ramis adfociari, ut ubique confociati progrediantur, egredientes venas hos, atque illos ramos per diversas directiones interfecare, ad angulos magis, aut minus acutos, obtusos, aut etiam rectos, arteriam *Hepaticam* per quamlibet visceris differentiam traduci, nerveaque filamenta ubique, & vario modo implicari. Videmus etiam ea omnia vasa in manifeste reticulato contextu, substantiæ, inquam cellulosæ, ab Hepatis nempe portis in viscus productæ (§. xxxvii.) contineri, cujus cellulæ sunt cujuscumque ordinis, & figuræ, & earum quidem reticulus ab exteriori ejus facie apparet, tamquam Hepatis substantiam in majora, aut minora puncta interdistinguens, præsertim in ejusdem convexa facie, tum præcipue, cum viscus succingens tunica detrahatur (c). Hæc omnia videmus, at quot remanent ab Anatomicis nondum satis bene perspecta? Oculus videt ne quidpiam ultra, quidpiam ultra revelant ne injectiones, aut microscopia? Pulchra quidem vidimus, pulchriora per conjecturam scimus, at proh quam longe pulcherrima esse debent, quæ ignoramus.

(a) Boerh. Epist. ad Ruysch. de Glandular. Fabr., itemque Lischvitz de principiis venarum; Vieussens oper. cit. Non vero penetrari credimus a minimis vasculis penitioris *Hepaticæ* substantiæ, sed a longe majoribus, nempe anastomosium artificio, aliaque profecto est ratio de transfluxu per ductus *Hepaticos*, sed Physiologi munus modo non agimus.

[b] Unius cujusque jecoris venæ tunica admodum tenuis est, qualis nulla alia in toto animanti; Oribas. op. cit. pag. 115. in Fœtibus, excepto cerebro, nullum viscus jecore mollius est.

Parisienses in trunco venæ portarum *Bubali*, seu *Bovis Barbariæ* observarunt exiguas membranas, valvularum specie, quæ savitates, seu foramina ra-

morum, qui conducunt sanguinem ex trunco portæ in substantiam Hepatis dimidia occludunt, quo impediatur sanguinis ex ramis in truncum portæ retrogressus. Nihil autem hujusmodi in Homine.

(c) Hanc texturam habent ex Capra Affricana Parisini, & Blas. Anat. Animal. Tab. 12. fig. 2., atque etiam Bidloo, l. c. omnium autem optime Bianch. Tab. 7. Hist. Hepat. fig. extraordinem, quam *Mirificam* dixit Cl. Haller. op. cit. edit. Taur. Tom. 2. nota (a) pag. 243. Bianchi autem dat, eam ex Sue, Bove, Ove, Fele, Cane, & Homine pag. 1160. Tom. 2. Hist. Hepat., eumque sequuti sunt Vvinslovv, Garengéot, Verdier, alique.

mus ! *Subtilitas Naturæ*, ait Magnus Angliæ Cancellarius, *subtilitatem sensus, & intellectus, multis partibus superat.*

(§. XLII.)

Veteres, qui pene infinitam vasorum seriem, in hoc, aliisque visceribus erant quoque suspicati, a perfuso sanguine in iisdem, & præcipue in *Hepate*, alteram, distinctamque substantiam, sanguineam offam ex eorum descriptionibus dicerem, gigni credebant, eamque *Parenchyma* nominabant ; Donec Vir in perscrutandis Naturæ arcanis solertissimus, Marcellus Malpighius eam sanguinis offam diligentiori opera perscrutatus, demonstravit quemadmodum venæ *portarum Hepaticæ* ramusculi in quamdam substantiam producerentur, quam peculiari genere glandulosam nominavit : Numquamne vidistis in vitrariis officinis, ab Operariis conicos vitreos tubos, in extrema parte ita aptari, ut in vesiculas subrotundas, ovatas, quadrangulares, hexagonas evadant, a quibus inde alter longe minor educatur tubulus, idem pene Naturæ, artificium videtur in construenda Hepatis interna fabrica. Venæ *portarum*, nempe *Hepaticæ* extremi ramusculi, forte, imo certe, exiguiore iis, quos ex quacumque encheiresi videmus, in vesiculam evadunt exiguam, cogitate, quantum exiguam, quum pene Lyncei Anatomici, eam numquam videre potuisse fateantur, alique non minus solertes, qui eandem tuebantur, liquido demonstrare non potuerint, nisi cellulosa substantiæ Hydatides ex morbo jecore pro Malpighianis vesiculis Anatomicos illuserint.

(§. XLIII.)

Hiscæ vesiculis Malpighius figuram nullam speciatim determinare voluisse videtur (*), alii globosas, aut globosis non valde dispares, alii etiam hexagonas, aut plurium laterum fecere, ex harumque acervis lobulos minimos, rimis distinctos ob interserpentem per eorum latera magis conspicuam cellulosa substantiam præstari scribunt, quos nonnulli polygonos, alii cubicos designarunt, singulis vero vesiculis,

F 2

aut

(*) Atque si ullam, eam certe Hexagonam.

aut glandulis, sanguinea vasa, *venæ scilicet Portæ, & Cavæ extremi fines*, arteria pariter, & *porus biliaris* ex Malpighio appenduntur. Quemadmodum nempe in *uvæ acino* ab ramusculo, seu petiolo, in interiorem acini parietem, tenuia, succosa vascula disperduntur, quæ in acini cavum *uvæ liquorem* extillant, ita *venæ portarum Hepaticæ* extremi ramusculi, ac si exteriorem tunicam in vesiculam aptarent, penicillo vasculari, & interiore ejusdem interiorem superficiem obsident, iisque exterius, forte & interius subtilissimi egredientium venarum, & plus quam capillares ramuli priores incipiunt, in majores inde evadentes, ita quoque accedentibus extremis arteriæ *Hepaticæ* ramulis; ab altero autem vesiculæ extremo minimi excernentes, seu egerentes *Hepatici ductus* prodeunt, ex quibus in unum collectis *Hepaticus egerens communis ductus* evadit.

(§. XLIV.)

Ita ex Malpighio *Hepatis glandulæ præstitæ* videntur. Novam vero de viscerum, & speciatim *Hepatis fabrica* sententiam inde invexit Cl. Ruyfchius Vir peritus, & experiens (a), contenditque nullum dari folliculum, nullam dicam glandulam, extremis *venæ portarum Hepaticæ* ramusculis appensam, sed totum, quantum est maximum hoc viscus, simplicibus ejusdem vasorum continuationibus, quorum supellex amplissima est, confici, ductusque *Hepaticos* sine intermedio folliculo ab extremis *venæ portarum Hepaticæ* ramusculis oriri, & spectabiles, si quippiam videant, visceris acinos, glomeramina, seu potius distinctos cumulos vasculorum nulla peculiari membrana obtectorum esse contendit. Oh elegantissimæ *Malpighii observationes*; urgent porro aliæ *Ruyfchii*; & cui modo credendum, aliquid ne utrique de hujus visceris substantia

(a) Viri in Critica Anatomica periti folliculosam. aut glandulosam viscerum structuram a Vvepfero primum indicatam fuisse contendunt in Epist. ad Joh. Henr. Pauli, itemque

omnino vasculosam ante Ruyfchiam ab Edmundo Kingio, in Transact. Phylos., at quo ultra processerunt Malpighius, atque Ruyfchius.

stantia omnino reconditum semper extitit? Certe Cl. Bianchi in publicis, privatique lectionibus, nobis sæpe adseveravit quidpiam a vasculosa, & glandulosa substantia diversum in visceribus existere, quemadmodum in elaboratissimis suis Tabulis demonstraturum esse pollicetur (a). Ego autem meam dissertationem nimium jam, forsan cum Lectorum fastidio, protractam existimo, ut in hoc argumento amplius non immorer, præcipue cum nondum tantam habeam experimentorum copiam, ut litem hanc solvere possim.

Non nostrum inter vos tantas componere lites.

(a) Ipse quidem Hepatis substantiam granulis, seu acinis factam perspexi, Malpighianas autem vesiculas, aut folliculos, ingenuus dicam, numquam vidi, item in renibus: illius certe granula, aut acini, magis, quam istorum friabiles mihi videbantur, turgentes, pulposi, & laxi, eorumque interior fabrica admodum obscura, villosa, compacte reticularis, & quidpiam ultra, quod bene non perspicimus. Profecto facile crederem in glanduloso sistemate, non minus, quam in vasculoso de acinorum differentia cogitandum esse: atque forte in hac disquisitione lucem aliquam afferre possent Phythologicae observationes, fructuum præcipue, & foliorum, item Zootomia subtilior, in iisque jam a quatuor annis totus sum. Interim Consul. Petr. Nanius Inst. Bonon. Tom. 1. pag. 326., & seq. Boerh. Fabric. Divers. Gland. Tom. 2. Instit. ejusdem Epist. ad Ruy-schium de Glandular. fabric., & Ruy-schii responsum. Bianchi Progymnasma de varia animalium viscerum Fabrica etc., & Histor. Hep. l. ultimo c. Heister apolog. ad finem Adenolog., Morgagnis Epist. anat. 3. §. 4., & seq. at quoque non omittatur Perspicacissimi, & optimi judicis Jo: Fantoni, Diff. Anat. 6. ultim. edit. a pag. 227. ad 236., cujus librum gratiosissime nobis dono datum, non semel deosculati sumus; Addatur Vvinslov Acad. Paris.

an. 1711., qui folliculorum vascula, imo ipsosmet folliculos intus villosos, & ea materia, quæ illic secernitur jam ab initio Hominis infarcta ponit. expos. Anat. Trait. du bas Ventr. §. 287. idem habet Vvinslovii Præcursor Garengeotius, & ejusdem compendii Scriptor Verdierus, præmonstrantibus quidem Leibnitio, & Michelotto, de separat. Fluidor; alii ex Cl. Ferren, *quemvis acinum fieri corticali fabrica, friabili, è rubro flava, & alia rubra molli, & quasi medullari* scribunt. At est ne tanta Hypotesium licentia, ut quum vesiculas re vera non viderint, quid in iisdem habeatur proponere liceat? Ah nos nimium ad naturæ opera elegantissima, nimium cœcutientes.

Quærimus indagine vana.

Naturam semper fugientem: quæ se ubi paullum

Ostendit nobis, mox facies in mille repente,

Ceu Proteus conversa sequentem eludit, & angit

Marentem, senique Loras, cassumque laborem.

Deficiente sensuum ope, erroris periculum semper est, nec quidpiam de abditis Naturæ operibus temere pronuntiandum, non quid fieri potuerit, sed quid re vera factum fuerit sedulo inquirendum, nam sapiens Natura eas, ut plurimum, quas Homines vias non est sequuta.

TABULÆ EXPLICATIO

FIGURA I.

Hepatis Marsupium ostendit, ejusque appendices.

SI ad Hepar, ligamenti lati vulgo dicti binas laminas divides, seu potius peritonæum, quod a concava facie prorogatum est, totumque Hepar amittit, & inter majores ejus lobos in altam, validamque plicam duplicatur, ad hunc locum aperias, & apertas partes in longum diducas, & versus superiores loborum margines longius invicem removeas, conspicue vides, hoc viscus sub diductis iis partibus omnino ab involucris nudum fieri; nimirum hanc plicam eandem ipsam esse succingentem tunicam: Vides insuper diductas illas ad loborum latera plicæ altitudines, continuas esse cum binis aliis peritonæi plicis, quæ lobos Hepatis dextrorsus, sinistrorsus, atque etiam posterius, cum lateribus, & medio concavitate diaphragmatis annectunt; Dextrum ideo, necnon sinistrum ligamentum a nobis sunt dicta: Vides ulterius mediam, seu majorem istam tunicæ Hepar succingentis plicaturam, inferius extra Hepar protendi, ibidemque venam *umbilicalem* dictam complecti, & cum eadem adusque umbilicum porrectam, ita ad locum umbilico, & jecori interpositum, cum ibidem affidente peritonæi latere subter firmari, & connecti, ut hæc ad hanc quoque sedem valide suspendat hoc viscus, a posteriori in anteriorem partem oblique situm; ne scilicet, vel in erectis magisque incubantibus, aut aliter jacentibus hominibus, super subiectum cavæ venæ truncum aliasque partes prolabatur: Vides præterea hanc plicam, si rursus in proprium nexum componas, ita superius cum diaphragmatis centro continuam esse, ut illic veram, absolutamque suspendentis jecur ligamenti operam præstet: Vides demum lateralia ligamenta posterius expansa ita uniter, lateque Hepar diaphragmati obligare, ut eadem semper ligamenta sint, quamquam alicubi varie infle-

ta, aut producta; neque idcirco diverso coronarii ligamenti, aut alterius cujuslibet nomine distinguenda esse. An non ergo ex ita ad Hepatis viscus circumducto peritonæo, ejusque hic, illic productis plicis, elegantissimum, simulque validissimum marsupium vides, quatuor præcipuis anfulis, seu inhæSIONIS punctis firmatum; primum scilicet punctum ad superiorem terminum lati ligamenti, seu ad centrum diaphragmatis; alterum ad ejus inferius extremum infra Hepar, sub albæ lineæ loco; Tertium, & Quartum ad lateralium ligamentorum oras, seu ad dextram, atque sinistram diaphragmatis faciem? Porro suspendendi momentum, & vis in iis ligamentis a ratione occupati spatii computanda est. Latum ligamentum, *suspensorii* arcus duas partes occupat; Tertium vero continuum *umbilicale*. Major sinistri lateralis ligamenti longitudo a majori latitudine compensatur. Hæc autem nitidius percipientur ex consideratione sequentis figuræ.

Hæc a Puero octo annorum desumpta est.

AA. Est Diaphragma, superius declinatum.

B. Ejusdem centrum tendineum.

CC. Hepar a diaphragmate pendens, cujus tunica, & ligamenta, sequenti modo fuerunt explicata.

Nempe ligamentum *umbilicale*, vulgo suspendens dictum, utpote facile dividuum, in duas laminas dividebatur.

DD. Igitur utræque devolutæ lamellæ sunt; quibus

E. *Umbilicalis* vena, primum extra Hepar insinuata videtur.

Producta hinc per Hepar harumce lamellarum divisione, unum, continuumque corpus cum succingente tunica ab iisdem diductis fieri apparet. Namque ab iis detractis, nudum remanet Hepar per spatium

FF. , Et ulterius si velis -

At neque peracta hac divisione, quo magis ad superiorem harum laminarum partem procedimus, eo jam in naturali statu plus diductas has laminas invenimus, eo modo, ut pene ante Cavam venam.

G. In triangulum dehiscant, cellulosa, aut etiam adiposa substantia instructum.

Namque ab hoc triangulo, quæ per Hepatis dorsum primo invicem adjunctæ Hepaticæ tunicæ, seu peritonæi laminæ, ligamentum latum, seu falciforme comparabant, per summam Hepatis, anterioremque partem ad latera intenduntur, & lateralia vulgo dicta ligamenta præstant; suntque hic partes.

HH. Quæ dextrorsum, & sinistrorsum producuntur ad Diaphragma, continuanturque cum peritonæo, a Diaphragmate in posteriorem Hepatis partem producto, nempe cumstrato.

II. Porro declinato in naturalem situm diaphragmate, & revisis in propriam sedem productionibus lati ligamenti HH, velut *navicularem* foveam sub diaphragmate similari comperrimus; eamque partem Hepatis, quam naviculæ latera circumclaudunt, tamquam ad sacci, seu aperti marsupii oram, sub diaphragmate nudam observamus. An hunc membranaceum *navicularem ambitum*, *coronarium* cum nonnullis vocabimus?

Quando porro Diaphragma in naturalem situm aptetur, non ita quoque in transversum erunt ejusdem crura, & alæ, quemadmodum hic videntur, propterea quod ad latera aciculis tendantur, ad hoc ut posterius velum magis, magisque appareret.

L. Est cystis Fellea extra Hepatis oram in hoc cadavere, quemadmodum in pluribus aliis suo fundo pendens.

FIGURA II.

De Hepatis structura.

A. Est Hepatis frustulum ex Sue, ita excisum, ut illud præcipue videatur, quod describebamus §. LXI., & not. 3. ejusd. §.

B. Est Venæ Portarum ramus per *granulosam* Hepatis substantiam sinuatus, & per anastomosim cum altero * junctus.

CCC. Lobelli seu *Hepaticæ Apophyses* exteriori tunica nondum nudatæ.

Hæc autem figura, pertinet ad Cl. Bianchi Præceptorem meum, qui in peregregio suo opere LIV. Tab. eandem nitidius, cælatam exponet, atq. explicabit, & magis quidem *mirificam*, quam viderit Cl. Haller. Vid. not. sup. c. it.

Fig. 1





Fig. 11.





OPHTALMOGRAPHIA

(I)



Legantissimum Optices Instrumentum, æque, ac sensationis organum hoc vespere vobis considerandum propono(*), nempe Oculum, qui tamen magnitudinis ratione ex minimis humani corporis organis recensetur. *Natura, ait PLINIUS, numquam magis, quam in minimis tota, & in arctum coacta*

Naturæ majestas, nulla sui parte mirabilior; & quidem in hujusmodi Hominis, & Brutorum corporis organis, oculo nempe, & aure, Naturæ præstantia adeo elucet, ut non magis ad maximi organi spectaculum, admiratione percitus spectator hæreat. Oh utinam ergo in hac Dissertatione adeo sim industrius, ut quæ est oculi elegantia omnino appareat. Sensit quidem hujus organi præstantiam ille a nativitate cæcus, cui repente videndi potestatem fecit, peritissimus, atque dexterrimus Chirurgus Anglus CHESELDEN. Judicium, & æqua rerum æstimatio puerulis deficiens, voluptatem nobis cum primum visu utebamur, imminuebat, hinc etiam continuus, & facilis usus.

(I I)

Figuram habent oculi, magis, aut minus *spheroidicam*, iisque ex maxima Animantium parte, duæ sub fronte adparatæ sunt *pyramidatae* cavitates, in quibus, ut pote oculi, pene, quemadmodum in suis *Orbitis Planetæ* circumvolvuntur, eas ideo *Orbitas* appellant: Porro, etsi exterius inspicienti, oculi *axim Orbitæ axi*, admodum respondere videatur,

G

nihi-

[*] *Hanc Dissertationem in Regio Provinciaram Collegio jam recitaveram ab anno 1745., dum etiam Ophtalmotomiam peragebam.*

nihilo tamen minus oblique jacet, utraque enim prostant, demonstrante WINSLOWIO, quemadmodum duo infundibula, desuper *horizontale* planum posita, altero ad alterius latus, nihilominus tamen invicem distita, ita ut ipforum *coni* ad se magis accedant, interna latera parallela sint, altera vero, seu opposita, oblique ad externam partem declinent, eoque modo, ut maximæ *circumferentiæ* axis, magis quam *conus* hujusce *pyramidis* a naso declinet, quapropter obliquam ejus conspiciamus oram, ita ut arcus, qui ad *temporis* regionem est, quem vulgo angulum *orbitæ* externum vocant, posterius non nihil declinet ab altitudine, seu libella arcus *nasalis*, quem quoque male angulum *orbitæ* externum vocant. Quemadmodum porro Geometræ globi concavitatem, quando varias ejusdem partes designare velint in *sinus* partiuntur, eadem ego ratione in posterum eas *orbitæ* partes, quas vulgo angulos vocitant, seu *canthos*, *sinus* appellabo, quando revera de *orbitis* sermo habeatur, tum vero angulos, seu *canthos*, quum de palpebris, ex enim ad anguli formam revera committuntur.

(I I I)

Septem ossa variis *apophysibus* *orbitas* utraque conficiunt, Os frontis cuique *orbitæ* duas contribuit pyramidatas *apophyses*, quæ basim antè habent, ita quidem, cum anteriore ossis parte continuam, ut glabrum magis, aut minus elatum, aut antè productum, aut etiam aliquomodo revolutum, & non nihil aliquando hinc inde deficientem, & excisum arcum præstet, sensim inde utriusque *apophysis* amplitudine ad *orbitæ* finem deficiente, hæcque ab uno ad alterum *sinum*, *orbitæ* fornicem conficiunt. Os unguiforme ossi *ethmoidæo*, & *nasali* *apophysi* ossis *maxillaris* superioris interceptum *sinum nasalem* construit, arcus autem ejusdem *orbitæ* inferior, ex nasi latere, ab assurgente *maxillaris* ossis *apophysi* præstatur: ex altero vero latere a *malæ* osse continuatur, atque perficitur, cujus quidem *apophysis* sursum erigitur, & in *apophysim*
 ossis

offis frontalis continuatur, unde *sinus* exterior, seu *temporalis* construitur, qui porro ut plurimum minus concavus est, quam *nasalis sinus*, etsi ejusdem arcus exterius satis extans circuli segmentum, ut plurimum bene referat. *Orbitæ* fundus, componitur ab osse *sphenoide*, & *Palatino*, atque ex horumce ossium accessione, duæ præstantur *fissuræ*, quarum utraque magis est versus temporalem *sinum*, atque superior *sphenoidalis* dicitur, inferior vero *spheno-maxillaris*. Plura ex *orbitis* habemus satis notatu digna, synthetica porro methodus alibi pertractanda objiciet.

(J V)

Quatuor tunicæ, aliæ aliis substratæ, oculi globum, qui intus cavus est, conficiunt, atque ex iis, unica est, quæ globum compleat, & una exterius ab media oculi parte ad anterius segmentum protenditur, & reliquæ duæ interiores solummodo ad interiorem pellucidi exterioris segmenti oram pertingunt; tota inde cavitas a tribus humoribus inter se diversis oppletur.

(V)

Tunica, quæ oculi globum complet, omnium crassissima est, & durior, eamque ideo *scleroticam* vocant a Greco vocabulo *σκληρῶδες*, quod *durum* Latino vertunt, & quidem tendineæ, aut ligamentosæ soliditatis videtur, *corneam* quoque appellant, propterea quod tenuem, cornu bubuli lamellam colore, & pelluciditate emulatur.

(V I)

Dura Mater, quæ nervum investit *opticum*, hanc tunicam conficit; mox enim quum in *orbitam* penetraverit in duas partitur laminas, quarum altera in *orbitæ periostræum* evadit, altera vero ultra nervi *optici* terminum, oculi globum construit, seu *scleroticam* tunicam.

(V I I)

In duo segmenta, textura, convexitate, & magnitudine diversa, hæc tunica dividitur, eorumque majus posteriorem

oculi partem componit, atque etiam majorem, utpote mediatur usque ad oram anteriorem ejus partis, quam *album oculi* dicunt, illicque persæpe, tamquam si ab ovato cingulo superius, & inferius comprimeretur antèius ita porrigitur, ut ultra majoris segmenti perimetrum alterum oblongius, & minus segmentum efficiat, maxime pellucidum, quapropter globus oculi antèius portionem oblongatæ *spheroidis* efficiat, quam P. SCHEINERUS *spheroidem parabolicam*, vel *hyperbolicam* definivit; quapropter hujus parvi segmenti basis, exterius, non ex toto circularis apparet, sed parumper in transversum ovata, dum interea circulus in interiore parte perficitur.

(V I I I)

Notandum porro neutrum horumce segmentorum eandem semper convexitatis rationem servare: Etenim oculus præterquamquod interdum ad rotunditatem magis accedat, ita ut ejus longitudo, latitudinem vix excedat, ex gr. dimid. lin., aut 1. lin., interdum etiam ob magis productum antèius segmentum longe superat, quod in *myopibus* præcipue spectandum occurrit; In Hædis, Bobus, Equis, minor est eorum oculorum ex posteriore parte convexitas, imo in alteris aliquando omnino planum observavisse recordeor: contra vero anterior oculorum facies in avibus magis plana apparet, atque ex utraque facie æque plana in piscibus.

(I X)

Raro autem non deficit oculi convexitas in Homine, & quadrupedibus proxime ad minus segmentum, illic, ubi *scleroticæ* adnectuntur oculorum *musculi*, ita ut per hunc ambitum, non nihil quadratam affectet figuram, at irregularem, namque observante Cl. PETITO, complanatio major notatur sub musculo *indignatore*, minor sub *humili*, & fere nulla sub *elevatore*: atque illic etiam crassities deficit, quæ quidem occurrit in ratione directâ complanationis, habita-
porro

porro densitate in ratione reciproca crassitie, & inductæ complanationis.

(X.)

In minus productis hominum oculis, primo aspectu anteriorius quidem segmentum, quod superius ovatum jam dicebamus, rotundum videtur, aut circulare; Porro si attente observetur in omnibus pene oculis apparet, *conjunctivam*, quam vocant tunicam $\frac{1}{3}$ i. lineæ in superiorem minoris segmenti partem, vel etiam dimidia linea, vel $\frac{2}{3}$ i. lineæ, aut i. linea, & ultra continuari, ob quam forte *conjunctivæ* productionem minus segmentum irregularem obtinet figuram, & ejus ideo centrum, *diaphragmatis* centro non omnino respondet. *Conjunctivæ* autem productio minor semper est ex inferiore oculi parte; verum si ita productæ hujus tunicæ pars omnino auferatur, memorata *excentricitas* perditur, atque minus segmentum exterius æque, ac interius *circulare* videtur, quod nostram superius allatam prolungati anterioris segmenti causam confirmare videtur. At non raro *conjunctivæ* fibrillæ, ita inter minoris segmenti fibrillas penetrarunt, & cum iisdem coaluerunt, ut promiscua earum adhesio auferri omnino non posset, hinc neque etiam, quam observabamus *excentricitas*.

(XI.)

Majus segmentum in plures laminas, coloris, ut plurimum cinerei dividuum est, hæ nihilominus ab nervo *optico* usque ad parvum segmentum hic, atque illic per longitudinem, & latera exiguis quibusdam sanguineis vasculis, & nervulis a proximis partibus provenientibus per obliquos trames penetrantur, eaque vascula, & nervuli in compactissimos funiculos primum uniuntur, hinc latiores tenuissimique in concavitatem minoris segmenti finiunt.

(XII.)

Minus autem segmentum, tum sine maceratione lustratum, duabus lamellis constructum perspicitur, quibus spongiosa quædam

dam substantia est intercepta, atque si contra lucis radios bene lustretur, elegans ejusdem reticulus apparet, tamquam ex lineis in omnis ordinis triangula, aut quadrata conductis, cujus porro reticuli elegantia, non eadem semper est. An ex memoratis vasculis, & nervulis in hoc segmentum productis hicce reticulus præstatur? In ipsa certe corneæ soliditate est, atque ex neutra parte extat. Laudatus PETITUS in hujusmodi segmento Æthyopis plures lineas crassitie 16. part. lineæ, itemque rubescences vidit, in varias figuras, trium, aut quatuor, vel etiam sex laterum implexas, idemque in Europeo XX. annorum, itemque in aliis, at subobscuras, & Cl. MORGAGNIUS in macerato, nec dum dissecto oculo, corneam lucidam, albidam, atque opacam, & quibusdam lineis, quasi vasculis fuscis, distinctam vidit, quæ nonnullis in locis, in retis prope modum, stellæve modum se decussabant, easque lineas sectis mox oculis, ab interiore facie transpiciendo, videre amplius non potuit. Noster porro reticulus perpetuo observabatur.

(XIII)

Plurimis porulis hoc minus segmentum pertusum est, & quidem si recentis cadaveris oculi comprimantur ab alterutro latere, tenuissimus humor ab eo emanat, atque in guttulas colligitur in iis, qui longo agone animam expirant, quas è morientium oculis recolligere Veterum pietas erat. Tum venatores perspiciunt, quemadmodum in enecatis belluis sine oculi lesione, veluti lacrymæ fluant, indeque minus hoc segmentum concidens flarescat.

(XIV)

Abluitur exterius ab humore *lacrymali*, interius ab *aqueo*, hinc mirum non est, si plurimum pelluceat, unde merito *cornea lucida* minus hoc segmentum dici possit. In Foetibus vero minus pellucet, pene glaucum apparet, rugosum, minus convexum, magis, quam in adultis crassum, in istis enim tertiam unius lineæ partem æquat, in illis vero 1.
lin.

lin. $\frac{1}{3}$ excedit: In utrisque porro interdum observatur
versus centrum crassitiem insigniter imminui, præcipue in
junioribus, interdum enim propius scleroticam crassitiem
reperiebamus = $\frac{1}{24}$ l. pol. in centro porro = $\frac{1}{30}$ l. pol.

(XV)

CL. DEMOURS *corneam lucidam a sclerotica minime con-*
tinuari contendit. Primo, propterea quod macerationis vi
intumescat magis, & in plures dividi possit laminas. Secun-
do, ob facilem alterius ab altera solutionem, si post lon-
gam macerationem in ferventem aquam dejiciatur, fulcata
inde apparente scleroticæ ora, a qua lucida fuerit avulsa.
Tertio, propterea quod in avibus, quarum *sclerotica* ex la-
mellis cartilagineis, aut osseis, invicem per latera apposis
construitur, membranaceam habeant *corneam lucidam*; Et qui-
dem BRISSEAU primus scripserat *scleroticam, & corneam*
lucidam non idem continuum esse, at quod certe nos vide-
bamus, invicem inclinata ora uniri, ita tamen, ut corneæ
ora subter sit, *scleroticæ* super. In Lynce PARISIENSES
crassitiem *corneæ (lucidæ)* describunt, quæ dimidiam habe-
bat lineam, atque erat eadem ubique juncta cum *sclerotica*
per mutuam attenuationem extremitatum duarum membra-
narum, quæ singulæ factæ erant, uti sectio adamantis in vi-
tro; cum sic junctæ essent ambæ, non superabant singularem
seorsim sumptam membranam, siquidem pars tenuissima unius,
quæ est in extremitate ejusdem crassissimæ alterius partis su-
perposita est. Idem DEMOURS horumce segmentorum
commissuram planâ fascicolâ exterius obduci scribit, sunt
porrò nervi inferius describendi, qui hæc duo segmenta col-
ligant, & uniunt.

(XVI)

In *apibus*, aliisque *insectis* alatis, *cornea* inquam, *lucida*
variis multiplicibusque divisionibus intersecta est, hæque di-
visiones nequaquam sphericæ, sed potius hexagonæ per ex-
teriorem

teriolem ambitum sunt, quamvis nihilominus massulæ hiscæ divisionibus interceptæ supernâ facie penitus globosæ sint, adeoque exactissimè similes favorum cellulis, tum curvis, ut plurimum, & sinuatis lineis intercipiuntur, si ab exteriori præcipue facie perlustrantur. STANCARIUS Bononiensis in *Perla* ex utraque facie convexas esse hujusmodi massulas scribit, Cl. HOOKIUS in oculo *Libellæ*, vel *Perlæ Moufeti* 14000. hujusmodi intersectionum numeravit. *Mordellæ* 25088. adtribuit sub nomine distinctorum ocellorum LEEUWENHOEK, 50. *Formicis*; 8000. *Muscis* BONNANI, & KIRCHERUS. *Crassities corneæ Insectorum*, *Apum* præcipue, sat notabilis est, atque Cl. LYONET apud LESSERS maxime miratur de humida, & tenera cornea in *Phalangiis* a Cl. HOMBERGIO notata, est enim semper in *Insectis* crurum donatis squammosa, & sicca, ut nuper observabam in *Grillo* - *Talpa*.

(XVII)

Inter memoratas divisiones collocati sunt illi pili, qui super oculo observantur, qui quidem firmissimè, similiter, ac capilli nostram cutem penitus totam perforant. Acuminati autem assurgunt, & vel triplo, quadruplove sunt longiores diametro singularis cujusdam divisionis hexagonæ: fabrica fetas emulantur, figuraque gaudent tereti, infra tamen crassiore; Satis etiam ingens est eorum numerus, quamquam divisionum numero inferior; interim tamen adeo densi confiti sunt, ut spississimam pilorum sylvam super oculo videantur constituere. Eadem pene observantur in *Papilionibus coloratis diurnis*.

(XVIII)

Hujusmodi ocellorum cumuli, plusquam duplices, ut plurimum observantur, quoddam *Ephemerarum* genus, quatuor datur *reticulatis* oculis; In *Muscis* præter duos *reticulatos* superiores, duo alii inferiores, & simplices habentur sub fronte; in aliquibus *Araneis*, undique desuper *occipitis* verticem,

ticem, octo observantur, in aliis solummodo duo: in *Antennis Papiliones* aliqui oculos habent, in cornubus majoribus *Lymaces*.

(XIX)

Quæ mox *Scleroticæ* subjacet interior oculi tunica, *Anatomici Choroidem* appellant, quum multis sanguineis vasculis, veluti *Foetus tunica*, quam *Chorion* nominant, sit referata, vel propterea quod *scleroticæ*, veluti *Chorion* utero adhæreat.

(XX)

Quo autem pacto *Dura Mater scleroticam*, ita *Choroideam Pia Mater* comparat, postquam enim per longitudinem nervi *optici* progressa est, inter ejusdem filamenta, pluribus longitudinalibus plicis se intromittens, pervenit tandem ad ejus conii terminum, qui in fundo oculi est, illicque inde expanditur super *scleroticæ* concavitatem usque ad anteriorem oram ejus majoris segmenti, ubi circumquaque connectitur, & adhæret per unius lineæ altitudinem, ex quo circulo extrema *Choroidis* zona cinerea evadit, aut etiam albescit, eamque *ligamentum* vocant *ciliare*; Ab ea porro zona, non in *corneæ lucidæ* concavitatem continuatur, sed versus oculi axim convertitur, ei illud præstans, quod *telescopiis*, ut ajunt *diaphragmata*.

(XXI)

Hoc *diaphragma*, seu septum a pluribus *Anatomicis Iridis*, seu *Uvæ* nomine insignitur, non vero semper ita diversicolor est, ut *Iridi* comparari possit, neque illius solum coloris, ut *uvæ acini* colorem referat, quamobrem suæ constitutionis ratione oculi *diaphragma* potius dicendum existimarem; Ejus porro foramen ellipticum est, cujus major arcus ab exteriori latere manet, quod quidem in *Bobus* jam notaverat *FABRICIUS* ab *AQUA PENDENTE*, aves porro, & pisces ut plurimum omnino rotundum habent, & ex quadrupedibus nonnulli, ut præcipue *Feles* ad varias fi-

guras contrahunt. *Pupilla* hujusmodi foramen dicitur.

(XXII)

In quadrupedibus plurimis convexum est hoc *diaphragma*, præcipue in iis, qui maximos habent oculos, hinc docente GALENO, qui si Historiæ fides, duo solum humana cadavera incidit, neque forte eorundem oculos, tum in Homine convexum fecere, VESALIUS porro, & P. F. AQUILONIUS planam descripserunt, quemadmodum revera est in Humano Genere; tum quoque in Animantibus, atque Hominibus amplitudine variat, in illis autem magis, quam in istis.

(XXIII)

Duabus lamellis, quæ facile separari possint hæc tunica constructa perspicitur, quibus tertiam perperam addit recens Scriptor; Harum utraque nigra passim ab Anatomiae Scriptoribus describitur, imo etiam nigerrima quæ interior est; Porro si attramentum, quo infectæ sunt hujusmodi lamellæ excutiamus, videre contigit in puerulis, impense cinereo-obscuram esse, minus autem ad ætatem xx. an., & ad xxx. grisei esse coloris, atque in provectiore ætate magis, magisque albescere, ita ut in sene octuagenario pene omnino albescens videatur, quæ quidem colorum discrimina in eo attramento quoque contingunt, ut perpetuo crescente ætate magis dilutum appareat. Est porro hæc tunica satis nigra multis in avibus, atque quadrupedibus, in aliisque multum variat alterutra lamella; Quæ proprie *choroides* dicitur, flava erat in Leone PARISIENSIIUM, altera porro, quæ *Tapetum* dicitur aurea in medio, & versus extrema virescens, itemque Isabellina in Leena; Ea spadicea in *Cato Pardo*, altera albedinis subcerulæ in *Lynce*, item alterutra perlacei, spadicei, violacei, rubri coloris, in his, aut illis animantibus, in hac aut illa *Choroidis*, vel *Tapeti* parte, ut in *Dama*, *Gazella*, *Tajacu*, *Coati Mondo*, *Bove*, *Hirco* &c.

(XXIV)

(XXIV)

Choroides tunica juxta nonnullos anteriorem laminam habet ab *Arachnoidea* tunica nervum opticum circumvolvente, altera porro, seu exterior ab ipsa *Pia Matre* producitur, hæc ad oculi fundum, itemque ad *ligamentum ciliare*, invicem sat firme neſtuntur, & per reliquum ambitum ſi immittatur aer, ſat libere vagatur, utpote lamellæ minus invicem cohæreant, niſi interdum vaſculis, & nervulis, quorum aliqui egrediuntur, & ingrediuntur alii in firmum contactum retineantur, ad id etiam maximam opem conferente ſubjectorum humorum cumulo, quod item de *ſclerotica* dicendum.

(XXV)

Fibris quoque rectis, & antrorſum pergentibus conſtructa eſt hæc tunica, quarum aliquos interdum faſciculos per externam præcipue lamellam ab rectarum linea non nihil declinare obſervabamus, craſſioresque ut plurimum occurrunt ad oculi fundum, itemque propius *ligamento ciliari*; at craſſiores hujusmodi fibræ, magisque ad carneam naturam accedentes in *diapbragmate* obſervantur, quarum aliæ longitudinales ſunt, a *ligamento ciliari pupillam* verſus, aliæque circulares, quæ extremam *diapbragmatis* oram circum *pupillam* ambiunt, ad dimidiæ lineæ amplitudinem, & aliquando ultra, quod interdum ex alterutra *diapbragmatis* facie variare obſervavimus: itemque dum anterior *diapbragmatis* lamella plana omnino eſt, poſterior plurimas conficit longitudinales plicas, quæ ab Anatomicis *proceſſus ciliares* vocantur, nos autem *plicas*, incipiuntque hujusmodi plicæ a *ligamento ciliari*, producunturque ad *pupillæ* oram, & ex utraque parte conicæ ſunt, ita ut major earum circulus communis ſit; numero, & amplitudine variæ, ut plurimum ſunt, & inſtanti, & alicubi aliquando abſuiſſe invenimus.

(XXVI)

Vaſculoſiſſimam eſſe *Choroideam tunicam* ſuperius dicebamus, imo pene ſanguinolenta aliquando apparet, ejuſdem

vasculis sanguine turgentibus. A *Carotide* nempe interna, illic ubi magnum, lacerumque *apophysis petrosæ* ossis *temporalis* canalem subit, ultra eas, quas init flexiones, ad latus *sphenoidis sellæ*, præter reliqua ad vicinas partes accedentia vasa, per *sphenoidalem orbitæ* fissuram, duo ut plurimum arteriosi ramusculi prorepunt, qui primum *pampiniformi* lusu, nullo pacto HOVIANO reticulo simili nervum *opticum*, cæterosque proximos nervulos, qui eandem fissuram adeunt, circumambientes, in ramusculos alios inde partiuntur, & perforata *sclerotica* inter utrasque *choroidis* lamellas intercipiuntur.

(XXVII)

Numero quatuor, ut plurimum sunt, aliquando decedunt, atque iis lamellis ita interceptæ, mirabilem comparant vasorum contextum; vascula nempe exporrigunt minutissima, quæ circunducuntur veluti extremorum digitorum cutaneæ fibrae, unde forte STENO, vasa *vorticosa* appellabat; non nulla porro etiam aberrant in minus absolutam curvitatem, & ex vorticis ductu aliquo pacto deflectunt, atque præcipue ex iis aliqua in *scleroticam* immittuntur, atque in *Retinam* tunicam alia: maxima vero horumce omnium vasorum pars desuper internam lamellam plurimas, itemque exiguissimas *vasculares*, ut ajunt stellas componit, tamquam totidem radiosos penicillos, qui certe *villosam* hanc lamellam constituere videntur, atque ita vasculosissima efficitur hæc tunica, quibus certe sanguineis vasculis, *Lymphatica* quoque intermiscuntur arteriosa, atque venosa.

(XXVIII)

Quæ vero ab oculi fundo ingressæ fuerint sanguineæ arteriolæ, præstitis iis omnibus ramusculis, recta adhuc pergere sequuntur, donec ad summam *choroidis* partem illic, ubi in *diaphragma* plicatur, ex interna porro facie pervenerint, ubi circum ipsum, *ligamento ciliari vascularem coronam* subtendunt, quam Anatomici *circulum arteriosum* vocant, ex quo tamen, vix ulla non nihil serpentina sanguinea vascula

in *diaphragma* exporriguntur, deflectuntur porro alia in *choroidis* subjectam partem, alia inter *ciliaris ligamenti* lamellas protrahuntur, & *scleroticam* alia ex ea parte perforant. Iisque totidem respondent venulae, quae inde sub arterioso, *circulum* alterum *venosum* comparant, ex quo aliae conspicuiiores venulae producuntur, quae inde *vorticosas* arteriolas insequentes, eodemque pacto conductae, prodeunt tandem ab posteriore oculi parte in *sinus*, quos *orbitarios* vocant, *cavernosos*, atque *petrosos*, circum *nervum opticum* pampiniformem lufum, magis quam arteriolae perficientes. Uterque memoratus *circulus* flexuosus, & crispus est, ita tamen, ut unius *flexuositates* in alterius angulos interjiciantur.

(X XIX)

Sanguineis hujusmodi vasculis *lymphatica* quoque intercipi superius dicebamus, & ea quidem non minus, quam sanguinea deficiunt, atque duplicis ordinis sunt, *arteriosa* nempe, atque *venosa*. Ea per universam *choroidis* internam, externamque faciem admodum exilia, pellucida, non nodosa protrahuntur, ramosque exporrigunt, quorum non parvus quoque est numerus, passimque vario modo implicantur, etsi in directum ut plurimum excurrant, atque anastomoses inter se se alicubi ineunt. Facta per *ophthalmicas* superius memoratas arterias fusi glutinis injectione, haec quoque vascula, etsi non universe, passim pervaduntur. Horum nulla in *scleroticam* abiisse vidimus, plura vero in *retinam*, hinc in *vitream tunicam* insinuata, inter ejusdem *cellulas*, *capsulamque lentis crystallinae* finire videbantur; Horum pauca *circulum arteriosum* praetereunt, atque vix ulla inter *processuum ciliarium* plicas sinuantur.

(X XX)

Nihilominus hujusmodi vasculorum plurima per *diaphragmatis* superficiem observare contingit, quae certe a *circulo arterioso* exoriuntur, *pupillam* versus inde producta: Plus quam alibi illic multiplicia sunt, & vix dimidia lineae longitudine

emetita, in miram ramusculorum quantitatem abeunt, ita ut alii aliis supersternantur, vel quam proxime adcumbant, quapropter ab iisdem constitutum *diapbragma* videatur, atque dum se se iterum, iterumque dividunt, cum truncis, a quibus prodeunt, angulos acutos, in *pupillam* converfos faciunt, implectuntur, & passim anastomoses invicem ineunt, certe arcuatas, quemadmodum *meseraica* sanguinea vasa, serpentesque quaquaversum *undatum* hic, illic efficiunt diaphragma, priores rami, diversas directiones tenent, nonnulli, quos magis propinquos habeant ramulos intersecant, seseque in dextram, sinistramque partem demittunt, tum majoribus ramulis ad *pupillam* in directum porrectis; hi tenues sunt ad instar fili xilini nondum neti, atque ex interna *diaphragmatis* facie non nulli in *hyaloidem crystallini* tunicam producti videntur, atque tenuissimi per ejusdem anteriorem faciem perrepunt, anastomosis illic etiam invicem injuncti, quod non semel nobis videre contigit.

(XXXI)

Ita certe apparent in oculo adhuc recenti hujusmodi vascula, atque exercitatus Anatomicus in viventis oculo eadem quoque perspicere potest, si oblique contra lucis radios, nitidos alterius perspiciat oculos, idemque quisque ex hac nostra descriptione assequi potest, si metallicum concavum speculum ob alterutrum oculum ponat, altero clauso, at longe optima *Encheiresis* est, si vivo cani *jugularem* venam prope cranium devincias, tunc enim intumescente oculo, eadem quoque vascula luculenter intumescunt, & nos certe singula, quæ vidimus, minus luculenter, quam videre contigit descripsimus.

(XXXII)

Venæ autem *lymphaticæ* in hac tunica, ex utraque quoque lamella apparent, ubicumque paullo crassiora, albida, nodosa, seu exiguis distincta internodiis, atque alicubi ad similitudinem quadantenus vitis capreolorum inflexa, ut dudum

dum observavit Cl. MORGAGNIUS, *anastomoses* quoque ineunt, atque nonnullæ è *vitreae* tunicae lamellis prodire quoque videntur, itemque ab *lenticulae crystallinae* capsula. In *diaphragmate* pauciora videntur, quæ nulla certe proportionem arteriarum numero respondeant: Harumce fines attingere non valui, atque an ex aliarum partium exemplo iudicandum sit, videant alii.

(XXXIII)

Sciunt omnes quemadmodum *diaphragmatis* anterior lamella, vario in variis colore, albido, cinereo, rubro, nigro, cæcio, cæruleo, griseo, subfusco elegantissime, *uniformiter* aut per maculas depicta videatur, vascula porro, aut fibras, quæ iis coloribus inficiantur non agnoscimus, certe in morbis variat, itemque aliquomodo in animi pathematibus alteratur, atque *lymphatica* superius memorata vascula ab iisdem distincta perspiciuntur, etsi utraque eisdem pene implexus ineant; Cæterum aliquando perspexi subobscurè lutea hujusmodi vascula in exquisitè *lymphaticas arterias* continuatas fuisse, item alia non nulla cæcii coloris, quidni forsan idem de omnibus aliis? Non facile porro assentimur iis, qui ex hujusmodi fibris carneas effici fibras scribunt.

(XXXIV)

Quemadmodum per has partes distribui cernebamur sanguinea vasa, eadem ferme ratione se habent nervuli: Ab *ganglio* nempe lenticulari, ex nonnullis brevibus ramusculis rami *orbitalii*, sive *ophthalmici quinti paris* inter externum, & superiorem musculum rectum coalito, atque ab quodam ramusculo *nervi tertii paris* quædam producuntur filamenta desuper nervum *opticum*, quæ quum pervenerint ad oculi globum, inter se se dividuntur, & quinque, vel sex alios conficiunt, qui ex oculi fundo a *sclerotica* in *choroideam* subeuntes, cum memoratis sanguineis vasis consociantur; cum iisque ramulos quoque suos distribuunt, prodeuntes inde ad
dia.

diaphragma, ubi in tenuissima filamenta abeunt; at notandum insuper est ramulos a *ligamento ciliari* ad *scleroticam* immisos in causam esse, quapropter adeo firmus fit ejus *ligamenti* cum *sclerotica* coalitus, imo observamus ab hisce nervulis *plexum* illic præstari, cum *sclerotica* æque, ac cum *ligamento ciliari* intertextum. Ubi ergo ille annulus griseus, & mobilis, quem in hac *choroidis* zona describunt?

(XXXV)

MERYUS, ille hypothefibus adeo facilis MERYUS, alique per internam *diaphragmatis* faciem, itemque per *choroideam*, *glandulas* minimas observavisse scribunt, quas porro, omnino refutavit Cl. HEISTERUS, & certe nuspiam sunt, nisi *glandulas* dicere vellimus exiguissimas, ita dicam, vasculorum *varices*, quæ in adeo vasculosa tunica, non difficile contingere possunt, & quidem quum vivo Molosso *jugularem* venam, unius solum lateris funiculo devincissem, qui ex hujusce latere erat oculus, *choroidis* præcipue venulas *varicosas* habebat, non æque porro oculus alterius lateris.

(XXXVI)

In avibus *choroidi* substernitur membrana quædam, quam *Marsupium nigrum* vocant, quæ certe nigerrima est, neque calicem efficit, at ex nervo *optico*, ut plurimum solum ex superiore parte concavitatis oculi protrahitur, figura *rhomboidea*, ex cujus superiore alterutro angulo, fibrilla albida, tenuissima educitur, quæ in *hyaloidem crystallini* tunicam continuatur, eaque deficit in *Ave Saltatrice*: ego autem in *Ulula* fibris quibusdam subobscuris, quæ è nervo *optico* prodirent, contexi observavi, quibus certe, fibræ omnino carneæ erant interjectæ.

(XXXVII)

Tertia interior oculi tunica a *medullaribus* nervi *optici* fibris super *choroidem* distributis ex maximâ parte præstatur; quapropter pellucida, atque maxime mollis observatur; Quum nempe nervus *Opticus* ad oculi fundum ex interiore latere

latere pervenerit, comprimitur, constringiturque ab *Dura Matre*, quæ *scleroticam* factura, *circularem plicam* ipsi circumten-
dit, atque ad hunc constrictionis locum in *tuberculum conicum* nervus *opticus* evadit, circum quem super *choroidem*, *medullares* fibræ demittuntur, usque ad *interiorem ligamenti ciliaris* oram tenuissimæ; Non oriuntur porro *Retinæ* fibræ ab illius *tuberculi* vertice, sed potius circumquaque ejusdem basim, eo tamen modo, ut *foveolam* circum coni basim observemus, quam jam agnoverat FABRICIUS ab AQUA PENDENTE tum etiam videmus, quod scripsit ROLFINCIUS, nervum nempe *Opticum* crenato quoddam margine, in exigua filamenta fissum videri, hæque crenæ longitudinales sunt, atque ab iisdem memoratæ fibrillæ prodeunt, nullo inde pacto retem aliquem conficientes, immo tamquam totidem radii producuntur, mucagine quadam *medullari* invicem adjunctæ; crassiores ad *Optici* tuberculi basim videntur, crassiorique *meduloso* muco coalitæ, tenuioresque ad *ligamentum ciliare* producuntur, immo etiam aliquando sub *Diaphragmate* reflectuntur super crenas, a *plicis ciliaribus* in anteriorem humoris *vitrei* ambitum impressas.

(XXXVIII)

Memoratus tuberculus foraminulo quodam pertusus observatur, quod tamen nihil aliud esse certo scimus, quam *cavitatem* illius arteriolæ; quæ per longitudinem nervi *optici* percurrit, se inde in oculi cavum super *retinam* pluribus suis ramusculis expansuram, quæ porro aliquando *anastomoses* iniisse vidimus cum iis arteriolis, quæ ab *choroide* in *retinam* prorogari superius (N. XXVII.) dicebamus; Præter eam autem, aliæ plures, quæ circum nervi axim, magis ex hoc, vel illo latere prodeunt, aliquando observare contingit, quæve inde longe, lateque, & ad omnes quidem plagas per *retinam* se extendunt, ex quibus pene vasculosa tunica efficitur, itemque retiformis; iisque venulæ quoque adjunguntur, quæ pariter ab oculo prodeuntes nervi *optici*, ita dicam vir-

gulis intercipiuntur, atque harumce vârices fuisse crediderim cavernulas sanguine repletas, quas invenerunt in Dromedario PARISIENSES Zootomici (*).

(XXXIX)

(*) Quum hæc Dissertatio conscripta fuerit, ut antecederet novam Optices Theoriam, quam prope diem æditurus erat Ingeniosissimus, atque doctissimus Amicus meus FRANCISCUS CARAMELLI, cujus mortem adhuc lugent omnes boni; ne aliquid in hac re Physiologo desideraretur, Nervi quoque optici Historia traddebatur, quam ego ob eandem rationem adjiciam, si enim ad meliorem fortunam aliquando convertar, eandem materiam, aliqua certè novitate pertractabo.

Nervi optici oriuntur ex parte posteriore, & inferiore jugorum medullarium, quæ tertium, seu medium cerebri ventriculum comprehendunt, quæque nervorum Opticorum Thalamos vocant; principio veluti triplici gaudent, quorum duo, tamquam geniculata ad latus exterius extantiarum, quas quadrigeminas, aut natiformes, & testiformes appellant, occurrunt; tertium vero tenuis instita est, admodum plana, & in extrema parte aliquando veluti penniformis, quæ curva ibidem inflectitur: ex his instita alia, & major continuatur, quæ levi acclivitate circum inferiora, & externa thalamorum latera ad partem anteriorem, superioremque annularis protuberantiæ prosequitur, ubi ad teretem figuram utraque jam magis accedit, atque in quadratam aream inde conjunguntur, imo etiam decussari non nulli contendunt, quod tamen falsissimum, namque VESALIUS, RIOLANUS, & SANTORINUS in Cadaveribus, qui altero oculo orbati fuerant, nervum ejusdem oculi opticum ex eodem semper latere usque ad thalamum, magis gracilem, cinereum, aut livescētem invenerunt, dum tamen alter juxta Naturæ ordinem a principio usque ad finem esset, quum in oppositam læsio nervi deferri deberet, si ita decussarentur, idque ego etiam nuper vidi, & demonstravi pluribus Medicinæ Doctoribus, atque Chirurgis: Post hunc coalitum, omnino teretes, atque ita crassi,

ut

(XXXIX)

Cæterum si summa diligentia *Retinam* tunicam considerare-
mus, ejus fibrillas, atque *medullarem* mucaginem membrana-
ceo quodam præter modum subtilissimo strato suffulciri vi-
demus, quod certe factum videtur ab illis membranaceis cel-
lulis, ex quibus *cellulosam*, spongiosamque nervorum fabri-
cam aliqua ex parte confici docuerunt WILLISIUS, COWPE-
RUS, DU VERNOI, aliique. Præterea in optime conglaciato oculo, per *retinam* tunicam, tamquam per *talcum* nonnulla pellucida exigua vascula, ab ipsa memorati tuberculi regio-

I 2

ut tres, aut quatuor lineas diametro æquent, aut etiam superent, oblique ad orbitam feruntur, per eamque ad oculi fundum per-
tingunt, magis, aut minus ex interno latere, quod versus nasum est, semper tamen ex eodem in Homine, aliisque animantibus, etsi in Herinaceo, & Vitulo Marino, oculi axi respondeant, cum oculo continui. Hi nervi ab exortus loco corticalem, seu *einc-ream* substantiam internam habent, medullarem, & candidam externam, fibrillisque tenuibus, gracillimis, ejusdem structuræ, constructi videntur usque illuc, ubi orbitam penetraturi a Dura Matre, vaginam fortem obtinent, atque illic fibrillarum funiculi crassiores videntur, tamquam virgulæ, & *cerebrosam* ita dicam materiam, omnino præseferunt. BULFFINGERUS a DU VERNOI rogatus acuratissimum de iisdem examen instituit, optimis certe microscopiis, at nihil ultra observavit: MALPIGHIUS in pisce *Xiphia* nervum opticum describit ex medulla albæ cerebri substantiæ, in plicas adactis, quo explanato sat ampla haberetur placenta omnino medullosa; in Bove autem virgularum fasciculos animadvertibat, itemque in homine, aliisque animantibus: Utræque autem, plicæ nempe, aut virgulæ sanguinea intercipiunt vascula, de quibus Num. XXXVIII, atque inter se se connectuntur, vel ligamentosis ita dicam fibris, a Dura Meninge eductis in transversum, aut obliquum, vel etiam virgulis aliis gracilioribus, & lateraliter discurrentibus, quæ elegantissimum, & ordinatissimum retem conficiunt.

regione protracta observavi, quæ lymphatica crediderim; Ramusculos ex iisdem non vidi, at vidi certe in aliis oculis *lymphatica arteriosa, atque venosa* vascula in *retinam ex choroidæ*, aut in *choroidem ex retina* evasisse, aliquo etiam habito cum *cellulis humoris vitrei*, aut *crystallini* commercio.

(XL)

Oculi cavitas tribus humoribus occupatur, quorum posterior *Vitreus* dicitur, medius *Crystallinus*, anterior *Aqueus*. Humor *vitreus* limpidissimus est, faciemque refert limpidi *vitri* fusi, ejusque guttulæ continentur in cellulis cujusdam subtilissimæ, atque pellucidæ *capsulæ*, quam *Vitreæ*, *Hyaloidem*, vel *Araneam* vocant, in quibus certe conclusus majoris densitatis, tamquam ovi albumen evadit, dum tamen a cellulis effusus, limpidissima, & liquidissima aqua stillatitia videtur, cujus porro densitas est ad aquæ densitatem :: 1024: 1000., vel 1029: 1000.

(XLI)

Humor *vitreus* majorem oculi capacitatem occupat, nempe illud fere omne spatium, quod est ab oculi fundo ad *processus ciliares*, atque in centro concavitatem habet, in qua posterior *crystallini* humoris pars continetur: *Vitreæ* tunica duabus constat lamellis, quarum exterior immediate desuper *retinam*, capsulam conficit, in qua non solum *vitreus* humor, sed etiam *crystallinus* continetur, adtenditurque utriusque humoris anteriori faciei, atque circum *crystallinum* lineolis quibusdam nigris crenata videtur, hæque sunt *processum ciliarium*, quæ ipsi adcumbebant vestigia.

(XLII)

Interior *vitræ* tunicæ lamella plurimas cellulas, aut irregulares vesiculas conficit, in quibus humor *vitreus* continetur; Hæ cellulæ adnotante Cl. DEMOURS; invicem communicantes sunt, grandioresque exteriorem lateralem *vitræ* humoris superficiem tenent, reliquis eo magis gracilescunt, quo magis ab iis recedunt; hæ postremæ magis

gis compressæ , longiores , latioresque sunt ; atque aliquo ordine , tamquam radii circum centrum posterioris partis humoris *crystallini* dispositæ , latiores versus *retinam* , ad oculi axim acutæ observantur ; quæ anteriorem *vitrei* humoris partem adimplent , gracillimæ sunt , atque *poliedros* præstant , quos Cl. WALDSCHMIDT *parallelepipedæ* dixerat , sunt tamen irregularis figuræ .

(XLIII)

In anteriore diximus concavitate *vitrei* humoris ad *pupillæ* foramen , *crystallinus* humor adidet , qui in serpentibus , & piscibus , pene sphericus est , lenticularis autem in Hominibus , & avibus , & præ reliquis animantibus minus ex utraque facie convexus in Homine , & simia ; in *Vitulo Marino* , aliisque *amphibiis* lentis inter , & globi habitudinem accomodatur , observante Cl. POTERFIELDS .

(XLIV)

Circumferentiam rotundam emulat , quam tamen Cl. PETITUS in aliquibus hominibus ex uno latere , quarta parte unius lineæ circuli ordinem excedere observavit , & certe , ut ipse vidi ex eo latere , ubi *pupillæ* foramen majorem arcum habere superius dicebamus . Diametrum per sæpe habet in Hominibus 4. linearum , vel 4. cum $\frac{1}{4}$, & 4. lin. $\frac{1}{2}$, rarius vero 3. lin. $\frac{3}{4}$ in adultis , at sæpius 3. linearum $\frac{1}{4}$ in pueris . In adultis crassitiem habere solet 2. lin. $\frac{3}{4}$ aliquando 1. lin. $\frac{3}{4}$, sed in pueris 2. linear. $\frac{1}{2}$

(XLV)

Convexitas anterior lentis *crystallinæ* in homine portionem spheræ efficit , cujus diameter est 6. linear. $\frac{1}{2}$ usque ad 9. lineas , tum aliquando etiam 12. linear. .² Nonnullæ quoque reperiiebantur in hominibus ætate provectis , quæ certe ex anteriore parte pene plane videbantur per longitudinem 2. linear. , & quarum convexitas videbatur portio
sphe.

sphæræ , cujus diameter esset 25. , aut 30. linear. , quod certe rarissimum est. Reperiuntur etiam aliquæ , solummodo 5. linear. $\frac{1}{2}$ quod æque rarum est, nisi ex pueri oculo desumptæ fuerint. ²

(XLVI)

Convexitas posterior portionem sphæræ exhibet , cujus diameter est 5. linear. , raro 5. linear. $\frac{1}{2}$, atque etiam 4. linear. $\frac{3}{4}$, nisi quoque a puerulo desumatur ; aliquando etiam ex utraque facie æque convexa apparet lens *crystallina* , tum in uno, eodemque homine , ex altero oculo in anteriore parte magis erat convexa, contra vero in altero . Cæterum generatim cum KEPLERO statuere possumus, anteriorem lentis *crystallinae* partem segmentum *spheroidis* esse , circumductione *ellipseos* circum ejus *axim* factum, posteriusve , segmentum *conoidis Hyperbolicæ* a rotatione *hyperboles* circa suum *axem* productum .

(XLVII)

In hominibus lens *crystallina* pellucet , nullum prope modum referens colorem, usque ad ætatem XXV. annorum, hinc præcipue in centro , luteo colore leviter infecta apparet, qui certe late per ipsam expanditur ineunte ætate , magis, magisque , inde luteo colore crescente , & versus *peripheriam* expanso, immo in senibus aliquo modo , *ambrae* colorem refert , nec certe in utroque oculo semper æque intensus occurrit: In infectis demonstrante PUGET *hexagonis corneæ* divisionibus , totidem respondent *crystallinae* lentes , quæ porro aurei, argentei , citrini , aut viridis coloris apparent , atque in causa sunt eodem colore pellucere *hexagonas* divisiones . Idem PUGET *crystallinam* lentem pellucidam , ad Solis radios *cerulei* coloris apparere scribit, viridis autem ad *candelæ* lumen , tamquam Zaphyrus .

(XLVIII)

Item in junioribus , magis ad liquiditatem accedit lens
crys-

crystallina, atque in foetu adeo mollis est, ut *gelatinæ* comparari possit, ineunte porro ætate, ejusdem soliditas crescit ex quodam interiore nucleo, quapropter si exsiccantur plures hujusmodi lentes, $\frac{2}{3}$ aut $\frac{3}{4}$ evaporantur, atque intus cavæ reperiuntur, vel ad alterutram, aut utramque faciem excavantur, quod præcipue in junioribus, atque foetibus contingit; Verum si exsiccantur lentes *crystallinae* hominum L., vel LX. annor., nullo pacto alterutra facies excavatur, at solummodo in auram abit tertia, vel quarta pars sui voluminis.

(XLIX)

Crystallinae ergo lentes, quæ in junioribus adeo molles sunt, crescente ætate firmiores evadunt, ita ut in homine XV., aut XX. annor., *crystallini* firmitudo æqualis undique sit; pars inde, quæ centrum occupat ad ætatem XX., aut XXV. annor. firmior evadit, quæ certe firmitudo etsi ad circumferentiam protendatur, centri tamen inquam nucleus firmior semper est. CL. WINTRINGAM expertus est integræ lentis *crystallinae* è capsula solutæ densitatem esse ad aquæ densitatem :: 1106: 1000., interioris autem ejusdem nuclei densitatem esse ad aquæ densitatem :: 1148: 1000.. Hujusmodi autem densitatis ratio, non eadem semper est, neque in utraque ejusdem hominis lente, invenimus enim perpetuo sequi rationes n. XLVIII.. Lens *crystallina* in homine est ad pondus 4. gr. in adultis, aliquando 4. gr. $\frac{1}{4}$, & 3. gr. $\frac{3}{4}$, atque in puerulis erat 3. gr. usque ad 3. gr. $\frac{1}{2}$

(L)

Nonnulli *crystallinam* lentem describunt, veluti factam ex stratis invicem adjacentibus, & superpositis, quæve comparantur ex fibrilla ab anteriore parte ad posteriorem plicata, & ab hac ad anteriorem, iterum, iterumque conductâ; & hujus quidem sententiæ esse videtur PETITUS, atque hujusmodi strata, melonum costulis comparat, vel ceparum pelliculis, at quum diligentissime in hujus structuram inquire-

rere-

reremus, ejusdem lamellæ oblongæ videbantur; atque eæ, quæ anteriorem, & posteriorem superficiem adimplent, antèrius magis, quam posterius planæ apparebant, intermediæ quidem minus longæ, magis rectæ, veluti circuli radii, in *crystallini* centrum convergebant, committebanturque tamquam invicem adjectarum ferrarum dentes; atque quum acutissimo cultro, ex altitudine *crystallinas* lentes dividerem, ejusdem lamellas non nihil *parallelipipedas* observabam; tum etiam in muliere XXVIII. annor., quæ centrum occupabant lamellæ, magis erant pellucidæ.

(LI)

Tunica *Arachnoides*, quæ *vitreum* continere diximus, antèrius ad lentis *crystallinæ* horizontem, veluti in oculi *axim*, duplicata, *capsulam* conficit, in qua eadem lens continetur; hanc ceparum cuticulæ comparabant GALENUS, atque VESALIUS, at in homine ex anteriore parte non multum telæ *araneæ* crassitiem excedit, hinc etiam subtilior est in parte posteriore, ideoque lens *crystallina* in parte posteriore perispecta, dum adhuc in sua capsula continetur, magis pellucida apparet, in brutis vero major capsulæ crassities, ejusdem pelluciditatem non imminuit, imo etsi crassior, est tamen magis, quam in homine pellucida; Hujus capsulæ densitatem ad aquæ densitatem facimus :: 1046: 1000.

(LII)

Ad ambitum lentis *crystallinæ*, exiguum canaliculum, ex duplicatione tunicæ *hyaloidis* præstitum observamus, quem circum, circum, per altitudinem plicatum semper notavimus, isque canalis præcipue observatur, quando ex alterutro latere per tubulum aere impletur, atque vascula lymphatica, quæ a tunica *choroide* desuper *crystallinam* lentem producuntur, in causâ sunt memoratarum plicarum, propterea quod ea utrinque firma, & coalita aeri subtercurrenti, non adeo facile cedant, si porro sine hujus canalis lesione a sua *capsula crystallina* lens extrahatur, nullo pacto, nullo aeris impetu

tu in memoratas plicas hujusmodi ductus evadere potest, deficientibus frenis ob memoratorum vasculorum lacerationem, ex detracta *hyaloidis* tunicæ parte.

(LIII)

Tunc autem hujusmodi canalis ad majorem amplitudinem extenditur, atque ut plurimum $1\frac{1}{4}$, aut $1\frac{1}{2}$, & 2. linear. latitudinem habet, nec quidem major est in majoribus animalibus, quemadmodum in Bove, quod forte ex *crystallini* figura ad globosam magis accedente pendere existimamus; Raro aere, aut ullo alio liquore turgidus invenitur, aliquando porro observavi, quod si postquam in aquam per duos, aut tres dies *vitreum*, & *crystallinum* detinuissem, posteriorem inde humoris *vitrei* partem in anteriora apprimerem, tenuissima limpha aliquando turgeret, atque aliquando per hunc capaliculum aerem insuflans, tunicam ipsam *hyaloidem* humorem *vitreum* involventem luculenter insuflari observavi.

(LIV)

Magister JANUS, & Cl. MORGAGNIUS observarunt, quod perforata tunica *hyaloide* in vitulis, aut bobus, sive recens, sive non ita recens occisis illico humorem quemdam aqueum prodire, quod & in homine contingere animadvertimus, & quidem hocce humore, ex vulnerata *hyaloide* defluente, eadem tunica continuo corrugatur, aut flaccescit. Hic humor limpidus est, & liquidissimus in *Homine*, *Cane*, *Fele*, *Lupo*, *Lepore*, *Vervece*, *Agno*, *Vitulo*; at in *Bove*, & *Equo* majorem visciditatem habet. Hujusce humoris quantitatem in alterutro oculo majorem esse non semel observavi, aut etiam omnino deficere, deficiebat in quibusdam avibus nocturnis, quas recens incideram: An a vasis lymphaticis, quæ superius N. XXX. memorabamus, a *diaphragmate* in *crystallinum* productis extillari dijudicandum? Certe in iis canibus, quibus jugularem venam ligaveram (N. XXXI) majorem huius hu-

moris copiam observabam, imo in aliquibus ipsam *hyaloidem* tunicam, nimia hujus liquidi copia disruptam fuisse conjiciebam; cellulas vero omnes, tum penitus quadam veluti mucagine obliniri, in adultis præcipue observatur, seu crassiori liquido, quod dudum in cane carcaria observaverat STENO, & revera id magis in piscibus, & amphibis conspicuum est.

(L V)

Præterea non semel observavi aliquam illius liquoris copiam in anteriore humoris *vitrei* parte, qua posterior lentis *crystallinae* pars adhæret: erant liquores guttulæ extra cellulas, atque pro certo habeo, nullas *vitrei* cellulas, ex quibus hujusmodi liquor prodiisset disruptas fuisse. Quid porro si *vitreus* humor sibi relictus hujusmodi liquorem exsudat e cellulis, quæ ne quidem lesæ fuerint, atque in nonnullis hominibus, aliisque animantibus, adnotante VALSALVA *vitrei* loco, *aqueus* humor inventus fuerit?

(L V I)

Ex *Retinae* artericlis (N. XXVII., & XXXVIII.) in *hyaloidem* tunicam, nonnullæ protrahuntur, tenuissimæ, neque admodum ramosæ, quæve non solum per ejus tunicæ externam faciem perrepunt, verum etiam inter ejusdem cellulas, per *vitreum* & *crystallinum* protrahuntur, iisque pene totidem respondent venulæ, venarum *choroides*, aut *retinae* soboles, vel in nervum *opticum* continuatæ; In lepore, canibus venaticis post laboriosissimas excursions enecatis inter humoris *vitrei* cellulas, itemque *crystallinae* lentis capsulam effusi sanguinis guttulas, tamquam cinnabarina puncta observabam.

(L V I I)

Reliqua tandem oculi cavitas, quæ ab lente *crystallina* ad *cornea lucida* ambitum metitur, liquore adeo tenui, limpidoque repletur, ut *Aquei* nomen habuerit, immo propterea quod in glaciem non converteretur ex *catopardo* spirituosum, aut *ethereum* vocabant PARISIENSES; hic non

in capsulis collectus, sed effusus subter, & super *diaphragma* constat, citoque regeneratur, si a *corneæ* vulnere effluat, densitatem habet ipsa aqua minorem, nempe :: 975., vel $9\frac{3}{2}$: 1000., crescente porro ætate majoris densitatis evadit, pene :: 990., vel 992: 1000. viscidior est in Bove, Vervece, Erinaceo.

(LVIII)

Ea pars cavitationis oculi, quæ ab anteriore facie lentis *crystallinae* ad anteriorem oculi finem terminatur, in duas *Cameras* Anatomici partire consueverunt, atque de earum amplitudine WOOLHOUSE, HEISTERUS, PETITUS, aliique litem habuere; ampliozem nonnulli dicebant ab *vitrei*, & *crystallini* anteriore facie ad *diaphragma*, & secus alii a *diaphragmate* ad *corneam lucidam*; hinc ventum est ad experimenta, atque in congelatis oculis minorem humoris *aquei* quantitatem in posteriore, quam in anteriore *camera* observarunt; ego certe congelati humoris *aquei* stratum $\frac{1}{3}$ l. lineæ inveni in *camera* posteriore, dum in *camera* anteriori *aquei* massulam reperirem, quæ esset portio spheræ $6\frac{3}{4}$ linear., alias stratum aqueum *cameræ* posterioris erat quidem $\frac{3}{4}$ l. lin., massula anterior portio spheræ solummodo 6. lin., & $\frac{1}{2}$; at semper *camera* anterior majorem *aquei* quantitatem continere videbatur.

(LIX)

Quum vero constet humorem oculi *vitreum* primum; hinc *crystallinum*, postremo *aqueum*, quem nonnulli congelari negabant, in glaciem concrefcere, atque quum humores algore densati majorem aream occupent, non ne dubitandi locus esset, quod postici humores præ *aqueo* in glaciem adacti, hunc in minus spatium cohibuerint, atque propterea tum.

posterior camera antèrèus pressò *diaphragmate*, productoque *crystallino* minor devenerit? Ego certe expertus sum, quod ex duobus unius cadaveris humoribus *vitreis*, qui in glaciem concreverant: alterum amplitudine $\frac{3}{4}$ 1. lin., altitudine $\frac{1}{13}$ 1. lin. excessisse, alias solummodo $\frac{3}{4}$ 1. lin., aliquem vero semper fuisse altitudinis excessum; ita ut non raro viderim ex ita adaucto humorum volumine *diaphragma*, quod planum describebamus N. XXII. aliquomodo convexum devenisse: Lens *crystallina* ob quemcumque algorem non ampliatur, imò volumine decrescere observamus.

(LX)

Præterea difficillime ejusmodi oculos habere possumus, ex quibus nulla humorum pars fuerit evaporata, neque partium situs ad minimum mutatus, unde Cl. HALLER, cujus certe judicium æstimandum, summam adhuc in hac re obscuritatem esse admonebat, immò posterior camera ipsi aliquando major re vera visa est: *Ophthalmometrum* diu exoptavi, at mihi hoc deficiente, *camerarum* amplitudinem per *cataractæ encheiresim* in vivis acuratiùs designandam insumpsi, quapropter in vivis molossis inflicta acu quantum fieri posset (& quæ quoque exilissima esset) ad anteriorem *crystallini* faciem, adeo exigua erat altitudo spatii ab acu ad pupillam, ut ab anterioris camerae amplitudine posterior non parum deficere videretur, quod certe jam adnotaveram quando in Nosocomio D. JOANNIS *cataractas* in vivis Hominibus dexterrimè deponebat industrius, & experiens Chirurgus Jo. Baptista VERNA, neque objiciendum existimamus posterioris camerae ampliorem perimetrum, anterioris camerae amplitudinem æquare; nam certo scimus *crystallini* circulum *vitrei* humoris ambitu circum circa aliquomodo excedi, quod probatum credimus ab vestigiis *processuum ciliarium*, quæ in anteriori *vitrei* humoris ambitu semper apparent, atque præterea observamus in oculis congelatis glaciei stratum in

came:

camera posteriore versus lentem *crySTALLINAM* craffitie crescere, utpote humoris *vitrei*, ut aiebam ambitus *diaphragmati* contra *ligamentum ciliare* quam proximus, ambitus *crySTALLINI* altitudinem excederet.

(LXI)

En optici instrumenti elegantissimam structuram, alio quocumque longe perfectissimam? In molli pinguedineo pulvinari, quo repletur orbita residet Oculus, ad eumque sex protenduntur muscoli: Horum quatuor recti vocantur, propterea quod ab orbitæ fundo ad oculum recta protendantur, reliquos duos obliquos nuncupant, ob directionem, quâ ad suam bulbi partem accedunt.

(LXII)

Quatuor recti, ex profundiore orbitæ recessu ei *Duræ Matris* parti affiguntur, quæ *opticum* subeuntem nervum deserit in orbitæ *periostium* evasura, eoque modo, ut tamquam ab angulis *parallelogrammi* acutanguli, nervi *optici* perimetro circumscripti, non propius nervum affigantur, ut inde musculi, ne vi quidem adhibitâ avelli possint; detrahendo vero ab ipsa orbita illam, quam diximus *meningis* portionem, cum hac facillime deponuntur, in ejus pyramidali inversa capsula conclusi, ideoque videmus, non eam a musculis pertundi, ut se ossi infigant, sed per hanc, cui valenter infiguntur, ossi affigi, quod luculenter demonstravit EUSTACHIUS.

(LXIII)

Quemadmodum autem oculus ita confixus est in orbita, ut ejus *axis*, orbitæ obliquus sit, & globus exteriori sinui majore convexitate obversus, hinc quatuor recti oculorum musculi, non omnino recti, neque inter se paralleli, aut æquales sunt, sed interior solus, qui omnium brevissimus est, recta aliquomodo protenditur, & secus exterior, qui majori globi segmento se se accomodans, longior, atque convexior ut plurimum evadit: Angulus, seu punctum, a quo

quo hic musculus enascitur, interno aliquando elatior mihi videbatur, tum non adeo curva hujus musculi pars laceratosa in iis cadaveribus, in quibus exterius *orbitæ* latus minus concavum erat (Num. III.). Reliqui porro duo superior, & inferior ejusdem sunt longitudinis, obliquitatis, & convexitatis, quæ oculi obliquitati, & convexitati respondet; singuli autem ab exortus loco *carneo-tendinei* mox gracilescunt, & teretes fere fiunt, hinc magis plani, & ampliores, donec ad anteriorem oculi partem pervenerint, in *quadratam* illic *aponeurosim* evadentes, eaque circum basim, *corneæ lucidæ* ita affiguntur, ut quam maxime connascantur, quapropter a *sclerotica* dividi adeo facile non possint, ideoque nulla ex iis *partialis* oculi tunica, quam *Tendineam*, aut *Innominatam* vocant; BRIGGSIUS, & STENO tum in *corneam lucidam* harumce *aponeurosim* fibrillas scribunt, quod certe autopsia docet.

(LXIV)

Obliquorum inferior unus, alter superior est: Inferior omnium brevissimus ad anteriorem partem *fissuræ orbitariæ*, quæ in sinu anteriore est ab osse *maxillari* superiore, inter *armoniam* ejus ossis propriam, & os *unguiforme* oritur principio angusto, tenui, *tendineo*, a quo carneus, & paulatim latior, crassiorque primo, post tenuior, sub oculi globo repit ad ejus externum latus ultra mediam rotunditatem, quæ inter *corneam*, & *nervum opticum*, desinit extremo *tendineo*, tenui, & lato, eoque per longitudinem *scleroticæ* se innectens.

(LXV)

Obliquus porro superior singulari artificio, præ reliquis oculi *musculis* constructus est: juxta internum latus *recti superioris* angusto, tenui, *tendineoque* nascitur principio, gracili deinde ventre, eoque ad medium longitudinis intumescente, post detumescente, quam proxime interno *orbitæ* lateri appressus procedit, ad *orbitæ* majorem sinum, ubi in *gracilem tendinem* abit: Illiæ vero speciem orbiculi ossi fron-

tis sub supercilio juxta *sinum* majorem affixi pertransit, transiensque, se circum *cartilaginem* ejus, deorsum curvat, & cum elapsus ex eo est, retrorsum simul, & in latus externum descendit ad superiorem partem globi oculi, ad quem appropinquans latefcit, & extenuatur, seque *scleroticæ* inserit paullo post mediam summam partem globi: Aliquando videre contingit ex recti externi *aponeurosi* fibrillas tendineas cum *obliqui majoris* aponeurosi intermixtas fuisse, atque in *scleroticam* insimul continuatas.

(LXVI)

Orbiculus autem supradictus constat ex tenui *cartilagine*, per transversum concava, & semicanali simili, a posteriore autem parte in priorem orbiculata, a cujus extremis orta, & ossi frontis affixa *ligamenta* tenuia orbiculum perficiunt, crassitudini tendinis *obliqui* sua diametro respondentem; ita tamen, ut tendo ille liberè per eum mobilis sit, mobilis quoque ipse *orbiculus*, qui *cartilagine* sua tendinem sustinet, & continet, permittente quoque figura *cartilaginis*, ut tendo ante eam, & retro facillimè volvatur. Ab hoc orbiculo tendinem ad globum usque comitatur *vagina* cedens, & lubrica.

(LXVII)

CL. SIEGFRIED ALBINUS hujus sæculi Anatomicus præstantissimus, gracillimum aliquando invenit musciculum, *obliqui superioris* comitem, cum eodem enascente, atque juxta *orbiculum* in tenuitatem se dilatantem, evanescentemque in lubricam, laxamque membranam, quæ tendinem obliqua complectebatur, quem aberrantem forsan *obliqui* partem credebat, vel quintum rectum, quem describit MOLINETTUS: An. 1747. die 4. Februarii, quum oculi musculos in Theatro Anatomico præpararem, & reliquas oculi partes, musciculum ipse quoque vidi, *obliqui superioris* æque crassum, evanescentemque in similem membranam, quæ ad exteriorem oculi partem producebatur, & inter superiorem, & internum re-

etorum finiebat, oriebatur autem inter *rectum superiorem*, & *obliquum majorem*.

(LXVIII)

VALSALVA annulos duos *tendineo-carneos* describit, quorum alterum a commissis *tendineo-carneis* fibris musculorum *rectorum superioris interni*, & *inferioris* circum nervum *opticum* præstari docet, alterum porro minorem a fibris ejusdem naturæ musculorum *obliqui majoris*, & *recti externi*, circum nervum *motorium*, seu *paris tertii*. Cl. MORGAGNIUS, operum VALSALVÆ ingenuus commentator, numquam videre potuisse fatetur, ullam cujusve muscoli *fibræ carneæ* suum *rectum iter* relinquere, ut se se in annulum intorqueret. Annuli autem loco perspexit in *Fœmina* saltem *provehctæ ætatis* lineam quamdam *tendineam*, ei nervo non quidem undique, sed fere undique circumjectam (Ego fere semper in omnibus, quæ ad id incidi cadaveribus *tendineam* lineam observabam) In hanc lineam ipsa musculorum capita desinebant, & certe aliquid *tendinei* exterius quoque ad extremum musculorum alicubi apparebat, sed minus, quam interius.

(LXIX)

Porro aliquando perspicue vidimus horumce musculorum aliquos *recta* suas fibras in utrosque nervos inferere, idque interdum adeo præclare, ut nisi maximam fibrarum partem vidissemus, se se extra nervum illum, ut superius dicebamus N. LXII., in ipsius membranam defigere, facile credere esset, non aliunde *musculos*, quam a nervo initium capere.

(LXX)

In Quadrupedibus, itemque ex piscibus, in *Phocena* septimus oculi *musculus* occurrit, qui eodem pacto, ac quatuor *recti a Dura Matre* exoriens, & *recta* procedens, in *scleroticam* infra insertiones cæterorum musculorum inferitur, in quatuor, vel etiam quinque portiones *carneas* veluti in totidem *rectos* dividuus, huncque perperam VESALIUS homini contribuit, præterea Cl. DOUGLASS in *cane* observavit par-

vum

vum *musculum*, qui prodit prope *obliqui superioris* ortum, mox-
que evadens in *tenuem tendinem*, *trochleæ* inferitur; qui cer-
te videtur *musculus*, quem etiam ex homine describebamus
n. LXVII.

(L X X I)

Orbita, in qua continetur *oculus* duabus *femicircularibus*,
seu *lunatis cortinis*, quas *Palpebras* vocant obvelatur, sunt-
que producta *cutis* ab utrisque *orbitæ arcubus*, cui *musculi*, *pi-
guedo*, *glandulæ*, *tunicæ* subternuntur, superior, quæ major
est, illic ubi a superiore *orbitæ arcu* enascitur elatior est,
pilisque obsita, quorum arcuata series *Supercilium* vocatur,
quod à nasi radice versus oppositum *orbitæ finem* semper mi-
nus, & acutum evadit, pilis ad eam partem ut plurimum
reclinatis.

(L X X I I)

A *processu ossis frontis* prope *internum orbitæ finem* supra coa-
litum *ossis nasi*, ut & *processus superioris ossis maxillaris* cum
frontali, modo uno latiore, modo duobus, modo tribus *ten-
dinosis acutis principiis* quædam enascitur, non adeo tenuis
fimbria carnea, quæ inde paulatim latior, & primo crassior,
mox tenuior decurrens oblique extrorsum, sursumque per
dorsum *supercilii* inflexa inferitur parti *carneæ musculi occipito-
frontalis*, fibrillis quibusdam per hunc se penetrantibus in-
cutem loco paullo altiore, quam est pars media *superciliorum*,
ubi, & cum *orbiculari palpebrarum* pauculis, tenuibus fibril-
lis confundi videtur.

(L X X I I I)

Ab superiore, & inferiore *orbitæ arcu*, tamquam ab ejus
periosteo, tenuis, simulque tensilis *membrana* sub universali-
bus *palpebræ integumentis* ad extremam earum oram, quæ
cartilaginea est porrigitur, eique in utraque palpebra, affi-
gitur, hancque eam esse existimamus, quam WINSLOWIUS
*tarso*rum (ita enim vocantur *cartilagineæ palpebrarum oræ*) li-
gamenta dixit.

(LXXIV)

Horumce *ligamentorum*, quod superioris *palpebrę* est *musculum* obtegit, cui est origo a superiore parte foraminis *ossis multiformis* super *rectum oculi musculum superiorem*, cum quo cohæret una cum *nervi optici vagina*, ab eoque loco, angusto principio exortus, se primum modice dilatat, posteaque sensim longe magis totus prætenuis, a principio tendineus, inde carneus, primumque crassior, post extenuatus, & ad postremum in *aponeurosim* tenuissimam converſus, qua adhuc paullatim exilescente, ad *cartilaginem palpebrę superioris* pertingit, & affigitur, sicque decurrit, ut primum rectiore ductu conscendat *globum oculi*, dein circum eum se demittat, atque quum propius tarso cum prædicto (N. anteced.) superioris *palpebrę ligamento* coalescat, illud magis crassum evadit.

(LXXV)

In *sphincteris* potro modum utrique *palpebrę musculus* formę ovatę, tegumentoque similis circumducitur, quem *orbicularem* vocant. Hic autem a majore *sinu* orſus, circumiens oram *orbitę* simul cum utraque *palpebra* rursus ad eundem *sinum* revertit; quemadmodum suo in *sinu*, è superiore parte inhæret, tum *ossi frontis* statim supra priorem, seu anteriorem partem *ossis unguis*, tum vicinę parti *ossis maxillaris superioris*, deinde, & superiori parti *ligamenti*, quod ab *osse maxillari superiori*, è regione *commissurę palpebrarum* in *sinu* majore ex transverso ad *commissuram* illam deductum, pro longitudine sua latum, planum, robustum. Inferiori in eodem *sinu* inhæret *orę foraminis oculi* factę a *processu nasali* *ossis maxillaris superioris*, itemque inferiori parti illius *ligamenti*, & qua his inhæret *tendinosus* est, preterea exigua portione *sinum* majorem aliquando circumit, ea non affixus parti alicui. Est vero insignior, & crassior, qua ab ora foraminis oculi incipit, exilior, angustiorque, qua a *ligamento*, illa quoque parte crassior manet, & latior, hac qua in primis *palpebrę obductę*

obductæ tenuior, & angustior, quamquam non admodum crassus sit: præter *palpebras* superius extremam postremo descripti musculi oram obtegit, totumque tenet *supercilium*, magnamque *genæ* partem, & quod a *sinu* interno, usque ad *temporis* regionem est, cum harum partium cute interventu *panniculi adiposi* omni exteriori amplitudine sua conglutinatus, tum etiam juxta eandem *supercilii* partem, eaque extimus ejus margo ex fasciculis laxius conjunctis constat reliquo musculo strictius compacto. Et fere solus ille margo circum *sinum* alterum continuus est: partes enim, quæ per *palpebras* incedunt suis fibris ultra hunc *sinum* conveniunt in angulos acutos, se seque decussant, implicantque ea parte frequenter *tendineæ*, & aliquando *tendineum* discrimen efficientes.

(LXXVI)

Vidit ALBINUS easdem partes dicto in loco, simul in acutum mucronem abeuntes, *panniculo adiposo* innexum, ingentemque illum *orbicularis* marginem, quem ex *supercilio* circum *sinum* internum in *genam* continuo ductu incedere observamus, interdum ab inferiore hujus musculi parte, quæ juxta eundem *sinum* est, & quæ a *superciliari* fit, per gracilis secedit portio, descenditque oblique, mox adjungens se ad exteriorem marginem *levatoris labii* superioris, aut ad *Zigomaticum* minorem, & cum eo per labium illud dispersus: hicque videtur ille, quem HEISTERUS *depressor* *palpebræ inferioris* vocat; eum porro ab cute *genarum*, & quandoque partim ex osse *jugali* provenisse, terminatumque in inferiorem *orbicularis* oram observavimus.

(LXXVII)

Quæque *palpebra* interius obvelatur altera *tunica*, tenui, albida, & elastica, quæ ab superiore, interiorique utriusque *palpebræ* facie, super anteriorem oculi partem circum *corneam lucidam*, veluti ab oculi musculis N. LXIII. LXIV. LXV. reflexa applicatur; Hanc *tunicam conjunctivam* appellant, atque

nonnulli totam *corneam lucidam* ab eadem obvelari scribunt, sed de hujus *tunicæ* elongatione vid. N. X. *albidam* hanc diximus, & revera albida ex propria substantia est, porro quum ab *ophthalmicis* sanguineis vasis, inferius describendis ad hanc *tunicam* plurima corrivent vascula, tota rubescit, rubescit tamen minus, quum oculum attigerit, & sub hac *tunica* non inconspicua est *cellularis* substantia, utraque certe parte, quæ nempe *palpebram*, quæve oculum tangit.

(LXXVIII)

Parti hujus *tunicæ subpalpebrali* plurimæ exiles sunt glandulæ, præcipue ad superiorem, interioremque *tarşi* zonam, quæ ductus habent *excernentes* parallelo fere tramite hanc *tunicam* penetrantes, hiantesque versus oculum, ut aliqualem *lacrymalis* lymphæ partem exstillent; in superiori *palpebra* longiores sunt ductus, nec adeo recti, magis vero recti, atque breviores in inferiori *palpebra*: has omnes, tum quæ per *palpebræ* aream sunt, tum quæ *tarşi* arcum occupant, *lacrymales* cum MEYBOMIO plurimi Anatomici vocarunt, quæ porro per *palpebræ* aream expatiantur, *sebaceæ* videntur: Præterea cum iis glandulis interspersæ observantur nervæ quædam *papillæ*, de quibus inferius.

(LXXIX)

Major autem lacrymarum *seatebra*, est quædam glandula, quæ pene ad exteriorem *orbis finem*, in propria foveola, quæ in osse est insculpta jacet: Hæc est racemosa, conglomerata, amplitudine fabam ut plurimum excedens, nec adeo crassa, eaque tenuibus quibusdam ductulis, quorum numerus constans non est, utramque *palpebræ tunicam* oblique penetrat, magis semper versus exteriorem *palpebræ* angulum, ubi deficit *lacertosa elevatoris palpebræ* pars iique adeo conspicui sunt, ut hos noverint FABRICIUS ab AQUA PENDENTE, BERENGARIUS CARPUS, FALLOPIUS, aliique.

(LXXX)

(LXXX)

Inter cujusque palpebrę tunicas, limbus cartilagineus in suprema parte intercipitur arcuatus, rotundus, crassior certe in medio tenuiorque ad angulum externum, quam versus nares, & *tarsus* vocatur, ex eoque pili assurgunt, qui *cilia* dicuntur, eæque glandulæ, quas sub palpebris interspersas diximus N. LXXVIII. confertiores sunt ad superiorem utriusque *tarsi* oram, ductusque habent super *tarsorum* dorsum inhiantes; non usque ad contactum utriusque palpebrę versus angulum internum *tarsi* prosequuntur, sed quando ad eum ita accesserint, ut duæ solum lineæ sint ad eum angulum, illic terminantur, declinante reliquo utriusque palpebrę limbo ab *tarsorum* libella, ut inferius dicemus.

(LXXXI)

Dum cutis externa circum angulum palpebrarum internum coarctata inclinatur, eadem emittit productionem aliquam, tamquam chordam albam, tenuem, elasticam, magis planam, quam rotundam planitiebus penniformibus sursum, ac deorsum spectantibus, ex eodem angulo ad processum ossis maxillæ superioris, qui ad formandas nares, & oculi orbitam concurrit, proxime infra armoniam, qua cum osse frontis coagmentatur horizontaliter extensam. Hæc productio disputationibus subinde obnoxia fuit, quidam enim ligamentosam naturam illi tribuerunt, alii veluti tendinem teretem musculi orbicularis palpebrarum designarunt: Cl. BIANCHI Præceptor, inquam meus in perpetuum colendus, frenulum vocat, tendinea quadam texture sarcitum tamquam orbicularis musculi tendo, ejusdemque frenuli, productiones duas, seu duo ligamentula facit, quæ ad angulum internum ex junctis palpebrarum oris emergunt, & inter se se inclinata, recta ad nasum percurrunt, ubi ad extimam ejus faciem supra ossis unguis regionem cum ejusdem integumentis intermixta desinunt, tandem inter se se juncta indivulsa certe, & æquabili cum cute continuitate, ut videre est apud Cl. WEITBRECHT.

(LXXXII)

(LXXXII)

Est igitur hæc productio vere *tendinosa*, tensionemque suam strictiorem nanciscitur a cohæione cum marginibus *ciliorum palpebrarum* Num. LXXX. in hoc angulo interno coalescentium, quæve cum *tendinis* originibus concreescunt. Obtegatur plerumque a musculo *pyramidali* narium a fibris musculi *superciliaris*, atque a lacertulis adfititiis musculi *orbicularis palpebrarum* prætereaque, quod magis ad ejus firmitudinem contribuit, ossibus adfigitur, ut in Num. anteced.

(LXXXIII)

Ab interiore *tarforum* termino, quive a *palpebrarum commissura* vix per duas lineas distat earum cutis recta protenditur, non nihil oblique per ambas *palpebras* descendendo, atque illic ubi curva *tarforum* linea, cum recta reliquæ *palpebræ* continuatur, apertum, eminentisque est utriusque *tarfi* principium, osculumque in utraque *palpebra cartilagineum* format cujusdam ductus, qui ab eminentiori illo loco oblique versus internum *orbitæ sinum* producitur: oscula illa *Lacrymalia Puncta* vocantur, continuatique tubuli *Ductus Lacrymales*: Hos jam bene noverant FABRICIUS ab AQUA PENDENTE, & FALLOPIUS; In oculis, inquit FALLOPIUS, prætermisere *Anatomici* duo foramina, quorum unum est in *palpebra superiore*, alterum in *inferiore*, in *viventibus* adhuc hominibus, si quis inspicere voluerit *apparentia*, quæ foramina habent *meatus*, qui sub *caruncula* *εγκωνιδος*, vel *επιξανιδος* dicta uniuntur in quemdam communem *sinum* in *narium* *cavitatem* desinentem per *canalem proprium* in *osse squamoso*, quod *internum angulum* spectat *insculptum*.

(LXXXIV)

Ea *puncta*, seu *oscula lacrymalia* haud in *ipsis tarsis*, sed ad *internos tarforum* *limites* ita sunt *insculpta*, ut si eadem videre velis *palpebræ* *exterius* devolvi debeant, atque *ipforum cartilagineum* *osculum*, quod *annulum* alii vocant, at *perperam*, non enim omnino *rotundum*, sed *spheroideum* videtur, nihil aliud

aliud est, nisi tarforum perforata pars: Quemadmodum oblique protenditur ab *punctis* ad *palpebrarum* angulum cutis, ita & oblique protenduntur inter utraque *palpebrarum* tunicas *lacrymales* ductus, quos ANELIUS a similitudine non absone *Lumacum cornua* vocavit: ii *membranei* sunt, cylindracei, adeoque parvæ cavitatis, ut tenuissimum stylum vix admittant, imo aliquando solum tenuissimam setam, non est tamen, quod ampliari non possint. Cl. MONROO horumce ductuum superiorem inferiore longiorem facit, & magis oblique ad saccum Num. LXXXVI. continuatum.

(LXXXV)

Exterior tunica pallidiuscula, est interior autem aliquomodo rubella, atque succosa, eaque exiguas efficit rugas, seu plicas, quarum observationem Chirurgus præstantissimo Oculario Sancto YUESIO, WINSLOWIUS contribuit, at has ex Veteribus BERENGARIUM CARPUM jam adnotasse videtur, easque *villos omnium modorum* appellavit, atque quum hos *villos*, seu repagula exigua stilo, probe senserim, apertisque ductibus viderim, mirabar maxime, quod MEYBOMIUS, *fingi tantum, non revera esse* dixerit.

(LXXXVI)

Ii ductus, quo magis ad internum *orbitæ sinum* properant, eo magis in acutum angulum confluunt, donec terminentur, quo autem modo terminentur disputant non nulli Anatomici: Alii enim ex iis ductibus, ad internum *palpebræ angulum* properantibus, priusquam in *saccum* aperiantur, communem utrique coalescere *ductum*, alii porro utrumque immediate in saccum aperiri contendunt: atque ego quum in hanc rem pluries summa diligentia inquisivissem, revera observavi *duos lacrymales* ductus ultra *carunculam* priusquam in *saccum lacrymale* dictum facerent, in unum confluere brevissimum tabulum, qui vix $\frac{1}{3}$ l. lin. longitudinem æquaret, atque hic oblique interiora versus, ad *nasalem* ossis *maxillaris* superioris *apophysin*, ubi ossi *unguiformi* approximatur pertingit.

git, indeque ad eandem *apophysin* intra *semilunarem* ossis *unguiformis* foveolam, ampliatur in parvam quamdam *vesiculam*, *Saccum* inquam *Lacrymalem* dictam, quæ plane est ovata, atque fornicata ita ut ea *vesicula* suo fornice mox descripti tubuli libellam in ossis *unguiformis* foveola non parum excedat, contineturque illic ab *orbitæ* *periosteo* ossis *unguiformis* foveolam obtegentem usque ad oram tubuli *saccum* penetrantis, atque *ligamentula*, quæ hunc *saccum* firmantia describuntur, sunt profecto lacerati hujus *periostei* fragmenta, quod certe *periosteum* magis ad latera foveolæ firmatur, *saccum*que ibidem tenet, qui vix inde foveolæ fundo adhæret, *periosteo* ibidem quoque deficiente.

(LXXXVII)

Glandulas quoque huic *sacco* attribuunt, quas nondum vidimus: profecto hæc *vesicula* propriam *membranam* habet *anarium pituitaria*, a *periosteo* diversam, *pulposam*, *rubentem*, *vasculosam*, a qua ad subiectum adeo porosum os *unguiforme* frequentes arteriolæ demittuntur, *glandulæ* vero nusquam apparebant, nisi *glandulas* nominare velimus exiguißimas adventitias *vesiculas*, crasso muco, aut aqua plenas, quæ certe aliquando occurrunt in adeo succosa tunica.

(LXXXVIII)

Sub ossis *unguiformis* cavea angustior redditur *sacciformis vesicula*, tubulumque in ossa nasi elungat, atque quum abrupta sit *osseï ductus* cavea, hinc non omnino cylindraceus est continuatus ductus, quem ob situm *nasalem* nominare possumus: Is autem in suo descensu, non recta incedit, sed non nihil versus posteriora, oblique descendit, ut optime descripsit VERHEJENNUS, & acuratissimè delineavit Cl. LECAT, atque per eam abruptam semitam continuatus *ductus nasalis* irregularis amplitudinis evadit sub inferiore osse *turbinato* inde veluti in oris caveam apertus: Plura adhuc de *lacrymalibus ductibus*, mihi superessent dicenda, quæ tamen modo prætereo, utpote Præceptori meo,

con-

reservata, cujus certe opera de hisce ductibus historiam *Anatomico-pathologicam* numeris omnibus absolutam habebimus, cum Iconibus, quæ certe non improbabuntur, mea enim diligentia, & industria, qua utebatur amantissimus Præceptor non exigua, ni fallor fuit in præparandis partibus ex optimis cadaveribus (*).

M

(LXXXIX)

(*) *Famosæ sunt Cervi lacrymæ, quarum receptaculum, ita describit WEPFERUS, „Ann. 1676. die 16. Septembris Re-*
„ceptaculum lacrymæ Cervi primum in sinistro latere excidi: po-
„stea in dextro. Ante excisionem observavi sulcum, seu crenam
„superficiariam, depilem coloris lividi, uncie unius circiter lon-
„gitudine ab oculi angulo majore ad principium usque receptaculi
„extensam. Hinc pellem circumcirca ad ossa, undique incidi, &
„ab osse maxillæ superioris separavi, & dum finem receptaculi
„superficiarium existimavi; ipsius fundum abscidi: In dextro la-
„tere cautius processî, ac totum ex sinu osseo protraxi, sensim
„fibrillas, per quas cum periosteo cohærebat, abscidi, ac inte-
„grum extraxi. In osse maximo maxillæ superioris inveni finem
„profundum, articulum parvi digiti fere admittentem: acumi-
„natum, totum osseum, nullibi pervium, situm intra spinam or-
„bitæ oculorum ad latus nasi: bene periostio, aliaque membrana
„nervea intus vestitum. In receptaculi parte postica duos musculos
„carneolatos inveni, unum ab orbita oculi, alterum a radice nasi
„oriundum, quorum tendines inferebantur lateribus crenæ utrin-
„que, ac si locum illud diducerent, prope tendines illorum inveni
„musculum semicircularem dimidi receptaculi orificium, versus
„angulum minorem oculi cingentem; in altero latere versus ra-
„dicem nasi vidi fibrillas semicirculares, alteram partem am-
„bientes. In parte ima receptaculi corpus glandulosum reperii nuce
„muscata minus, & compressius valde durum, & tenax, quasique
„nerveum, ganglio similis, quam glandulæ cuiusvis.

In hujusmodi receptaculis materia reperitur emplastro tenaci si-
milis obscuro flava, ex eaque compressa, lacrymæ fluunt; & pene
idem

Illic ubi confluunt *ductus lacrymales* priores in ipso palpebrae interiore angulo, transversim sita est *caruncula* quaedam oblonga, in cujus designanda structura non satis consentientes sunt Anatomici; GALENUS *carneam esse, eamque satis compactam carunculæ hujusmodi substantiam* dicebat, sui tamen peculiaris generis; est porro facta ex pinguedinis acervulo, cui nonnullæ supersternuntur glandulæ, supertexunturque membranei vili: atque etsi ea pinguedo, & glandulæ aliquando insigniter turgeant, tamen utraque substantia aliquando ita extenuatur, & flaccescit, ut ex duplicata, contractaque palpebrarum interiore tunica, quæ illic semilunarem isthmum comparat, *carunculam* fieri videatur: interior enim *conjunctivæ* pars super oculi bulbum transgrediens ante *lacrymalem carunculam* ultra oculi lateralem convexitatem eminens fit, & in semilunarem rubellam plicam ad perpendiculum palpebras secantem, & convexitate *carunculam*, concavitate *corneam lucidam* respicientem redigitur.

(XC)

Caruncula lacrymalis non ita exterius, ut in Homine, in Bove, Equo, aliisque quadrupedibus prominet, verum ejus loco tuberculum observatur exterius membraneum, interius cartilagineum, cui appensa glandula oblonga, in media sui longitudine, *cartilaginem* latam, & longam continens. Cartilago hæc aliquomodo conducit ad *membranæ deterforiæ* expansionem, quæ animalium variorum Ovis scilicet, Bovis, Equi oculis concessa est, quæve præcipue avibus peculiaris, *nictitantis* nomine significatur, est nempe sat ampla in angulo interno veluti

idem nuper observabam in ove, & vervece.

In Homine Cl. VATERUS præter ductum nasalem, a sacco N. LXXXVI., & LXXXVII. duos alios ductus observasse scribit, quorum alter ab ipso sacco in superiorem nasi partem, alter in antrum maxillare aperiretur, atque idem jam indicaverat Cl. STENO, neutrum porro autopsia constat.

luti *conjunctivæ* plica, quæ ad alterum angulum musculorum quorundam ope, quibus veluti corniculis suis adnexa trahitur, atque etiam in aliquibus ab inferiore ad superiorem oculi partem, quemadmodum in *Rana*.

(XCI)

Glandulæ, quæ *adiposo caruncule* glomeri supersternuntur, ductus habent excernentes, plicamque semilunarem penetrantes, atque præterea in *adiposa* substantia pili eminent, ex semilunari membranula, quorum elegantem seriem in obæso, maximeque villoso homine aliquando conspexi, quod certe in quadrupedibus, magis perspicuum occurrit.

(XCII)

Exterioribus oculi partibus plura sanguinea vasa ministrantur, quorum arteriosa, præcipue ab arteria *nasali* educuntur; at quum *orbitæ* fornicem aliquando levarem, *carotidem* quoque internam vidi, prope *sellam equinam*, & per proprium recessum foraminis optici arteriolam in *orbitam* propagare: hæc superior iis, quas ab nervo optico ad *scleroticam* ducebamus, musculis, glandulis vicinis, circumfusæ *pinguedini*, *duræ matri* fissuras *orbitarias* obtegenti, hic naribus, illic sinibus *ethmoideis*, nervoque quinti paris furculos ministrat, atque ejus trunculus per *orbitam* interius nervo optico adjacet, imo aliquando ex eadem, vel ejusdem vasculis, nervo optico circumductis eundem non nihil inflecti videbamus; eademque inde se se erigens super musculum rectum internum ex *sinu orbitæ* interno erepit, & per palpebrarum cellulosam telam flexus, plurimas vasculorum miriades, generat; cum hoc autem furculo inosculatur quoque ramulus ab arteria *angulari* productus, quique per internum *orbitæ sinum* erepens *palpebras* adit, & *conjunctivam* faccum *larymalem*, *carunculam* &c., cum priori *anastomoses* luculentissimas comparans.

(XCIII)

Frontalis quoque, *temporalis*, & *infra orbitalis*, quæ pro-

pago est *nasalis*, itemque *maxillaris* superior, omnes, *carotidis* externæ soboles furculos suos *palpebris* contribuunt, unde non certe mirum, si *subpalpebralis tunica* luculentissime rubella videatur: hisque singulis arteriolis comites sunt venu-læ in *sinus cavernosos*, *angularem* venam, & *temporalem* con-fluentes: sub *tunica conjunctiva*, qua parte oculo applica-tur, vasa lymphatica aliquando observavi, quæ capreolo-rum adinstar circum oculum inflectebantur per *cellulosam* ejus-dem *tunicæ* substantiam molliter perrepentes, non erant porro NUCHIANIS ductibus similes, neque videre potui an *scleroticam* quoque pervaderent. Cæterum facile credide-rim lymphaticas quoque arteriolas per hanc partem distri-bui, quæ enim furente homine ibi conspicuæ evadunt pri-mum inconspicuæ sanguinæ arteriolæ, lymphaticas antea-fuisse non inani judicio suspicandum, quod per belle ab aliis jam evictum.

(XCIV)

Nervus *tertii paris*, quem *oculorum motorium* dicunt ab *la-cero foramine ossis petrosi* orbitam subit, inferior, & exte-rior nervo *optico*, eique ramum supertendit, qui partim mus-culo recto superiori, partim *palpebræ elevatori* prospicit, deinde trunculus sub nervo *optico* finditur, & ramum edit interiorem, ad muscolum rectum internum, alioque sub ner-vo *optico* secundum rectum inferiorem excurrit, & huic, & longo ductu sub oculi bulbo, *obliquo inferiori* se immissu-rus, inferiori oculi segmento ramusculos, qui certe *scleroti-cam* pervadunt, ministrat; atque juxta obliquum inferiorem cum ramusculo *quinti paris* coeuns, *ganglion* efficit, ex quo alii ad *scleroticam* ramusculi, & ad rectum externum. Ex eo quoque *lacero foramine*, quarti paris nervulus prodit, qui præcipue in *obliquum majorem muscolum* absumitur ullis vix fibrillis in circumfusam *pinguedinem*, & *trochleæ* ligamentum porrectis.

(XCV)

Nervi alii plurimi *palpebris* sunt concessi: *quinti paris* ramus prior ultra *rimam laceram* finditur: atque superior, & exterior ramus continuo dividitur in alios duos ramos, sibi adcumbentes, qui porro sub *periostæo orbitæ elevatorum*, & *rectum* superiorem versus angulum internum oculi penetrant. Truncus ipse priusquam *orbitam* adeat, dat ramum *lacrymalem*, qui per propriam vaginam *Duræ Matris* ex interiore orbitæ fissura, tum juxta *abductorem* ad *glandulam innominatam* abit, & ex ea divisus ad superiorem palpebram, & aliquando ex *orbita* per foramen non perpetuum ossis *malæ arteriæ* pervium, ad faciem exit. Ramusculorum superior, & interior comes arteriæ, & venæ exit versus *trochleam* dat ramum internum mox bifidum in *corrugatorem labii*, altero vero juxta *trochleam* descendit ad *orbicularem palpebrarum*; exterior vero foramen *supraorbitale* vel vicarium foraminis hiatus marginis orbitæ subit, & continuo in multos ramos exit, ad *orbicularem*, *corrugatorem*, & ad muscolum *frontalem* longissime excurrans. Ramus quoque inferior trunci *quinti* sub *levatore*, oblique supra nervum *opticum* orbitæ interiora petit, subit hujus, & obliqui minoris intervallum, & furculo uno ad anteriora orbitæ erepit sub *trochlea*; ad palpebram superiorem, *carunculam*, *sacculum lacrymalem*, *corrugatorem* ramosus finitur; altero nares subit: tum per externum angulum foraminis laceri prodit *sexti paris* ramusculus *orbitam* subjens, reliquis humilior multis ramis in solum *rectum externum* distributus; atque etiam a nervo *duro septimi paris palpebræ* ramos aliquos habent, de quibus omnibus vide elegantissimam celeberrimi Anatomici ALBERTI HALLER iconem de *cranii basi* in ejus amirabili Fasciculo I. Iconum Anatomicarum.

(XCVI)

PETITUS nervi intercostalis, quem ab *vertebralibus* nervis oriri contendit, ramulos, in sinu *cavernoso* arteriam *carotidem*

idem insequentes ad oculos exporrigi credendum censer, propterea, quod ex reciso *intercostali* in cane oculorum nitor obnubliatur, tenues crassæque exprimuntur lacrymæ, complanatur *cornea lucida*, flacescit oculus, inflammatione *conjunctiva*, & *detersoria membrana* corripuntur: Præterea, quum *sextum par*, qua parte adnexos habet hujusmodi ramusculos, majoris crassitie videatur eosdem excipere potius, quam emittere autumat: Ego certe non hos ramusculos ad oculos continuatos vidi, sed ex iisdem interdum ramulum quemdam vidi enascentem, qui ad *orbitam* inde properaret, neque de prioribus fatis certus sum.

*Se ne permette la Stampa. Morozzo per la
Gran Cancellaria.*

AUCTO-

AUCTORUM OPERA,

Quæ in OPHTALMOGRAPHIA recensebantur.

ALBINUS SIEGFRIED Hist. Mus. Hom. Edit. Lugd. Bat.

ANELIUS in Epist. de Fistul. Lacrymal. Edit. Taur.

AQUILONIUS Optic. lib. 2.

BERENGARIUS in Anat. MUNDINI.

BIANCHI Dissert. de Duct. Lacrymal. an. 1714., que inter-
rum in Anat. Theatr. MANGET. prodiit, itemque in
Fascicul. Opusculorum Anat. Lugd. Bat. 1723., atque
Icones recens addebantur Anat. HEISTERIANÆ a CL.
SENAC Parisiis.

BONNANI in Musæo KIRCHERIANO.

BRIGGSIIUS ex Ophthalmographia.

BRISSEAU de Cataract. & Glaucom.

BULFFINGERUS Tom. II. Acad. Petrop.

CAT (LE) Traité des Sens. Edit. Amstelodam.

CHESELDEN ex Transact. Philosoph. & Philosop. NEW-
TONIANA Cl. VOLTAIRE.

COWPERUS in Not. ad Anat. BIDLOO.

DEMOURS Acad. Royal des Sienc. an. 1741.

DOUGLASS Descript. comparat. Muscul. Edit. Lond.

EUSTACHIUS Tab. Anatomic. Edit. Romanæ.

FALLOPIUS Observ. Anat. ad Petr. MANNA.

FABRICIUS ab AQUA PENDENTE Tract. de Organ.
Visus, Loquelæ, & Audit.

GALENUS in lib. de us. Part.

HALLER Tom. IV. Inst. Boerh., & Fas. Ic. Anat.

HEISTERUS Dissert. de Tunica Choroide, itemque Com-
pend. Anat. Edit. Altorf & Venet.

HOMBERGIUS Acad. Paris. an. 1696.

HOOKEIUS in Micrographia.

- HOVIUS Differt. de Hum. Ocul. mot. circul.
 KEPLERUS Paralipomen. in VITELIONEM.
 LEEUWENHOEK Arcan. Nat. & Epist.
 LESSERS Tholog. des Insect.
 LYONET Nct. ad Theol. Insect. LESSERS.
 MALPIGHIUS Epist. de Cerebr.
 MEIBOMIUS de Vasis Palpebrar. nov.
 MERYUS Acad. Reg. Paris. an. 1704.
 MOLINETTUS Differt. Anat. Patholog.
 MONROO Soc. Edimburg. Tom. III.
 MORGAGNI Epist. Anat. XVI. & XVII. ad script. celeb.
 VALSALVÆ.
 PARISIENSES ad an. 1699. & seq. Acad. Reg. Paris.
 PETITUS Acad. Royal. des Scienc. an. 1726. 1730.
 POTERFIELDS Societ. Edimburg. Tom. IV.
 PUGET Obser. sur la struct. des yeux de divers. Insect.
 RIOLANUS Antopographia, & Enchiridion Anat.
 ROLFINCIUS Differt. Anatomic. lib. 4.
 SANTORINUS Observ. Anat. Edit. Venet.
 SCHEINERUS Ocul. seu Fund. optic. Oenipont.
 STANCARIUS Acad. Bonon. Tom. I.
 STENO Act. Hafniens. Tom. II. & Anat. cap. Piscis de
 Canum genere.
 VALSALVA Differt. Anat.
 VATERUS Acta. Berolin. Cent. IV.
 VESALIUS de Hum. Corp. fabric. Edit. Boerh. & Alb.
 VERHEJENNUS in Hum. Corp. Anat. Edit. Lovan.
 WEITBRECHT Syndesmolog. Edit. Petrop.
 WEPFERUS Acad. Nat. Curios. Tom. III.
 WILISIUS Anat. Cerebr. & Nerv.
 WINSLOW Acad. des Scienc. 1711. Expos. Anat. Edit.
 Paris. in IV.
 WINTRINGHAM Recherche experiment. sur quelq. point.
 de la struct. des Animaux.
 WOOLHOUSE in Epist. contr. HEISTERUM.

